

WRITTEN LITERATURE-MFANTSE 1-6

EBS 148 : WRITTEN LITERATURE OF THE GHANAIAIAN LANGUAGE (MFANTSE)

Nyienyim

Kasadwin ye kwan soronko bi a kasa dwumfo bi fa do dze kasa dzi edwin na ɔdze pue gua do anaa ɔda no edzi. Kasadwin ye dwuma ahorow a edwumfo dzi no mu kor. De mbre edwindzi biara tse no, ɔye nyimdzee bi a odwumfo bi wɔ, na ogyina do dze dzi n'edwin ahorow no mu biara. Se yefa dua dwumfo bi a, onya dua a odzi mu a, otum dze dzi edwin biara a ɔwɔ n'adwen mu de ɔdze dua no bedzi ma ɔmanfo hu na wɔkamfo no. Ɔye ho edwuma nkakrankakra ara kesi de obenya adze kor a oesusu ho wɔ ne tsir mu no pepɛɛper. Kɔɔber dwumfo bi so bɔ ne tsir mu pɔw de ebia ɔbeye mpetsea bi a nworaba si do a, ɔfa n'edwindadze na ndzɛmba ahorow bi a kɔɔber dzi mu adɔntsen no, na ɔnan dze ye. Se ɔnan wie a, ɔtɔ no bo ase, na ugu ara kesi de obenya dza oesusu ho no pepɛɛper. Dem ara na kentewemfo so fa no nhoma, yiyi ahosu ahorow a ɔpe de ɔdze dzi edwin dze wen tam no fɛfɛɛfew. Kentsɛnwemfo so fa mfeaa, ndombir, ntonton na adobe no mu biara na ɔdze wen kentsɛn na ngua fɛfɛɛfew. Dem awen ndwuma yi nom nyinara hia nyimdzee soronko de mbre ɔbeye a ndzɛmba ahorow no nyinara beye enyika. Kasa ho edwin dzi mu no so, dem ara na ɔtse. Kasa dwumfo no fa kasasu ahorow na ogyina abrabɔ mu nsem do dze dzi edwin biara a ɔpe. Dem adzesua yi mu no, yebɔhwɛ kasadwin; nkankara akyerɛw kasadwin. Yɛbɔdɔ mu esukɔ na yeesua nsem ahorow a ɔfa ho. Ma yɛnkɔ do.....

Tsir Yi No Botae

Tsir yi bɔkɔ ewiei no, ibotum:

- a) dze woara wo nkasafua akyerɛ kasadwin ase
- b) akyerɛkyerɛ akwan ahorow bi a wɔfa do kyerekyerɛ kasadwin mu
- c) akyerɛ kasadwin a ɔye abɔtsirmu
- d) akyerɛ dza enyimdzefo bi ka fa kasadwin ho

Afei ma kenkan dza ɔka do yi...

1.1 Kasadwin ne Nkyerɛase

Ɔnam de kasa dwumfo no fa kasa, na ogyina abrabɔ mu nsem do dze dzi n'edwin no ntsi, nyimdzefo pii noara na wohu kasadwin de abrabɔ. Mma yɛnnkɔ ekyir koraa; Angmor (1996:1) ka dem enyimdzefo yi ho. No nhwehwɛmu dwumadzi mu no, ɔkyerɛ kasadwin mu tsiabaa de, ɔye

abrabɔ. Agyekum (2011:1) so kyere kasadwin ase de ɔye abrabɔ na adwenmusem a wɔdze kasa aye. Se ɔkyere mu ko ekwir a, kasadwin ye abotsirumu nsem a wɔdze kasa ahyehye anaa awen dze edzi edwin ma ɔda ankorankor anaa ɔman bi mu mba hon suahu, ndzɛpa, amambra, nyamesom na hon gyedzi edzi wo aber bi mu.

1.2 Akwan Ahorow Bi a Wɔdze Kyere Kasadwin Mu.

Kwan bi do no, yehu kasa a yeka yi nyinara de ɔda biribi edzi dze kyere hen, ɔma yetse ndzemba ase, na yehu dza kasa biara da no edzi dze kyere hen. Mpen pii no, se yeka kasadwin a, ɔye a nna yerohwehwe akyere de, kasa bi ye soronko sen kasa bi. Nyew, ɔwo de yehu no dem. ɔtofabi a mbre obi besi dze kasa bi bedzi dwuma no, se annhwe no yie a, nna ne ntseasee no reye akeye biribi soronko koraa. Kasa bi so wo ho a, de mbre yehu no no, dem ara pɛpɛper na ne ntseasee tse a ɔmma wo ntseasee fofor biara. Mbom dza oka no, dem ara na ɔtse anaa n'asekyere tse. Iyi ntsi yeakyere mbre wosi kyere kasadwin mu ahorow ebien. 1). Dza ɔdze asem bi to gua, na 2). dza wɔahye da awen.

1.2.1 Dza ɔdze asem bi to gua

Kasadwin ye kasa dwumadzi biara a ɔfa biribi ho. Yebotum aka de, asem biara a ɔfa nkasahosem ho biara no ye kasadwin; de wɔakyerew anaa wonnkyerewee mpo. Dem nkyeremu yi ye kasadwin ne ntseasee a no mu mmpiw.

Bio, yebotum so aka de kasadwin fa nsem a yedze to gua a ɔmma hen **ntseasenta** biara na mbom ɔye daa daa asetsena mu nsem a osisi a ɔye nokwar na ɔfa nyimpa na n'asetsena mu ntotoe ho. Nsem bi a ɔtsetse dem no bi taa ye ankorankor bi anaa nyimpakuw bi ho abakɔsem, nyimpa bi ho nsem, enyamesom mu gyedzi ho nsem, dawurbo nkrataa mu nsem, akontaabudze nwoma ahorow mu nsem, adze bi a obi ehu na oridzi ho dase na dza ɔkeka ho pii. Nsem a ɔtsetse dem no, woka no de mbre ɔtse no ara; wɔmmfa bi nnka ho na wonnyi bi so mmfi mu. Ne dem no ntsi ɔmma yenya ntseasenta wo nsem a ɔtsetse dem yi mu koraa.

1.2.2 Dza wɔahye da edzi ho edwin

Dza ɔto do ebein, se yeka kasadwin a, yehwe no okwan a obi so tum fa do dze kasa no hyehye biribi fa nyimpa na asetsena mu nsem ahorow bi mu ho. Iyi mu no, odwumfo no hwe kasa no dwuma a oridzi no na ɔtsena ase dze kasa no dzi edwin hyehye no kama ma soronko fi daa daa kasa ho. Yebotum ehu kasadwin de ɔye nyimpa n'abrabɔ mu nsem.

Kasadwin a ɔdze asem to gua a ɔtse dem yi no, mpen pii no ɔtaa dze ntseasenta nam, osiande wɔhye da bɔ hɔn tsir mu tase kasasu ahorow na wɔdze dzi edwin dze da abrabɔ mu suahu bi edzi. Ɔwɔ mu de wɔbɔ hɔn tsir mu na wosusu dze, naaso dza wɔka biara no, osiande kasadwin ye abrabɔ mu suahu ntsi, mpen pii no, ɔnye nokwar se. Se annhwe no yie a ɔto da bi mpo a, na yereye akɛfa no de obi noho asem bi na kasadwumfo no hunii a ɔdze roto gua, naaso nna ɔntse dem. Osiande ɔnye nokwar se no ntsi obi tum kenkan mpo hu noara noho wɔ nsem a ɔko do wɔ kasadwin no mu no mu. Iyinom ntsi, ɔma kasadwin taa nye mber ko pepeepe.

1.2.3 Dza nyimpa bi anaa nyimdzeɔ bi ka fa kasadwin ho

Okpewho, (1992) kyere de, se yɛka kasadwin a, ɔkyere dwumadzi bi a obi dze kasa edzi a wɔakyerew ato ho. Ɔmmpa ho ara, ɔko do kyere de dem dwumadzi a ɔtse dem no ma obiara a ɔkenkan no nya atsenka bi na ɔsan ma osua abrabɔ anaa asetsena mu nsem ahorow bi so. Se ɔkyere a, dwumadzi no taa ye abotsirmu nsem bi a ɔye soronko fi dawurbɔ nkrataa mu nsem ho, abakɔsem nye abrabɔ mu nsem bi a wɔhye da kyerew to ho so ho. Mfatoho a ɔdze ma bɔserɛmuka/ abotsirmu dwumadzi yi bi nye ndwom, anwensem, anansesem, abebu, kasambirenyi na dza ɔkeka ho.

Handerson, Day & Waller, (1994), so kyere de kasadwin ye adwenmusem bi a wɔdze kasa aye. Wɔkyere a, dem kasa yi ye soronko fi daa daa kasa a yɛka, anaa akyerew ahorow bi so a yehu ho. Wɔkyere de, iyi ye nokwar turodoo, osiande kasa a wɔdze ye kasadwin no, ɔgye adwen, na no mu so piw yie. Iyinom nyinara ekyir no, wɔdze kasa yi dzi edwin soronko bi a ɔma enyigye na ahomka anaa atsenka soronko bi wɔ kasadwin no ho.

Kakra a yehu wɔ nsem ebien a Okpewho na Handersonnom dze ato gua no ho no, nsentsitsir yi na ɔda edzi wɔ kasadwin ho:

- a. ɔgye adwen si biribi do
- b. ɔma enyigye anaa atsenka soronko
- c. ɔda abrabɔ mu suahu edzi
- d. ɔye abotsirmu nsem
- e. Kasa a wɔdze ye kasadwin no bue hen adwen wɔ biribi no nsusui ho.

Egblewogbe (nd) so kyere de, kasadwin ye kasa a wodze edzi edwin, na osan so gyina ho ma abrabo bi anaa okyerekyerere mbre okyerewfo bi si hu abrabo mu nsem bi mu fa. Dza ope de okyerere nye de, kasadwin gyina ho ma abrabo bi na osan so kyerekyerere abrabo mu nsem bi mu.

Bree na no dom (1963) so ye nkorofa bi a wokwadar kasadwin mu, na wokyerere a kasadwin da nsew fi akyerew ahorow binom ho, osiande, oma atsenka bi a akyerew nkaa no nntum mma, na afei so owo nhyehyee a oye few na oye enyika.

1.2.4 Mbuano

Se yehwe nsem a nyimdzefo ahorow yi aka afa kasadwin ho a, ndzemba a odzidzi do yi na yebotum ehu dza oye ahoma a obo ne nyina mu: atsenka a yenya wo akenkan mu.

- a. Otserew mbre yesi kyere hen nsusui wo ndzemba bi ho mu.
- b. Oma hen enyigye.
- c. Oma hen kasaa no ko enyim.
- d. Owo nhyehyee a oye few na oye soronko so.
- e. Kasadwin ye abrabo
- f. Oye suahu na nyimdzee a ofa nyimpakuw bi ho
- g. Kasadwin tum ye abotsirmuka anaa nokwasem bi a kasadwumfo nam akwan ahorow bi do dze to gua.

Mbubudo

Adzesua yi ama ehu de kasadwin ye abrabo. Oye nsem a wofa kasa do awen no frenkyemm enyika enyika mu ara a oda Nyame n'abodze anaa nyimpakuw bi mu mba hon gyedzi, agodzi, ndzeyee, osom na suban ahorow edzi wo ber bi mu a wodze ano ka anaa wokyerew.

So Woho Hwe Dwumadzi 1.1

1. Kyere kasadwin ase yie.
2. Akwan ahen na ibotum afa do dze akyerere kasadwin ase? Kyere ne nyinara mu yie.
3. Nyimdzefo binom hon adwenkyere wo kasadwin ho nye dem?
4. Ana egye tomu de kasadwin ye abrabo? Kyere siantsir a ereka dem.

TSIR 2: KASADWIN HO MFASO

Nyienyim

Dɛ mbɛ yeehu no wɔ tsir kor no mu no, kasadwin wɔ nkyerɛasee pii onam dɛ, nyimdzefo pii noara gyina hɔn suahu na nwomasua mu ntsetsee do na wokyerɛ kasadwin ase. Ne nyinara mu no, yehu dɛ mfaso pii wɔ kasadwin ho. Tsir yi no mu no, yɛbɔbɔ bi do na yɛayɛ ho mpensampensamu Botae

Tsir yi bɔkɔ ewiei no, ibotum:

- akyerɛ mfaso a wɔ kasadwin ho

Kasadwin ho mfaso

Dza odzi kan no, obue nyimpa n'adwen mu. Kasadwin yɛ nyansa kasa a no mu nsem pii yɛ dur anaa no mu piw yie, ntsi ohia adwen a no mu yɛ dur na no mu piw na nyansa so wɔ ne ntseasee mu. Iyi ntsi, mber dodow a nyimpa rodwen kasadwin ndzemba bi ho kɔ ekyir no nna dɛm nyimpa no n'adwen mu rubue. Yeedzi kan so aka dɛ, kasadwin ndzemba no ne nkyerɛasee nnye kor per iyi ntsi, mber tsentsen a obi rodwen kasadwin ndzemba bi ho kɔ ekyir no nna dɛm nyimpa no rinya adwenkyere ahorow fa adzekor noara ho. Iyi boa ma nyimpa n'adwen mu bue. Mbɛ kasadwumfo

hyehye kasadwin no, no mu piw, no mu do, na mpen pii no nna akeye de nsem bi a yeabo no pow. Oba no dem a, ohia obi a n'adwen mu ebue na no mu do so ma oeesan pow no.

Oto do ebien, kasadwin tserew mbre yesi kyere hen nsusui wo ndzemba pii ho no mu. Obue okenkanfo no n'adwen enyi wo ndzemba pii ho a nna nkan no ne nyimdzee suar wo ho ho ma otse ndzemba akese bi so ase. Oma yehu de wiadze mu nsem doo so ankasa. Omma nyimpa nnye ntsetsekwa. Nyimpa anaa okenkanfo ne nyimdzee mu tserew ankasa. Onam de suahu a kasadwin dze to gua doo so ntsi, obue nyimpa enyi ma ohu ndzemba pii a owo wi no ase.

Oma okenkanfo nya atsenka soronko bi wo n'akenkan mu. Kasadwin no mu na yebotum ehya agofomba bi a kasa dwumfo no dze hon ye edwuma no mu bi a hon su na hon abrabo tum ma onya atsenka bi ma hon. Kasadwin tum da adwen anaa atsenka a owo ankorankor anaa nyimpakuw bi mu edzi ma kasa dwumfo dze to gua. Kasa dwin dze enyigyesem na awerchowsem nyinara to gua. Obi tum dua dem enyigyesem no d ma onya enyigye. Demara so na obi tum gyina awerchosome a owo kasadwin mu no do su anaa onya awerchow. Iyi ntsi, yese, kasadwin bue kwan to ho ma nyimpa da n'atsenka ahorow edzi.

Amanyesem, amambra na gyedzi mu nsem a oko do wo oman n'atsenka ho no, kasa dwumfo nam kasadwin do dze iynom nyina to gua. Adwentofu, kyerewfu, senenyifo na adze tum fa ndzemba a okoko do wo oman bi mu na wotwa ho mfonyin wo hon kasadwin ndwuma mu ma obiara hu dza okoko do, Se oba no dem a, oma omamfo hon enyi ba hon ho do ma woye dza ofata de woye. Nyimpa nam kasadwin do sesa no suban. Obi so nam do bo bra pa. Obi nam do nya suahu foror bi koraa na onam do sua ndzemba aforor ka n'abrabo ho dze tu n'abrabo mu mpon. Bio, kasadwin boa ma oman bi tu mpon, ono nye de, kasadwin ye nyimpakuw bi hon abrabo. Dem ntsi, aber a nyimpa bi dze kasadwin ndwuma bi ridzi dwuma na oruhu ndzemba anyimpa bi yee no mber a ebotwa mu a oboaa hon no, nna aforor so dze roto hon dze ho. Mfotoho: Abakosem ma yetse ase de, Mfantse okunyin bi a odze Egya Ahor dze noho boo for maa Mfantsefo. Dem ndzeyee yi ye etuhuakye pefee na okyere ayamuyie nwionn. Se obi kenkan abakosem yi na otse dem etuhuakye nwanwaso yi, otum ye edwumadzen dze boa ne man no nkodo. Nyimpa no tum nya adwen bi de se obi mpo etum dze no nkwa ato ho ama ne man a, eben adze na osom bo kyan nkwa?

Kasadwin ma hen kasaa no ko enyim na oma anotsewee so. Kasadwin mu no, wodze kasasu ahorow tse de be, kasambirenyi, ntotoho, ngyinahoma na tsetse kasa dzi dwuma. Iyi ma nyimpa sua kwan

a wofa do dze dem kasasu ahorow yi dzi dwuma wo daa daa nkombodzi mu na odze hyehye ne kasaa mu. Se oba no dem a, oma nyimpa n'ano tsew. Kasadwin so boa yi fer fi ho. Iyi ntsi, oma obi tum kasa wo bagua mu a onnya ohaw biara. Oma okasafo bi dze nsem sie ne tsir mu na oda no edzi mber a ose mu. Dem ara so na obi nam kasadwin no suahu do dze asem bi to gua a onnya amandze. Kasadwin boa ma yehu dza ofata de yeka na aber a owo de yeka wo mu. Ntsi se obi sua kasadwin na osu no yie a, otum dze kasadwin ho nyimdzee no bi hyehye ne kasaa mu aber biara ma kasa no ye dew ye huam.

Iyinom nyina da nkyen a, kasadwin ma akenkanfo hon enyi gye papaapa ara yie. De mbre kasadwumfo hyehye kasa no, tsitsir, wo awensem na ndwom kwan do no, oma oye dew, oye few na oye ahomka so. Obiara a okenkan no, osian enyigye a owo no wo ho ntsi, oma wongyaa de wokenkan wie. Nkankaara de se oye ndwom mpo dze a, ono wonnka koraa; ne dew no, gyede ewo. Kasadwin no mu nsem no bi ye paserew, bi kenyan atsenka ma oye enyigye na enyika. Nsem a osisi anasesem mu dem yi tum ye enyika. Oma obi tum serew ara ma no were fir ne haw. Mbofra tum tow ndwom wo hon agodzi mu, wotum dzi ano na ano agor bi tse de ebisaa na abrome a ne nyinara boa ma mbofra nya enyigye iyi ara so dze nkabomu na korye ba nyimpa ntamu.

Kasadwin ma esuadze ahorow pii. Yenam kasadwin do hu abodze ahorow, yehu nyimpasu ahorow, yehu akwan ahorow a wofa do ye ndzemba ahorow. Se yesua kasadwin a, oboa ma yenya suahu ahorow pii. Oma yeye ahweye wo abrabo mu. Yetum dze kasadwin mu nsem ye ntotoho fa abrabo ho ma nyimpa nya esuadze fi mu. Mbuukuu ahorow a yekenkan na anasesem ahorow a yetsie no ma yenya esuadze ahorow pii. Se ekenkan *Obra Woto Bo Bo* buukuu a Owura D.E.K. Krampah kyerewee yi a, oma inya adzesua pii. Ihu de, abrabo nnye mbirikatu na akansi mbom, oye ntoboase na edwumadzen. Dem buukuu yi ara so ma ihu de, nyenko bi kyen onua. Se ekenkan buukuu yi a, itum fa nsem ahorow a osisii wo mu no na edze toto wo bra ho, na etsentsen w'abrabo ne beebi a akyea. Iyi kyere de, yenam kasadwin do nya afotu dze bo hen bra.

Kasadwin boa mbatsetse. Ehwe a eben kwan do na kasadwin fa boa mba tsetse?

Mbubudo

Adzesua yi ama yeehu de, kasadwin dzi dwumason wo nyimpa n'abrabo mu. Bi nye de, yenam kasadwin do da hen atsenka edzi, yenam kasadwin do dwedwe hen ho (gye hen ahom), yefa kasadwin do twe adwen si ndzemba a okoko do wo asetsena mu do. Bio, kasadwin ma yenya suahu

ahorow a oboa mba tsetse. Kasadwin so boa ma yebo kasa na amambra ho ban. Oboa ma yedze esumasem bi huntsa. Afei, kasadwin bue nyimpa n'adwen enyi ma ohu dza oroko do wo wiadze a etwa noho ehyia.

Sɔ Woho Hwe Dwumadzi 1.2

1. Eɛnɛdɛ ntsi na ohia de yesua kasadwin?
2. Eɛnɛdɛ na kasadwin wo ma nyimpa?
3. Kyere akwan a kasadwin fa do boa wo ndzɛmba odzidzi do yi mu:
 - a. Nwomasua
 - b. Mbatsetse
 - c. Kasa na amambra mu

TSIR 3: KASADWIN NO SU BI

Nyienyim

Yema wo akɔba ba tsir a ɔto do ebiasa yi mu. Kasadwin wo su ahorow bi a ɔno na ɔma ɔda nsew fi daa daa kasa na akyerew ahorow ho. Dem su ahorow yi na yereba abohwe wo tsir yi mu. Kasasu ahorow a yerobohwe no wo nkyekyemu yi mu no na odzidzi do yi: akaasi/aperper, amansuon adze, ntseasenta na kwetsikwan.

Tsir Yi No Botae

Tsir yi boko ewiei no, ibotum akyerɛ:

- a) Kasadwin no su ahorow a odzidzi do yi nyinara mu:
 - i. akaasi/aperper ii. Amansuon
 - adze/ɔwo owura iii. ntseasenta
 - iv. kwetsikwan

Afei ma yenkenkan dza odzidzi do yi...

3.1 Akaasi/Aperper

Yenam agofomba hon akonaabadzi do hye ndzemba a esisi anaa towbea (plot) nyina nsew. Ehu de ndzemba ahorow a osisi no, se biribiara roko do pepeper na ohaw biara mmba mu a, yennhu adze foror biara. Ihu de biribi si a nna abepem dadaw no a owɔ ho no; nna aperdzi bi aba kesi de kor bu fa ne nyenko do. Aperdzi ma dza osi no ma mbre ndzemba roko no tum sesa. Yemfa no de, obaa bi na no kun tse ho fefefew, na wokor haban mu, na owɔ aka banyin no, na ndzemba ahye ase resesa wo obaa no n'abrabo mu. Opeer no kun no nkwa kesii de owu maa obaa no beyee okunafo. Kunaye no mu nna yehun no suban – de ebia, Mfantse/Akan kunaye mu nyehyee na basia no ne gyedzi wo nde mber yi mu nyamesom mu nyehyee ho no ma obaa no da suban ahorow bi edzi a oma nkorɔfo nye no nnye adwen. Ndzemba ahorow bi tse dem na odzi akotsen ma dza odwumfo no repe atwe etsiefo anaa akenkanfo hon adwen ako do no dzi mu. Iyinom do na etsiefo no gyina tsie, na wohu ndzemba na adwen tsitsir pii no yie. Iyinom ntsi na pii kyere kasadwin ase de nye abrabo no. De mbre nyimpa biara bo bra na ohya akwambew wo mu na obo mbodzen de oboko ako n'enyim aber biara no, dem ara nna kasadwin so da no edzi.

Aperper anaa akaasi ye adze tsitsir kor a owɔ de yehwe no yie. Akaasi anaa aperper mmpa abrabo biara mu da. Mpanyin se, tsir nntsewee a yenngyaa kyew soa. Akaasi gu ahorow ebien:

- a. Dza owɔ nyimpa mu: Iyi mu no, nyimpa no nye n'ankasa no mu si akaa anaa de onye noho dzi aperper. De ebi a, obi tum ko tsebea bi mu na onntum nntse noho ase koraa, asem bi ato no, nye no hwee a onnye yie. Iyi ma otum bisa noho de: “Na monkotsee dze, eben asem a?”
- b. Dza owɔ nyimpa na ndzemba a etwa noho ehyia ho: Iyi mu no, yehu nyimpa de, onye ndzemba a etwa noho ehyia no dzi aperper. De ebi a,
 - i. Nyimpa bi na ne mfefo
 - ii. Nyimpa bi na asetsena mu atoyerenkyem, de ebi a, nsuyirii, gyahyehyew, asaasewosow, yardom, po na nyimpa na pii a okeka ho. Mfatoho: po na nyimpa a wowo Keta wo Firaw Mantow mu akaasi a oda hon ntamu; po no rutu nyimpa no, nyimpa no so repe kwan a wobefa do a wodze besiw po no ano de mbre obeye a, orunntum mmbotu hon.
 - iii. Ankorankor bi na no Bɔfo ntamu akaasi: (obi tum ka de, eben asem a? Ana monko me Nyame ammbɔ me yie?) iv. Afei akaasi a oda nyimpakwuw anaa aman ebien bi so ntamu de ebi a, Amereka na Iraq, Israel na Palistine. Oto da bi a yetaa hu akaasi a obo wo che

(boundary) ho. Asaase kakraba bi a ɔda nyimpa beenu bi ntamu a wotum twe ho manso dzedzenndzen.

3.2 Amansuon Adze/Ɔwɔ owura

Adze kor a yesan hu wɔ kasadwin ho nye de, ɔnnɛ nyimpa baakofo bi na ne dze a, ne tsitsir dza ɔyɛ ano kasadwin no. Ɔyɛ obiara ne dze a. Obiara tum fa dze yɛ edwuma de mbɛ ɔpɛ a obiara runntum mmbisa no ho hwee. Dza ɔyɛ akyerew kasadwin no dze, se obi fa mu biribi dze yɛ edwuma a, ɔwɔ de otum da no edzi kyere de ɔfaa osimesi anaa ɔbentsen no dwumadzi no mu fa bi na ɔdze yɛɛ ne dze. Se obi dzi dwuma bi a ɔtse dem na ɔannkyere faakor a ɔfaa ne nsem anaa nyimdzeɛ no fii a nna ɔreyɛ ayɛ enyiamboho, ne dem ntsi otum nya ho asotwe fi nyia owiaa no dwumadzi no ho. Iyi ntsi yese, kasadwin wɔ owura. Ano dze no yɛ amasuon egyapadze na akyerew kasadwin no so yɛ ankorankor dze.

3.3 Ntseasenta/Adwennta

Kasadwin no su kor so nye adwennta. Adwennta kyere de, kasadwin da adwen a ɔbor kor edzi. Obi botum akyerɛ kasa bi a kasadwin bi dze to gua mu wɔ akwan ahorow pii mu wɔ abraɔ mu a ne nyina to aso mu. Iyi ntsi yenntum nnkyere anaa mma mbuae pɔkyee (potsee) anaa nkyereasee potsee bi wɔ kasadwin bi mu, na yemmbɛ ho wɔ ne ntseasee mu, mpo ber a obi akyerɛ adwen fofor bi wɔ ho no.

Nkyerekyeremu anaa ntseasee a yɛdze ma anaa yenya wɔ dwumadzi bi mu no taa gyina beebi a nyimpa bi fi, ne nyimdzeɛ, no suahu na mbɛ ne tsipen so edu. Mfatoho; Ɔɔ na owu dem yi, ɔsor mbɛ obiara tse ɔɔ ase fa, na ɔsor mbɛ obiara tse owu ase fa – binom se ɔɔ yɛ owu, ɔɔ yɛ nkwaseasem, obi so se ɔɔ yɛ few na dza ɔkeka ho. Se yehwe owu so a, binom se owu yɛ ewi, binom so se owu yɛ mfasodze ma nyimpa, obi so se owu yɛ otsiodzenfo na dza ɔkeka ho. Iyinom mu biara gyina ankorankor bi no suahu, ne ntseasee, gyedzi na dza obi ehu no wɔ abraɔ mu ho.

3.4 Kwetsikwan

Kasadwin no su kor so nye de ɔye kwetsikwan kasa bi a otum ma obi nya kwan dzi dwuma bi a onnya amandze biara. Bio so, kwetsikwan kasa yi siw asefem nsem ano. Se yekasa a yebo mbodzen de yemma asefemsem biara mmba hen kasaa mu na obi mmbu hen enyimtsia. Iyi ntsi se yerekasa a, yedze kasa bi a ɔmaaman anaa ɔmemen kasa penpen dzi dwuma; de mbre obeye a onyia a onnyi de obetse ase no anntse ase. De ebi a kasa bi a ɔye edwaman kasa anaa no ho nntsew no, yedze wura amaaman anaa kwetsikwan kasa mu ka no kama ma no ho tsew.

Asem bi so wo ho a, obi ka a ɔdze asem bre dem nyimpa no de ebi a, George Orwell no buukuu *Animal Farm* dem yi, ɔwo de yegyina amaaman kasa bi do de mbre ɔkyerewfo no gyinaa mbowa do daa no suahu edzi no, ɔmmbo nyimpa biara dzin naaso nna ɔrepe akyere suban bi a nyimpa bi da no edzi a ɔnnye suban pa.

Mbubudo

Yeehu de, kasadwin wo su ahorow pii a ɔma ɔda nsew fi kasa dwumadzi ahorow ho. Dem su yi bi nye de akaasi wo mu, ɔwo owura, onnyi nkyerease kor na wofa kwetsikwan do na wodze to gua.

Sɔ Wo Ho Hwe

1. Kyerekyerɛ dza odzidzi do yi mu de mbre yehu no wo kasadwin no su mu:
 - a) Kwetsikwan
 - b) Akaasi/aperdzi
 - c) Ntseasenta
2. Kyere siantsir a woka de ano kasadwin ye amansuon egyapadze?

Tsir 4: KASADWIN NO SU BI (ntoado)

Nyienyim:

Tsir ebiasa no mu no, yehwɛɛ kasadwin no su ahorow. Yehun dɛ, kasadwin yɛ kasadwumadzi a no mu dɔ, ɔwɔ nkyerɛaseenta, aperdzi wɔ mu na wonam kwetsikwan do na wodze to gua. Dem tsir yi mu no, yebɔsɔw do. Yɛbɔhwɛ ndzɛmba ahorow bi a ɔma kasadwin yɛ soronko fi akyerɛw afofor ho aka dza yɛaka ho asem dada no ho. Ma yɛnkɔ do

Botae:

Tsir yi mu adzesua nkɔ ewiei no, nna itum yɛ

1. mpensapensamu fa dza odzidzi do yi mu
 - a. Kasa
 - b. Plot
 - c. Ndze/tsebea
 - d. Sibeaber
 - e. Okasafo

4.1. Kasa

Kasadwin ne dzin noara ma yehu de kasa ye adze a ohia papaapa wo kasadwin mu. Kasa ye kwan a nyimpa fa do dzi nkitaho de yem kasa, akyerew anaa oyekeyere do. Wonam kasa do kye adwen, atsenka, nsem na pii a okeka ho. Ndzemba a wodze hyehye kasa mu no bi so ye nsenkyeredze, ngyegyee na adze. Iyi ntsi, kasadwin biara no wokyerew anaa woye no wo kasa potsee bi mu osiande kasadwin no botae kese kor nye de odze nyimdzee bi boto gua ma afofor enya ho kyefa. Ehwe a ihu de, se obi pe de okenkan buukuu bi a, ofa kasa a otse ase no ho buukuu na okenkaan no wo mu de mbre obeye a obetse ase yie. Se kasa bi keye akwansiwdze a, onnye adze a ntsease bowie per ye. Mpen pii no, kadwumfo dze kasa ahorow hyehye hon dwumadzi mu dze kyere agofomba no hon su, ber na bea a woyee dwumadzi no, botae na mpo ndze anaa tsebea a okyerewfo no wo mu. Se ekenkan *Twer Nyame* buukuu no a, Kobena Gyate Akwa ma agofomba bi tse de Kopor na Abongo ka Mfantse bi a no mu nntsew dze kyere beebi a wofi na edwuma a woye. Iyi ma akenkanfo hu de Kobena Gyate Akwa ne man a oboo wo *Twer Nyame* mu no ye oman a amamforafo wo mu. Kasa ho hia papaapa osiande oboa ma kasadwin no mu ntseasee dzi mu.

4.2. Plot

Kasadwin no plot nye kwan a kasadwumfo fa do hyehye nsem a osisi wo no dwumadzi mu. Se yerutwa no tsiabaa a nkye yebeka de plot nye nsem a osisi wo kasadwin bi mu. Kasadwin biara wo plot. Ano kasadwin wo ne dze na akyerew kasadwin so wo ne dze. Se yefa akyerew kasadwin bi tse de abasem/ayesem anaa ahwegor a, oda nhyehyee potsee bi mu. Ndzemba a oda edzi wo plot yi mu nye:

- **Ahyese:** Ha na abasem anaa ahwegor no mu nsem no hye ase. Ha so na kasadwumfo no da n'agofomba no edzi na okyere ber na bea a dwumadzi no kor do kyere n'akenkanfo/n'hwefo.
- **Aperaper/aperdzi:** De mbre otse wo abrabo mu no, abasem no mu aperdzi nye ohaw anaa nsem a osisi otsiban n'akwan mu wo abasem no mu a, otsiban no nye dem nsem no dzi esi. Plot no mu no, yetaa hu aperdzi ahorow ebien. Aperdzi kese a onye agofomba no dzi esi na aperdzi kumaa a owo de agofomba no tum dzi do amma aambeye akwansiwdze amma hon.

- **Sorko:** Iyi nye ndzamba a osisi wɔ abasem/ahwɛgor no mu a ɔma nhyehyɛɛ no fow du no mponpon do. Ha no, agofomba no, nkankan otsiban no dzi nkonyim wɔ n'aperaper nkumaa no do ma, na iyi na ɔma plot no kɔ n'enyim. Siantsir tsitsir a akyerɛwfo dze sorko dzi dwuma nye de ɔma ndzamba mu ye twann anaa dzendzenndzen a akenkanfo/bɔhwɛadzefo mpo nntum nnhu dza obesi ewiei. Dem sorko yi na ɔfow kɔ nhyehyɛɛ no mponpondo no.
- **Mponpondo:** Kasadwin no mponpondo no nye aber a ndzamba nyinara abɔ apee do ma agofomba no enya adagyɛr nye aperdzi no ridzi esi de mbre ɔbeyɛ a wobotum edzi do nkonyim. Ha no nye dwumadzi no no 'nkɔn mu' a nsem a osisi wɔ sorko no mu no nyinara behyia. Se epe de ihu kasadwin bi no mponpondo a, gyede ehwehwe kasadwin no ne beebi a ɔkyere de otsiban na agofomba nkaa no bedzi nkonyim anaa wobedzi nkogu wɔ kasadwin dwumadzi no n'ewiei.
- **Famuko:** Ha na ndzamba mu siansian; ndzamba a ɔbobɔɔ apɔw wɔ sorko no mu boguu mponpondo ho no nyinara no mu siansian ma yehu dza obesi wɔ ewiei no mu. Ha na kasadwumfo no so miamia ndzamba mu na wɔkyere siantsir a ndzamba bi sisii de mbre ɔtse wɔ dwumadzi no mu. Ha no dze, nna dwumadzi no reba ewiei ara nye no.
- **Ewiei:** Ha na dwumadzi no nyinara ba ewiei ma abasem anaa agor no si. Ha na wosiesie ntawantawa ahorow a ɔkor do ma yehu biribiara no poma-siber. Obotum aba de dza obesi ewiei no nnye dza ɔwo rohwehwe de ɔbesi dze. Obotum mpo aba de ewiei no, otsiban no bowu anaa biribi fofor besi.

Se ekenkan nwoma bi tse de ɔbra wɔɔ bo bo, Mbo na ye na adze a, ebetse dza yereka yi ase yie. Obi bebisa de awensem so wɔ plot? Nyew! Mbom, awensem no plot no nnwar pii naaso nsem sisi wɔ awensem mu. Kenkan Kobena Gyate Akwa, Archie Winful na Peter A. Hope & Johnson K. Tekyinom hon awensem ahorow no na tse dza yereka yi ase yie. Ibohu de nsem risisi dem awensem yi mu. ɔwo mu de no mu nsem no nnwodar dze.

4.3. Tsebea

Tsebea a ɔwɔ kasadwin dwumadzi bi no mu no nye atsenka a akenkanfo anaa ahwefo nya fi mu no. Ndze, kasafua, kasasu ahorow na nsenkuw a wɔdze hyehye dwumadzi no mu no na ɔkyere tsebea a bohweadzefo anaa akenkanfo benya. Ntsi se ekenkan anaa ehwe kasadwin edwuma bi na ebo hu, inya enyigye, inya suro, awerehow anaa eko tsebea bi mu ma oka w'atsenka a, ɔno nye tsebea no. Obotum aba de, abasem bi no mu tsebea a odzi akotsen wo mu no ye enyigye tsebea naaso ofi ber to ber no tsebea no botum asesa nkakrankakra ɔnam dza kasadwumfo no pe de ɔdze to gua no ntsi. Ndze a kasadwumfo no dze bedzi dwuma no so kyere tsebea a ɔwɔ mu. Tsebea no tum ye atsenka ahorow a edzi afora. Tsebea no ye kwan kor a kasadwumfo fa do dze kyere atsenka a ɔpe de bohweadzefo anaa akenkanfo nya fa kasadwin no no mu nsem ho. Kenkan awensem a odzi do yi:

Nkye minnyim, ɔdo, nkye minnyim,

Nkye minnyim de wiadze ye few dem

Ɔepem aber a muhun w'enyim

Daguaa na ahomkasem, Muhum

de sor few epue m'enyim,

Ɔnam 'wo ntsi, ɔdo, nkye minnyim.

(Nkye minnyim...Kobena Gyate Akwa)

Eben atsenka na inya fi awensem yi mu? Atsenka a inya no nye tsebea no!

4.4. Sibeaber

Sibeaber nye ber na beebi a kasadwin dwumadzi bi ko do. Sibeaber no nye kasadwin edwuma bi ne farbaa. Mfatoho, *Duase* nye beebi a D.E.K. Krampah hyehyee n'abasem *Ɔbra wɔto bo bo*, naaso, ɔkyere mbea afofor bi tse de Gyamatado, Swedru na adze wo mu. Hye no nsew de, kasadwin a ɔwowar no taa wo sibeaber ahorow. Sibeaber no ho hia osiande ɔboa kasadwumfo no ma ɔdze no botae, plot, agofomba na nsentsitsir ahorow to gua to gua.

4.5. Ɔkasafɔ

Okasafo no nye nyimpa a ɔdze kodzi anaa asem no to gua no. Kasadwin biara wɔ okasafo, mpo se okasafo no annda noho edzi wɔ abasem/ahwegor no mu. Se ekenkan dawurbo krataa bi a, ɔye nsenkyerewnyi no n'asedze de oka dza esi wɔ krataa no mu no kyerew. Iyi na ɔma nsenkyerewnyi no bedan okasafo. Osiande oka nsem a n'enyi tua ho dze kyerew ma inya ntseasee wɔ dza erekenkan no ho. Demara so na okasafo a okasa wɔ awensem mu anaa buukuu bi mu tse. Okasafo no na ɔma okenkanfo/etsiefo no tse plot no ase. Ɔye n'asedze de ɔbema nkyerekyeremu, nkyereasee na ɔada dza ɔroko do wɔ plot no mu no edzi akyere ahwefo/etsiefo. Hwe mfatoho wɔ ha: Okasafo a ɔwɔ *Ɔbra wɔtɔ bo bo* mu no kyerekyerɛ ma akenkanfo hu de;

.....Amponsa ye obi a otuw kakra. Ne siantsir nye de ofi sika mu. Noho so kwaw. ɔwar, noho ye dzen, na ɔbo mbɔdzen so wɔ adzesua mu kakra.....

Krampah fa okasafo a odzi kan do kyere akenkanfo mbre Kofi Amponsa no suban tse. Iyi boa ma akenkanfo nya adwen bi fa Kofi ne nyimpaban ho.

Mbubudo

Tsere, tsir yi mu so, yeapensapensa ndzemba bi a kasadwumfo biara nnkotum ekwetsir wɔ ne kasadwin nhyehyee mu. Dem ndzemba yi bi nye kasa, sibeaber, plot, tsebea na okasafo. Dem ndzemba yi nyinara no ho hia ama kasadwin no eedzi mu. Se erekenkan kasadwin bi a, hye dem ndzemba yi nsew.

Dwumadzi

1. Pensapensa dza odzidzi do yi mu de mbre ɔda edzi wɔ kasadwin mu.
 - a. Kasa
 - b. Okasafo
 - c. Plot
 - d. sibeaber
 - e. Tsebea

TSIR 5:

KASADWIN AHOROW

Nyienyim:

Yema wo akɔaba ba tsir a ɔtɔdo enum yi mu. Dem tsir yi mu no, yerobɔhwɛ kasadwin ahorow no so. Sorbi/nsonsonɛɛ a ɔda hɔn ntamu nye de wɔdze ano yɛ anokasadwin na wɔdze akyerɛw so yɛ akyerɛw kasadwin. Ano kasadwin na akyerɛw kasadwin nyinara yɛ kasadwin a hɔn nyinara nam kasa nhyehyɛɛ soronko do na opegya wiadze asetsena na abrabɔ mu ndzeyɛɛ na ndzɛmba ahorow dze to gua ma afofor hu.

Botae

Adzesua no bɔko ewiei no;

1. Ɔwɔ de itum kyere dza odzidzi do yi nyinara mu pefee:
 - a. ano kasadwin
 - b. akyerɛw kasadwin
2. Ibotum so akyerɛ sorbi a, ɔda ano na akyerɛw kasadwin ntamu.

Afei kenkan dza odzidzi do yi...

5.1 Ano Kasadwin

Ano kasadwin ho odwumfo nam akakyere kwan do na odze n'edwin biara a odze kasa dzi no ma afofor anaa odze gya nkyirmba. Ono nye de, ano kasadwin ye kasadwin a, ofi tsetseber do a, nna nwomasua na akyerew nnyi ho no. Ne dem ntsi, nna wodze hon ano na hon nyimpadua keka, yeye ndzembra ahorow bi wo ber a ofata mu ma afofor tse na wosua. Se obi tsie anansesem bi dem a, otum gyina do hyehye no so ne dze tow ma afofor so tsie no. Iyi kyere de ano kasadwin biara nam yekyerere (performance) bi do ma opue gua do. Iyi da ano kasadwin edzi de ye yema-monhwe adze.

Oyefo no na etsiefo nyinara dzi akotsen wo ano kasadwin nyee no mu ma odzi mu.

Bio, ansaana oyefo bi dze ano kasadwin bi boto gua no, nna ye ber pokyee/potsee bi mu a ndzeyee bi roko do. Otaa ye ndzeyee bi a oko do na oma ano kasadwin ho yekyerere so tum ba mu. Ebi a nyimpa bi robo nkombo dem yi a, wotum bubu be wo hon nkombodzi no mu. Se oba no dem a, hon mu biara a obu be no ye oyefo na hon a woritsie no so ye n'etsiefo. Worogor basiaba bi bra so dem a, mbaa hyehye brandwom na wotow dze hur dwumadzi no. Odu enyamesom mu tse de akom so dem a, asomfo no hyehye akomfondwom na wotow dze kenyan osom no. Se abodomaba bi mpo na orusu haw ne maame a, ena no tum hyehye abagyegye ndwom bi, na otow dze defedefew abofra no ma ogyaa su. Ber a odehye bi abo fa no, mpanyimfo tum hyehye mpaa dze gu nsa. Akwantu bi mpo na obi roko mu a, wotum dze nsagu gya no kwan a odzi mu. Nse ehu de ano kasadwin ne nyehyee nye no ndzeyee ahorow dzi Okannyi biara n'asetsena mu nyehyee ahorow no mu akotsen papaapa? Ofi n'awo mu kesi no wu mu, ndzeyee biara mu no, kasa dwumfo wo ho ano kasadwin a hyehye dze kron dwumadzi no.

Enyigyesem fofor bi so wo ano kasadwin ne nyehyee nye ne nyee no ho. Ono nye de, ano kasadwin biara a odwumfo bi behyehye no, otum ba de dza ebi a, atse efi oyefo bi ho no nnye adze kor ara da. Sorbi binom beda ntamu. Ebi a, anansesem kor bi yenya ne seso ahorow pii. Mbre otse nye de ano kasadwin ahorow no wowo ho ma obiara. Mbom, ber biara a oyefo bi dze no mu biara ridzi dwuma no, otum ye soronko fi dadaw biara a obi dze ato gua pen no ho.

5.2 Akyerew Kasadwin

Kwan bi do no, yehu de akyerew kasadwin no dwumadzi nntse de ano kasadwin dze no. Akyerew kasadwin dze, onye nde yi skuul na nwomasua nam. Ono nye de, kasadwumfo bi ko skuul na ohyehye kasadwin a otum dze wura akyerew mu anaa otsintsim gu nkrataa mu na ne dzin beda do. Iyi ma yenya akyerew kasadwin dze pue gua do afebo. Akyerew kasadwin dwumadzi kwan yi ma nkyirma nyinara dze bue hon adwen mu. Onnhia de obi kehya odwumfo no na okenkan ma otsie. Iyi ntsi akyerew kasadwin dwumadzi nntaa nngyina enyim-na-enyim nyee do. Dem ara so na akyerew kasadwin dwumadzi nnyi oyefo. Mbom odwumfo anaa okyerewfo no dze nwoma no ye n'egyapadze afebo. Adze kor bi a wo de yehye no nsew nye de, akyerew kasadwin ahorow no bi tse de ahwgor dze, oyekyer dwumadzi kwan tsitsir na onam do ma no mu ntseasee na enyigye tum wie peye.

Afei, oda edzi de nwomasua na akyerew ho nyimdzee aboa ama akyerewfo pii aboaboa ano kasadwin ahorow pii ano akyerew egu mbuukuu mu. Iyi nnkyere de se woye dem a na adan abeye akyerew kasadwin na mbom woye dem dze bo kasadwin ho ban amma aannyew. Dem kwan yi boa ma nde obi tum nya Mbagyegye ndwom, Asafondwom, Ayan na pii a okeka ho kenkan.

5.3 Sorbi/Nsonsonnee a oda Ano Kasadwin na Akyerew kasadwin ntamu

1. Ano kasadwin wonnkyerew naaso akyerew kasadwin dze wo okyerewfo pokyee/potsee.
2. Ano kasadwin nnyi owura pokyee/potsee biara; oye amansuon nyinara hon egyapadze ntsi obiara tum dze dzi dwuma biara a ope naaso akyerew kasadwin dze, wo owura potsee. Iyi ntsi se obi fa akyerew kasadwin mu nsem bi dze dzi no dwuma bi na wamma annda edzi de oafa osimesi anaa obentsen no nwoma mu biribi dze edzi no dwuma a, okyerewfo no wo ho kwan de ofre onyia a owiaa no dwumadzi no wo mbra enyim ma obeyi ano.
3. Ano kasadwin nnyi ber potsee a wodze bobo adze anaa wodze bae naaso akyerew kasadwin wo ber potsee a wodze pue gua do.
4. Anokasa na oyekyer na wodze dzi ano kasadwin ho dwuma kese naaso akyerew kasadwin dze wakerew egu nwoma mu ntsi wokenkan.
5. Ntsetsee potsee biara nnyi ho mma ano kasadwin naaso akyerew kasadwin dze se obi annko skuul ennkosua anaa annkegye ntsetsee wo ho a, onnkotum aye.
6. Ano kasadwin no mu nsem tum sesa ofi mber to mber naaso akyerew kasadwin dze no mu nsem no nnsesa osiande woetsintsim egu nkrataa do ntsi.

7. Ano kasadwin no nkor bata no bi nye anansesem, nyankosem/ɔdomankomasem, abakosem, ebisaa na abɔme, be, kasa mbirenyi na pii a ɔkeka ho. Mfantse akyerew kasadwin mbuukuu no bi nye: *Mbofra mfa adwen* (D.E.K.Krampah), *Ɔbra wɔtɔ bo bɔ* (D.E.K.Krampah), *Aso awar nye yi*, *Twer Nyame*, *Ao m'akoma mu* (Kɔbena Gyate Akwa), *Nana Bosompo dze hen esie* (E. K. Egyim), *Egya ye sunsum* (S. K. Coleman), *Ewudzifo nhyiamu* (S.K.Otoo), *Urahyema nap o henbabaa no* (Charity Bentsi-Enchill), *Akan awensem* (Archie Winful), *Mber pa beba ampa* (Peter A. Hope na Johnson K. Tekyi). Pe mbuukuu ahorow yi na kenkan.

Mbubudo

Yeesua de, kasadwin gu etsitsir ahorow ebien. Iyi nye anomu kasadwin na akyerew kasadwin. Yeahwe kasadwin ahorow yi mu biara n'adzeban no su, no nkor bata na mfatoho ahorow. Yeasan so ehu de, ndzamba a ɔma anomu kasadwin ye soronko fi akyerew kasadwin ho no mu bi. Afei, yiyi nsembisa a ɔka do yi ana na fa fua wo ntseasee do.

Sɔ Wo Ho Hwe Dwumadzi

Yiyi nsembisa a ɔka do yi nyinara ano.

1. Kasadwin gu ahorow ahen? Kyere n'ahorowgu no.
2. Eɛn adze nye ano kasadwin? Kyerekyere mu yie.
3. Kyere ndzamba ebiasa a ɔma ano kasadwin ye soronko fi akyerew kasadwin ntamu.

TSIR 6: KASADWUMFO

Nyienyim

Yema wo akɔaba ba tsir a ɔto do esia yi mu. Se yeka kasadwumfo a nna yerepe akyere obi a otum dze nkasafua, nsempruw, nsemfua, nsentɔw na kasasu ahorow sesa mu anaa ɔhyehye ma ɔye few, ɔye dew wo aso mu na ntseasee so wo mu. Yewo hon a wodze su, mbensuonfo anaa ntahrafo, akyerema nye hon a wɔkeka ho nyina. Dem nkorɔfo a yɛabobo hon dzin yi nyina wo dwuma son a wodzi wo ɔdasanyi n'abrabo mu ofi n'awoo mu kesi no wu mu. ɔdasanyi n'awoo mu, ohia kasadwimfo ma ɔto abofra no dzin. Abofra no etutu do edu ne mpanyim mfe do no, wɔgor no bra, ha yi so kasadwumfo wo dza ɔye ma wodze gor brafo no. Se odu ahemfie dwumadzi so dze a, ɔno yennka koraa, ofi ɔkyeame do, dze ko asen anaa abrafo a wohuhuor ɔhen na akyerema do, hon nyina ye kasadwumfo edwuma. Onyimpa wu so a, wɔnam nsui do kyere yawdzi nye awerehow a owufo no dze abre hon a oegya hon ekyir no nyina.

Botae

Tsir yi nko ewiei no, ibotum

1. akyere dza wofre no kasadwumfo wo ano kasadwin mu.
2. Afei kasadwumfo ahorow a odzidzi do yi so, ibotum akyere hon mu biara na no dwumadzi so:
 - a. nyia odze kasadwin no aye n'edwuma
 - b. nyia odze kasadwin no nenam
 - c. oto da bi dwimfo
3. Ibotum so akyere akatua anaa ndzinoa a owo ano kasadwin mu so

Afei ma yenkenkan dza odzidzi do yi...

6.1 Kasa Dwumfo mu Ahorow

De mbre yeehu akwan ahorow a wofa do dze kasa dzi edwin fa nyimpa n'abrabo su ahorow ho no, demara na yebanya kasa dwumfo no ndwuma a oye no so ahorow. Se yehwe dza yeedzi kan ehu yi a, oreye aye de ndwuma a wodze kasa dzi no nyina nnye per; ne dem ntsi yebotum enya dwumadzi no ahorow. Oye ara de yehwe nyimpa ahorow so a wotum dzi dem dwuma ahorow no. Hom mma yenhwe mbre kasadwumfo no mu ahorow beye ber a yegyina ndwuma ahorow a wodze kasa dzi no do. Yedze hen enyi hwe mu a, yeboku de yewo edwumfo no bi wo ho a wodze kasadwin no ye hon edwuma ankasa. Afei yewo hon so a wonenam a woka anaa woye kasadwin kakra dze pe biribi kakra gu hon kotoku mu. Bio, yewo hon so a ber bi wo ho a nna yehu hon a wonenam na woka; Dem nkorofu no gyede nda bi aso anaa ber bi aso na woedzi hon dwuma no. Se obo no akyerew kasadwumfo a, hon dze, aber biara wotum kyerew osiande hon akenkanfo no wo ho aber biara.

6.1.1 Odwumfo a odze Kasadwin no ye N'edwuma Ankasa

Se yehwe ndwuma ahorow a wodze kasadwin dzi no mu a dza woye wo ahemfie no nyina, orohwehwe aye de tsetse mber no mu no, nna dem nkorofu no dze ye hon edwuma tsitsir. Nde mber yi, akyeame hon dwumadzi no dze, megye dzi de ahemfo akese no da ho dze hon mu a, wonngyaa hon ma wonnkeye edwuma fofor biara nnka ho. Se ono fi ho a, nde yi nnye na koraa wo adwontow mu. Mberantse na nkataasia pii afa adwontow na wodze aye edwuma tsitsir a woye. Dem adwontofo bi nye Nana Ampadu, Amakye Dede, Paapa Yankson, A. B. Crentsil, Kabobo na

pii wɔkeka ho a wɔbɔ 'highlife' ndwom nye abaefor *highlife* adwontofo bi so tse de Stoneboy, Sarkodie, Kofi Kenata nye hɔn a wɔkeka ho pii. Binom so nntow adwom no bi na mbom hɔn dze nye de wɔbekyerew kasadwin no dze ama binom a hɔn ndze ye dew ma wɔaatow. Dem nkorɔfo no bi nye Bullet. Bullet kyerew ndwom dze maa Ewuraba bi a nna wɔfre no Ebony a ɔaka beebi no, na owui ekyir no, ɔkyerew ndwom no ma Ewuraba Wendy Shay. Bio, obi tse de Kwame Eugene so tum kyerew ndwom na ɔtow n'adze na ɔsan so kyerew bi dze ma Mz Vee so. Agyekum (2013:52) kyere de nkan no nna yewɔ ndwontofo a wɔwɔwɔ ahemfie tse de Asante, Somali, Afrika Etsifi apaa mu aman no bi mu Ahemfie a wɔtow ndwom.

6.1.2 Edwumfo a Wɔnenamee

Edwumfo iyinom ye hɔn a ebi a wonyaa hɔn ntsetsee fii hɔn egyanom anaa hɔn nanom nkyen. Yekyerɛ de ebi a wɔdze woo hɔn anaa de wosuaa fii binom nkyen a wɔnenam ye kasadwin dze pe kakra gu hɔn kotoku mu. Dem nyimpa yinom tum ye nkorɔfo a wɔye hɔn edwuma bi dada na mbom osiande wonyim dem kasadwin no ntsi ber bi du na n'edwuma a ɔreyɛ no kɔ famu kakra a, nna ɔafa kasadwin no so dze afa mu kakra. Dem nkorɔfo yi bi nye Egya Koo Nimo a nna ɔye edwuma wɔ Kwame Nkrumah Esuapon no mu no. Bio yetaa hu dem nkorɔfo yi bi wɔ eyiadze pii. Odu Memenda na Kwesida a wɔkɔ eyiadze kɔtonton anaa kɔwen nsem dze kyekye ɔmanfo na nkorɔfo a wɔreka mbɔn no hɔn werɛ, na ofi Dwowda rokɔ no, nna wɔkɔ hɔn ndwuma mu. Obi tse de Nana Agyei Sikapa a ɔwɔ Peace FM redio do no, nna ɔtaa ye papaapa.

6.1.3 Ɔtɔfabi Edwumfo

Iyinom ye nkorɔfo a hɔn dwumadzi ankasa nnye dza daa daa wohu hɔn no bi a. Iyinom ye nkorɔfo a gyede hɔn dwumadzi no edu ho ana wɔafre hɔn, ntsi yɛfre hɔn *ɔtɔfabi edwumfo*. Dza yetaa hu no nde mber yi nye hɔn a wɔakwadar nsui mu a wosu wɔ eyiadze no. Binom so wɔ ho a wɔye adze papaapa wɔ adwontow mu a se odu de obi roto pon anaa ɔroto ne ba dzin anaa wɔregye awar a wɔto nsa fre dem nkorɔfo no ma wɔba ase begyegye ɔmanfo enyi. Eyiadze tsitsir na yetaa hu dem nkorɔfo yi papaapa. Hɔn a wosu no da nkyen a, yewɔ binom so wɔ ho a, hɔn dze nye de, ebohwe no nna wɔdze atenteben; ɔbaako reka awensem no, nna ɔno so dze atenteben no regyegye ho. Nyia ɔreka awensem no nye nyia ɔrehen atenteben no nyina ye kasadwumfo. Nnye nyimpa nyina na wotum keka nsem bobɔ mu wen ma ɔye dew a nkorɔfo enyi gye ho. Ntsi se etse de obi so gyina bagua mu na oriyiyi nsawa a nkorɔfo ho kyere a nna ɔye kasadwumfo. Dem nkorɔfo yi nyina, se ahwe a, eyi mmbae a, innhu hɔn papa; gye de eyi aba.

Obi beka de, nsui, adwontow, nsawabo na pii a okeka ho yi dze, nse yennkotum aka de ne nyinara ye kasadwumfo nkotsee hon edwuma. Oye nokwar dze, naaso biribiara ne ye mu no, yewo binom a wawea wo ho. Se onntse dem a, nkye oto da bi na biribi si a wonnkese de wonkefre osimesi anaa obentsen ma ombra. Se obi hye da sua biribi na okwadar adze kor no ne nyee mu a, onntse de obi a onnyim adze no ho hwee. Yewo osu, na yewo nsui. '*Buei, buei, mewu o*', ye osu, na obiara tum su bi; abofra biara mpo tum su bi. Naaso osu a yedze to ana anaa yedze ka mpanyinsem, bo bena, keka nsem no, nnye obiara na obotum aye. Iyi ntsi na odu mber bi a, yeto nsa fre nkorofa a woadwadar ne nyee mu no.

6.2 Kasadwumfo Ne Ndzinoa

Kasadwumfo ne ndzinoa anaa n'akatua gu mu ahorow tse de n'edwuma no ara per. Hon a woye edwuma wo ahemfie no gye hon akatua wo oman no ne Sanaahen ho. Wokyerere de oman no tua hon kaw. Kwan bi do no, wonya asaase dow do nya mu biribi dzi. Yewo binom koraa mpo a, onam hon kasadwin dwumadzi ntsi, ahemfie na wotse. Okpewho (1992:26) kyere a oman no bo honho ban, na afei wowo enyimnyam so wo oman no mu osiande hon na wokasa ma Nana. Yennkotum akasa afa kasadwumfo ho wo aber a yennkekasa afa Ghana Kasadwumfo a odzii kan ho wo Kwame Nkrumah n'aber do. Nna Okyeame Boafo Akufo fi Ekuapem man mu. Nna ono na aber biara se Omampanyin Kwame Nkrumah rebekasa a, odzi n'enyim tonton (moma) no bue kwan ma no ansaana Omampanyin Nkrumah akasa. Dem Okyeame yi fii ho no yenngye ndzi de oman no apaw okyeame biara bio. Dem aber no nna Okyeame Akufo gye n'akatua fi oman no foto mu de mbre Ghana odwumayenyi biara gye n'akatua fi no.

Mbubudo

Tsir yi mu no, yehu de, se yeyi ano kasadwin na akyerew kasadwin fi ho a, kasadwumfo noara a wodze kasadwin no to gua no gu ahorow. Binom nye hon a wodze kasadwin no ye hon edwuma ankasa, edwumfo a wonenamee na otofabi edwumfo. No mu biara a obi ye no, yewo ohaw na mfaso a owo ho.

Sɔ Woho Hwɛ Dwumadzi

Bua nsembisa a odzidzi do yi nyinara:

1. Wɔka kasadwumfo a, ɔno nye woana?
2. Kyerekyere dem nkorɔfo yi hɔn nyimpaban na dwuma awodzi
 - a. Odwumfo a ɔdze kasadwin no ye n'edwuma ankasa
 - b. Edwumfo a wɔnenamee
 - c. Ɔtɔfabi dwumfo
3. Obi a ɔnenam ka awensem no, eben mfaso na onya?
4. Kyere mfaso pɔtsee bi a kasa dwumfo tum nya wɔ no dwumadzi no mu.

KUW 2: AKYEREW KASADWIN

KUW Yi Ne Nhyehyɛ

Tsir 1: Akyerew kasadwin n'adzeban

Tsir 2: Akyerew kasadwin no su

Tsir 3: Akyerew kasadwin ho mfaso

Tsir 4: Ahwɛgor

Tsir 5: Ayɛsem

Tsir 6: Awensem

MBUEIENYI

Yeedzi kan aka de, kasadwin gu ahorow ebien; ano kasadwin na akyerew kasadwin. Ɔfa a yeedu do yi dze, yebosua afa akyerew kasadwin ho. Yebɔhwɛ akyerew kasadwin n'adzeban, no su, noho mfaso na n'ahorowgu. Ma yenko do.....

Kuw Yi No Botae

Kuw yi nnko ewiei no, nna itum:

1. kyerε akyerεw kasadwin ase.
2. kyerε akyerεw kasadwin ho mfaso
3. kyerε akyerεw kasadwin no su ahorow
4. pensapensa ahwεgor mu
5. pensapensa abasem/ayεsem mu
6. pensapensa awensem mu

TSIR 1: AKYERεW KASADWIN

Nyienyim:

Leterekya dzii kan baa no, nna dodow ara (nkankan) Aborofo, dza nna woka nye de, Ebibifo nnyi kasadwin osiande hon dze, nna dza wonyim nyinara nye akyerεw kasadwin. Borofo kasafua ‘literature’ no fi asemfua ‘literate cualture’ mu, a okyerε de, aman a no mu mba tum kenkan na wokyerεw nkotsee na wowo bi. Owɔ mu de Aborofo na wodze akyerεw kasadwin baa dze naaso, nhwehwemu ama ada edzi de, dem asem yi nntse dem. Onnye aman a wotum kyerεw kenkan nkotsee na wowo kasadwin. Obiara wo kasadwin se oye kasa nkotsee na wodze hyehye nsem fa nyimpakuw bi ho dze a, osiande nyimpakuw biara wo noho nsem. Osiande nyimpakuw biara wo kasadwin ntsi na kasadwin gu ahorow ebien no; ano kasadwin na akyerεw kasadwin. Tsir yi mu no, yebɔhwe akyerεw kasadwin n’adzeban.

Botae:

Tsir yi nko ewiei no, nna adzesuanyi tum:

- a. Kyerε akyerεw kasadwin ase yie
- b. Kyerε botae a wogyina do dze hyehye akyerεw kasadwin

1.1.Akyerew kasadwin n'adzeban

Yereka akyerew kasadwin a, ɔye nsem a obi dze n'adwen, ne nyansae na ne nyimdzee akyerew a ɔka nyimpa n'akoma anaa n'atsenka na ɔye enyika. Dem kasadwin yi tum ye ɔkyerewfo bi n'abrabo mu nsem anaa abotsirmu nsem bi a ɔfa wiadze asetsenamu nsem na nyimpa ne ndzeyee bi tse de ɔdo, ɔtan, akokodur, enyiber, nsisi, edwumaye, enyihaw, asoodzen na adze ho. Otum so fa awar, awoo, owu, eyiye na abrabo mu nsem ahorow pii.

Kasadwin ye abrabo. Iyi ntsi, kasadwin so tum fa ɔman bi na no mu mba ho a obi akyerew no wo buukuu mu. Se woka “English literature” a tserɛ, ogyina ho ma nsem a ɔfa Ngyiresi Aborofo ho a wodze Borofo kasa akyerew. Dem ara na “Akan literature” so ye nsem a wokyerew fa Akanfo hon asetsena, hon abrabo, hon kasaa, hon ndzeyee na hon suban ho wo Akan kasa mu.

1.2.Botae a wogyina do dze hyehye akyerew kasadwin

ɔkyerewfo biara wo botae a ogyina do dzi n'edwin. Ansaana ɔkyerewfo bi bedzi dwuma bi a ɔtse dem no, nna ɔabo biribi enyikam a ɔpe de ɔda no edzi kyere akenkamfo. Odzi kan, akyerewfo gyina nyimpakuw bi hon kusum amambra tse de nkyia, abadzinto, bragor, awargye, ahensi, ahentu, eyiye, afahye na dza ɔkeka ho do na wokyerew hon nsem no.

Bio, wotum gyina nyimpakuw bi hon ndwomtow—abagyegye ndwom, agodzi ndwom, asafo, na edwumaye ndwom, anansesem, nsagu, nsui na adze do kyere nsem no. Akyerewfo no bi so tum gyina nyimpakuw bi hon som do kyere hon nsem. Dem som yi bi nye tsetsesom, nkramosom na kristiansom. Owura J.B Crayner no bukuu “Akweesi Egu Nananom Pɔw” no mu nsem da dem ɔsom yi bi edzi. Se obi so kenkan Owura noara no bukuu *Borbor Kunkumfi* so a, ohu Mfantsefo hon ho abakɔsem pii wo mu. Iyi kyere de akyerewfo gyina nyimpakuw bi hon abakɔsem do kyere hon nsem.

Dza wokyerew fa ho no mu bi nye nyimpakuw bi hon amambra na bambo, hon asetsena mu nsem a ɔfa ɔdo, ɔtan, ayamyie, afotu, akokodur, peseankonya na adze ho. Dza otwa tun nye de, akyerewfo gyina Nyame n'abodze biara do kyere hon nsem. Dem abodze yi bi tum ye wimu nsenkyeredze tse de ewia, bosom, na nworaba, asaase do ndzamba tse de ndua, nsu na mbepow, asaasetsir mu ndzamba tse de fango, denkyerembo, na sikamfutuw. Wotum so gyina po mu

ndzamba, abotan na mbowa ahorow do kyerew ama yeehu ndzamba a etwa hen ho ehyia no ho mfaso na mbre wotse. Se ekenkan S.K. Otoo no buukuu *Ewudzifo Nhyiamu* a, odze mbowa dzi dwuma. Onam mbowa do ma akenkanfo nya nyimdzee fa mbowa ahorow na hon su ho na dza nyimpa dwen fa mbowa hon tsirmupow ho to gua.

Mbubudo

Tsir yi dze ato gua de, akyerew kasadwin ye nyimpakuw bi hon abrabo a kasadwumfo bi nam ne nyimdzee na akyerew do tsintsim. Nsem a wodze hyehye akyerew kasadwin no mu bi ye botsirmuka naaso oye dza onye nokwar se. Akyerewfo fa Nyankopon n'abodze ahorow, widze no mu ndzamba mbowa na nyimpa su ahorow do na wodze hyehye.

Dwumadzi

Bua nsembisa a oka do no nyinara

1. Fa woara wo nkasafua a ofata, na gyina wo ntseasee do kyere akyerew kasadwin ase.
2. Kyerew ndzamba ebiasa a akyerew kasadwumfo gyina do dze kyerew.

TSIR 2: Akyerew kasadwin ho mfaso

Nyienyim: Dza yeedzi kan aka yi ama ehu de kasadwin, de wodze ano ka anaa wokyerew no, wo mfaso pii. Kyerew mfaso ebiasa a edwen de owɔ akyerew kasadwin ho e. Mbo! Tsir yi mu no, yebobobo dwuma ahorow bi a kasadwin dzi do na yeaye ho mpensapensa mu. Ko do kenka!

Botae

Adzesua yi nko ewiei no nna itum:

- kyere akyerew kasadwin no dwumadzi/mfaso ahorow bi

Akyerew kasadwin na nwomasua

Nyimpa pii wo ho, beebi a yetsee akyerew kasadwin nka nye skuul; osiande ho na wodzi akyerew na akenkan dwuma wo ho. Skuul na wodze akenkan sunsum hye nyimpa no mu ma n'enyi begye akenkan ho. Akyerew kasadwin boa nwomasua osiande, oboa ma skuulfo kenkan ndzamba pii dze to hon nyimdzee mu mpon. Bio, se obi tum kenkan na otum yiye nsentsitsir bi fi dza akenkan no mu a, oboa no ma odwen ko ekyir na ohu nyansa dze dwen ndzamba afofor ho dze siw ohaw ahorow

ano. Akyerew kasadwin tse de bura a nkorofu ko mu kafa nyimdzee. Nwoma ahorow a nkorofu akyerew nyinara no nam akwan ahorow do dze nyimdzee ahorow to gua fa wiadze no mu ndzamba ho.

Akyerew kasadwin na abakosem

Abakosem nnkyere tsetsesem nkotsee mbom, okyere sesei na ndamba so. Akyerewfo dze hon dwumadzi wura aber potsee bi mu na aber biara so na no mu nsem. Iyi ntsi, se ekenkan akyerew kasadwin bi a, oma ihu ndzamba a osisi wo mbeambea n amber ahorow mu, na iyi Kenyan wo nyimdzee wo mber ahorow mu ndzamba ho; ommfa ho de dem aber no ye tsetse, nde anaa ndaamba. Mpo, se akyerewfo dze tsetse nsem wura akyerew mu a, obeye nsendaho ma nkyirma. Aber biara no mu nsem nye dem aber no no mu mba nyin ntsi ndzamba a owo dem aber no mu no nntwamu gyede dem aber no no mu mba nnyi ho bio. Akyerew kasadwin boa ma akenkanfo ko hon ekyir kohwe dza esi pen na odze toto nde dze ho dze ye nhyehyee ma daakye. Yebotum atse amambra ase se yehu siantsir a amambra tse de mbre otse a-iyi na akyerew kasadwin ye. Nkasafua ahorow a akyerewfo dze dzi dwuma no tum ma ntseasee fa nsem bi ho, otsentsen hen nyimdzee na ohye hen nkuran ma yeye biribi dze ma mpontu.

Akyerew kasadwin na akyerewfo

Akyerew kasadwumfo nam hon akyerew do da hon tsirmupow edzi. Mbuukuu bi a nkorofu kyerew no twa asetsena mu mfonyin kyere akenkanfo ma wotse abrabo ase yie. Akyerewfo binom nam hon akyerew do kasa tsia amayese, osom ahrow, ndzeyee na nhyehyee ahorow a otosin wo oman bi mu. Se ekenkan kasadwin bi a oma ihu okyerewfo n'adwen wo nsentsitsir a odze to gua ho. Wotum nam hon akyerew do twe adwen si ndzamba ahorow do ma wohwehwe no poma-si-ber. Akyerew kasadwimfo nam hon ndwuma do twe nyimpa n'adwen si abrabo mu ndzamba do na otwe nyimpa ben abrabo ankasa.

Akyerew kasadwin na nyimdzee

Odzi kan, kasadwin bue nyimpa n'adwen enyi ma onya nhumu. Nyimpa nam kasadwin do dze n'adwen susu dza onnyi ho mpo. Iyi ntsi, oma nyimpa dwen ko ekyir na ohu ndemba ahorow a owo wiadze a etwa noho ehyia no. Kasadwin dze nyimpa to wiadze kese bi mu, na oma nyimpa bor, hwehwe ndzamba a owo dem wiadze no mu. Se oba no dem a, yesua ndzamba aforor, yebisa nsem

na yetu hen hen adwen na hen atsenka mu mpon. Yenam dem ye do dwen ko ekyir dze hu nyansa. Bio, se yekankan a, yekenan no yie. Iyi ntsi, oboa ma ndze ndzamba bi toto afofor ho, esese ndzamba, ehwe agofomba no hon suban bi na edwendwen ho siantsir a ndzamba bi sisi. Akenkan no nkotsee mpo boa ma yenya nkasafua afofor dze hyehye hen kasaa na hen akyerew mu. Se ibue buukuu mu, na w'enyi bo nkasafua no do na ekenkan no wo ntseasee mu a, eye a ibisa woho kwan a okyerewfo no faa do hyehye ne nsem ma ntseasee baa mu dem? Nyew, dem kasadwimfo yip ii nam akyerew kasadwin do nyaa dem akyerew ho nyimdzee.

Akyerew kasadwin na afofor hon amambra

Se yekankan na yekankan fa afofor ho a, oma yehu nyimpa ahorow, hon su ahorow, hon gyedzi na hon ndzeyee ahorow. Yenam akenkan do sua iynom dze bon hen bra. Oma yehu mbre nyimpa bi dwen fa na adze. Iyi so boa ma yetum nye nyimpa afofor tsena asomdwee mu osiande yetse hon ase ntsi. Binom mpo nam akenkan do sua afofor hon kasaa ma oye yie. Moboa? Kasa so ye amambra nna woara hwe a.....

Kasadwin na asetsena mu mpontu

Kasadwin biara, de oye awensem, ahwegor anaa abasem no, no botae nye de oboboa nyimpa ma n'asetsena mu etu mpon. Dza kasadwin ye nye de, oma mbua na akwankyere fa asetsena mu mpontu ho nsembisa ahorow ho, oma akwankyere fa ohaw ahorow bi a nyimpa ko mu ho, na oyi suro a ofa hwambo na nkogu ho. Oma nyimpa enyidado de konyimdzi wo ho. Okyere yiea oye de odo tsena nyimpa mu na nyimpa wowaw ne nyenko nyimpa. Yenam kasadwin do sua de, onnye aber biara na sinto muo osiande yenam sinto do dze tsentsen abrabo. Yehia kasadwin dze atoto hen ara hen abrabo ho.

Mbubudo

Akyerew kasadwin ho hia papaapa. Oma nyimpa nya adwen mu onyin na mpontu na oma kwan ma nyimpa dwen ko ekyir nya nyimdzee afofor dze boa siw asetsena mu ohaw ahorow ano.

Dwumadzi

Kyere akwan ebien a akyerew kasadwin fa do nya nsunsuando wo dza odzidzi yi do

1. Nwomasua
2. Abakosem
3. Nyimdzeepɛ
4. Amambra

TSIR 3: Akyerɛw kasadwin no su ahorow

Nyienyim: Yɛahwɛ akyerɛw kasadwin n’adzeban na botae a akyerɛw kasadwumfo gyina do hyehyɛ hɔn dwumadzi. Tsir yi mu no, yɛbohwɛ ndzɛmba a ɔda edzi wɔ akyerɛw kasadwin ho ma ɔma ɔyɛ soronko. Kenkan ɛ.....

Botae

Adzesua yi nko ewiei no, nna itum

- Pensapensa akyerɛw kasadwin no su no mu bi

Akyerɛw kasadwin no su ahorow

Yɛaka dɛ, akyerɛw kasadwin yɛ abotsirmu nsem a nkorɔfo kyerɛw. Wotum dze buukuu no a woetsintsim no gya nkyirmba wɔ aber a no mu nsem no nnsesa. Sɛ yeyi dɛ ɔwɔ botae, sibeaber, plot, ndze/tsebea, aperaper, agofomba a yeedzikan aka ho asem fi hɔ a, no su etsitir bi so na odzidzi do yi.

Odzi kan, osiandɛ ɔyɛ kasadwin a wɔkyerɛw ntsi, ɔwɔ nyimpa potsee a ɔkyerɛw. Otum yɛ nyimpa kor anaa no mboree na wɔkyerɛw. Wɔkyerɛw ntsi, dzin da do. Akyerɛwfo no dze hɔn edzin to do dze kyɛ dɛ buukuu no na no mu nsem nyinara yɛ hɔn dze. Sɛ obi kefa buukuu no no mu nsem

dze hyehye ne dze mu a, ɔwɔ de ɔbo akyerewfo no hon edzin ma obiara hu beebi a asem kor a ɔfae bi fi.

Akyerewfo no san kyere ber a wotsintsiim buukuu no na beebi anaa edwumakuw a wodze buukuu no baa gua do. Woye no dem ama obi pe buukuu no n'ekyir akwan a, woenya bi. Akyerew kasadwin no mu ntseasee no hia mpensaompensamuye ama yeehu de dwuma a ɔkyerewfo no dzii no ye anaa ohia nsesa bi wo ne fa bi.

Akyerew kasadwin dze, ɔbaakofo tum dze gye n'enyi. Nyimpa kor tum kenkan na onya mu ntseasee. Dza ɔkyerewfo no akyerew noara na ɔkenkanfo no kenkan. Mbom, ɔkyerewfo no tum nya ntseasee dodow fi buukuu no mu.

Akyerew kasadwin no mu nsem no bi wo ho a ɔye nokwar turodoo anaa ɔnye nokwar se. Otum so ba no de nsem no bi ye kodzi ara kwa. Akyerewfo noara bo hon agofa mba a edzin a ɔwɔ mu no bi ye atseasefo hon edzin na bi so mmfa ɔdasanyi biara a ɔtse ase anaa ɔatsena wiadze pen ho na mbom, wɔfa dem edzin yi do ma hen esuadze ara. Akyerew kasadwin gu ahorow ebiasa. Iyi nye akyerewtsen/ayesem/abasem, ahwegor/agodzi na awensem. Yebeka iyi mu kor biara ho asem de mbre ɔfata ekyir yi wo dem kuw yi mu. Se obi kenkan buukuu bi a, ohia de ɔhye dza yeakeka yi nyinara nsew.

Mbubudo

Dem tsir yi mu no, dza yeaka nyinara nye de, ndzemba a ɔwɔ de ehye no nsew wo akyerew kasadwin akenkan ho nye:

1. Dzin a ɔkyerewfo no dze ato buutuu no na ɔkyerewfo a ɔkyerɔw dem buukuu no ne dzin.
2. Bea a wotsintsim buukuu no na afe wodze buukuu no puee gua do.
3. Ana ɔyerewfo no abɔ buukuu no mu nsem no tow wo buukuu no mu anaaso ɔakyerew no wo n'ekyir.
4. Buukuu no wo tsir ahen anaa nkyekyemu ahen? Krataafa ahen na ɔwɔ mu.
5. Kasasu anaa kasakwan ben na ɔkyerewfo no dze dzii dwuma wo mu?
6. Botae ben na ɔkyerewfo no gyinaa do kyereew buukuu no?

7. Ana ɔkyerɛwfo no dur no botae ho wɔ buukuu no n'ewiei? Dza nkyɛ epe dɛ ewiei no ye no dɛm na ɔyɛɛ?
8. Esuadze ben na buukuu no wɔ ma akenkanfo.
9. Ana dzin a ɔkyerɛwfo dze ato buukuu no fata?

Dwumadzi

1. Kyerɛw akyerɛw kasadwin no su anan.
2. Fa mfatoho a ɔfata kyere wo nsem mu yie.

TSIR 4: AKYERɛW KASADWIN AHOROW (AHWɛGOR)

Nyienyim:

Ha dze, yebɔhwɛ ahwɛgor n'adzeban. Yebɔhwɛ mbre ɔkyerɛwfo bi si bɔ no wiadze na ɔdze mu nyimpa na ndzɛmba ahorow gu mu dze kyere ndzeyɛɛ ahorow a ɔkɔ do. Yebɔhwɛ ahwɛgor n'adzeban na yɛahwɛ n'ahorowgu na no su. Mbre ɔtse nye dɛ ahwɛgor no su sesa kakra fi mbre yesi kasa daadaa no ho; no su nntse dɛ abasɛm/ayesɛm. Ono so a, ɔnntse dɛ anwensɛm. Ntsi ma yensua!

Botae

Adzesua yi bɔkɔ ewiei no, nna itum kyere:

1. Ahwɛgor n'adzeban
2. Ahwɛgor no su ahorow
3. Ahwɛgor ahorow

Afei yenkenkan ɛ...

4.1. Ahwɛgor Nye ebɛnadze?

Ahwɛgor ye akyerɛw kasadwin ne nkyekyɛmu no mu kor. Ɔye abrabo mu osuahyɛ a wɔahyehye no agor kwan do na wɔnam ɔyɛkyere do da no edzi wɔ agoprana bi do. +

Ndzɛmba etsitsir bi a yehu wɔ ahwɛgor mu bi nye iyinom:

- Abrabɔ mu osuahu
- Agofomba a wodzi agor wɔ ahwɛgor no mu
- Prama anaa beebi a wodzi agor no wɔ. Ha yi botum ayɛ beebi petee a wotum dzi agor wɔ. Mbom so prama tum ba wɔ mbeambea bi tsetse de mbuukuu mu, tɛlɛbihyɛn do na redio mu ma ɔyɛ yie. Ahwɛgor dze, otum kɔ do aber biara wɔ beebiara so.
- Yɛwɔ etsiefo na bɔhwɛadzefo so. Wonnyi hɔ a, wodzi agor no kyere\ woana?

Hen apaa mu Ebibir mu dze, ahwɛgor mbre osi do ara nye yi. Yehu wɔ akwan ahorow pii do, tse de bi a, afahyɛ, dzinto, eguabɔ ase, amandze na amanye ahorow nyina mu. Se mbre ɔtse nye no dze a nna yebotum aka de ahwɛgor mu wɔ mfaso ara yie osiande otum twe dom hyia ka hon bɔ mu ma nkabomu tum ba. Ne sin ara nye de ahwɛgor dze dom boa ano.

4.2 Ahwɛgor no su/bɔbew

Dza yedze dzi kan hyɛ ahwɛgor nsew nye no mu aperper. Agor biara nnyi hɔ a yebeka de wonnsi akaa wɔ mu. Ahwɛgor biara mu wɔ nsemansema na akaasi anaa aperper. Agor no gyina tsitsir ara akaasi na mu aperper no do. Eɛnadze na akaasi anaa aperper no dze ba? Ono nye: atwetann-mbɔgyina / nsemansema - ahodzimu - ewiei.

Se ahwɛgor ribenya nhyehyɛ pa a, nna ogyina ndzɛmba enum bi do. Dem ndzɛmba enum anaa nkyekyemu enum no mu kor biara gyina afa afa ndzidzido ndzidzi do do wɔ ahwɛgor no mu.

Yɛnhwe hon:

- Nyienyim / Nkyerɛkyeremu / beebi potsee a wɔhyɛ nkitahodzi no ase.
- Ndzeyɛ nkodo/ sorko – ha na yehu atwetann, mbɔgyina na ahohyemu no. Ha nye agor no ne mpɔmpɔndo
- Mpɔmpɔndo
- Ndzeyɛ ne famuko
- Agor no n'ewiei.

Se ebekae a, yeedzi kan akyere iyi mu dada.

4.2.1 Ahwɛgor mu Agodzifo

Agodzifo no yɛ nyimpa ahorow a odwumfo no bobɔ hɔn edzin na ɔdze hɔn hyehyɛ dwumadzi no. Agofomba no na wɔda ɔkyerɛwfo no ne tsirmupɔw edzi wɔ ahwɛgor n mu. Ɔtɔfabi a, agodzifo no tum yɛ abɔdze mu ndzɛmba ahorow mu bi, dɛ mbɛ ɔyɛ a yehu wɔ anansesem mu dɛ bi a abotokura tum tu ndwom su dɛ: “*Makeka makeka mbowa nyina seradze ebutuw - senkyire!*” no. Agofomba a odwumfo no bobɔ hɔn edzin no binom wɔ hɔ a wotum sesa ber a ɔyɛkyerɛ no rokɔ do no. Yɛka nsesaa a, dza yerepɛ akyerɛ nye dɛ, obi tum fi ne tsebea mu kɔ tsebea fofor mu. Kwatserkwaa bi, ibohu na ɔabɛyɛ ɔdzefo tam. Obi a, sɛbew o, ne pere mu wɔ nam tum dan ohianyi. Dɛ mbɛ abrabɔ tse no, sɛ mber sesa a, abrabɔ no so sesa. Mbom so dze, agofomba no binom nntum nnsesa nwionn, dɛ bi a, agodzinyi bi a n’edwuma efi ne nsa na eso onntum nnsesa n’abrabɔ nnkɛyɛ edwuma fofor bi.

Demara na ɔtse wɔ abrabɔ mu: yewɔ akotrɔbɔdwefo wɔ abrabɔ yi mu. Ɔno ɛ, ɔnnɛ hyew; ɔno so ɛ, ɔnnɛ nwin. Mbɛ ɔtae ara a na ɔtaae. Ahwɛgor mu no, binom so nndzi mber wɔ mu koraa. Hɔn dze wɔyɛ twamu-hɛn ara. Wɔbɛseen mu. Ɔnoara nye dɛ wohu hɔn wɔ agor no mu mber simaaba bi ara a nna noara nye no: wonnhu hɔn mu bio. Agodzifomba mpo a wonntaa nnsakyer anaa wonntum nnsakyer hɔnho no, yetum fa hɔn suban no mu aba gyina do ma wɔbɛyɛ agodzifo etsitsir ma ɔyɛ yie. Sɛ obotum aba dem a, nna ogyina kwan a ɔkyerɛwfo no botum afa do ahɛhyɛ agor no do.

4.2.2. Prama do

Wɔyɛ ahwɛgor wɔ prama do ma nyimpa hwɛ. Dom ba bohɛ agor no. Dem saso ntsi ahwɛgor no botae tsitsir nye dɛ wɔyɛ ɔyɛkyerɛ no wɔ bohɛɛadzefo enyim. Bohɛɛadzefo no kɔ kɔhwɛ mbɛ agodzifomba dze hɔn nyimpadua nyinara yɛ ɔyɛkyerɛ wɔ prama no do. Mereka yi nna ɔkyerɛwfo no nam nkyerɛkyerɛ kwan do akyerɛkyerɛ dwumadzi ahorow a ɔsɛ dɛ ɔkwankyerɛfo, agofomba nye hɔn a wɔwɔ kyefa wɔ agor no mu oibara dzi wɔ prama no do hɔ. Dem nkyerɛkyerɛ no na wɔfre no agoprama do akwankyerɛ no. Ahwɛgor no bi wɔ hɔ a, ɔkwankyerɛfo no tum sesa mu. Sɛ obotum ayɛ biribi tse dem a na ogyina agofomba, bohɛɛadzefo, bea na ber a wodzi dwuma no do. Ahwɛgor wɔ ahwɛ na nyɛɛ. Iyi nye nkyekyekyɛmu a ɔkyerɛwfo biara gyina do hyehyɛ n’edwuma. Sɛ agor no war anaadɛ ɔyɛ tsentsenntsen a, mbɛ osi sesa fi ahwɛ kor kesi fofor mu no, ɔsɛ dɛ ɔkyerɛ ma wohu kwan a ne nyina ka bɔ mu ma wohu na wɔtse agor no ase.

4.2.3 Nkɔmbɔ

Ahwɛgor mu dze, ɔkyerɛwfo no n'edwindadze kese ankasa nye nkɔmbɔbɔ. Nkɔmbɔbɔ no fi hɔ a, ɔkyerɛwfo no kyere prama ko a wodzi do dwuma na ndzɛmba a ɔwɔ hɔ, na afei wɔda agor no edzi kyere mbɛ osi a ɔyɛkyere ahorow no keka bɔ mu wɔ agor no mu.

Nkɔmbɔbɔ yɛ anomusem nkitahodzi a ɔkɔ do wɔ agofomba beenu, baasa anaa dza ɔbor dem ntamu. Nkɔmbɔ no na yɛdze kyere agodzifo suban a wɔda no edzi. Yɛdze kyere ahwɛ ahorow, yɛdze bɔ dawur na afei so yɛdze ma ɔkenkanfo enyi gye. Ɔno na ɔboa ma mbɛ woesi ahyehyɛ agor no kɔ enyim anaadɛ ɔkɔ kan; na ɔda bɔserɛmuka anaa abotsirmu mu nsem edzi ma yehu dɛ ampaara iyi dze ɔyɛkyere a. Ɔma yehu abotsirmusem ahorow no dɛ wɔyɛ ndzɛmba bi a ampaara ɔtaa sisi anaa otum si wɔ onyimpa n'abrabɔ mu. Bɔserɛmuka ana abotsirmusem mu no na yɛtaa hu dɛ ekyingye bi ba agofomba no ntamu, woyiyi nsem ano, obi dzi nkɔnkɔnsa anaa odzi nseku, na wɔda hɔn atsenka so edzi. Sɛ yɛhwɛ ɔbra a yɛrobɔ no ɔbra asetsena yi mu a, dza yɛtaa dze hu nyimpa no suban no mu kor nye nkɔmbɔ bɔ. Yehu iyi ber a yɛtsie nsem a nyimpa no ka. Ber a yɛayɛ aso ritsie obi no, nnye dza onyii no reka nko na yɛtsie na mbom adze ko a ɔreka, mbɛ osi a ɔka asem no fa, nye siantsir a ɔnam do ma ɔreka dem asem no nyina boa ma yehu mbɛ agodzinyi no suban tse. Yɛnam nkɔmbɔbɔ so do hu dɛ, agodzinyi bi dzi mu anaadɛ ɔyɛ ɔkɔhwɛaban bi; dɛ ne mfe a oedzi kɔ enyim anaadɛ ɔyɛ abofra tootoobaa bi. Ɔma yetum hu dem nyimpa no beebi a ofi; dɛ ɔwɔ ntsetsee pa anaadɛ onnyi ntsetsee; no suahun a ɔwɔ, na mpo mbɛ osi nye nyimpa afofor dzi nkitaho. Iyinom nyinara da edzi wɔ agodzinyi no no nkɔmbɔdzi mu.

4.3.Ahwɛgor ahorow

Ahwɛgor gu ahorow naaso hɛn adzesua yi mu dze, yɛbɔhwɛ no mu etsitsir ebien: Ahwɛgor a ɔyɛ obenegor na ahwɛgor a ɔyɛ paserew.

4.3.1 Ahwɛgor a ɔyɛ obenegor

Obenegor yɛ enyiber do ndzeyɛɛ mu esuasua; na ne yɛ mu no, ahyɛse dze rokɔ ne mponpondo no ma yenya ehumbɔbɔr na suro bi. Afei, ɔrokɔ ewiei no, nna suro na tsema anaa ehumbɔbɔr (atsenka a yenya) no fi hɛn mu. Ma yɛnhwɛ ndzɛmba a Aristotle bobɔ do dze kyere obenegor mu no. a. Enyiber

- b. Ndzeyee esuasua
- c. Ehumbobor/tsema/suro

Atsenka a obenegor dze ba bohweadzefo do nye suro na tsema. Dza oma bohweadzefo nya suro no nye de wodze hon ho toto agorba no ho wo aber a agor no roko do wo ne mponpondo no. Wohu agorba no de hon ara na wogyina agor no mu. Iyi ntsi se asem bon bi to agorba no a, wohu no de dza ato agorba no botum ato hon so bi demara. Ne dem ntsi, se wohwe na no mu reye aye dzen a, wonya suro bi de dza ato nyimpa (agorba no) anaa oroboto no no, oye de honara na ato hon. Mpanyin de, “wo nyenko da nye wo da”. Bio, “Kwasea na ose wodze me nyenko na nnye emi bi a”, nna tserɛ ayamuhyehye a wonya no, n’ase nye no.

Tsema a wonya no so tse de suro no ara. Tsema no kyere de, se agorba no to anaa owu fi agor no mu a, wohwer adze kese papaapa wo agor no mu. Oye so a wonya tsema ma agorba no onam akokodur a onyae dze kor owu mu no.

Se yehwe Julius Caesar buukuu a Shakepear kyerewee no mu a, owo mu de nna Anthonio mmpe Brutus n’asem dze, naaso, Anthonio kotoo de Brutus ewu no, onyaa tsema na ayamuhyehye bi maa no ma odze awerhow kaa de, “Ampa, Roman oman mu Onyimnyamfo nye oyi”. Okaa dem asem yi dze kyere tsema a onyae maa Brutus a nna oewu no. Ne yamu ara a nkye Brutus ennwu. Demara na bohweadzefo so nya tsema ma agormba bi a woko tsebea a otse dem mu no. Se oba no de agorba bi roko tsebea bon bi a odze no boko owu mu a, binom mpo kata hon enyi a wommpe de wohwe ayaayaadze a oroboto agorba no.

Aristotle kodo kyere de, ahwegor mu mba no nnye nyimpa tsitsir biara; mbom, wobor bohweadzefo (hon) do a, yemmben hon beebiara. Wotaa de woye adehye. Mpen pii no, yehu wo ndzemba a osisi wo obenegor mu de otum dze nsesa ba obi n’abrab] mu ma ofi sor bohwe famu. Iyi kyere de, ndzemba a osisi wo agor no mu no ma otum fi ndzepa a owo mu no mu koto amandze anaa esian bi mu; anaa de ofi enyigye mu ko awerhow mu. Dza yehu bio so nye de, agorba no nnye nyimpa a odzi mu wie; de mbre nyimpa nnwie emudzi no. Bio, onnye nyimpa odzebonyefo so. Asotwe anaa esian a oko mu mu no so nnye no bon anaa no suban bon ho akatua a onya; mbom ofi mbere woye a owo n’adwen mu nsusui bi mu.

4.3.2. Paserew

Ahwɛgor bi wɔ ho a ne hwɛ yɛ enyika dodow. Dza yeedu do yi demara na ɔtse, wo se bogu do demara kesi dɛ ebɔhwɛ ewie. Sɛ w'enyi nnka a, ibotum dze paserew ahwɛgor agyegye w'enyi. Nhwɛhwɛmu ada no edzi dɛ, nyimpa biara a etse asaase yi do no sɛ epɛ apɔwmudzen papa a, ɔwo dɛ itum serew pii na ɔama honam mbowaba a ɔboa apɔwmudzen no eenya nkenyan dze aboa nyimpadua no. Paserew agor yɛ ahwɛgor a oyi aserewsem nkotsee. Ɔyɛ agor a n'ewiei no yɛ enyigyesɛm na nsem no taa gyina fɛwdzi, esuasua na akohwisɛm a ɔnye nokwar sɛ do. Sɛ yɛhwɛ nsonsonɛe a ɔda obenegor na paserew ntamu a, adze tsitsir a yehu nye dɛ obenegor ma nyimpa ne fahodzi do naaso paserew dze, ɔtsiatsia nyimpa ne fahodzi do. Nyimpa ne sinto na wonam fɛwdzi kwan do da no edzi.

Hɛ iyi nsew: Abenedzi ma ihu nyimpa no mbɔbɔr. Ɔma edze woho si ho dɛ sɛ ɔwo na ɔtoo wo a nkyɛ ebɛyɛ dɛn? Ɔrokɔ adzɛbɔn bi mu a nna ɔyɛ wo yaw na isuro ma no naaso paserew agor dze nyimpa no ne mberɛwɛ bi a ɔwo mu, bɔn bi a ɔayɛ anaa ndzeyɛɛ bi a ɔda no edzi no, ɔno na wosuasua no na wɔdze to gua. Iyi ayɛ dɛ woridzi agoir dze naaso nna oridzi nyimpa no noho fɛw ara nye no. Paserew yi da enyiwusɛm a ɔwo nyimpa mu edzi, na ɔma yɛserew nkwaseadze a ɔwo nyimpa mu. Ɔda nyimpa n'egyimsem na ne ndzeyɛɛbɔn bi a nkyɛ yɛmmpɛ dɛ ɔda gua edzi. Iyi ntsi, paserew agor yi yɛ agor a ɔtsentsen ndzɛbɔn a ɔwo nyimpa mu na ɔma yesua ndzɛpa wɔ asetsena mu. Paserew yi tum da yaw bi a ɔwo asetsena mu edzi naaso ne nyinara mu no, ewiei no yɛ enyigye.

4.3.2.1. Suban bi ho Paserew

Iyi yɛ paserew a ɔdze ngorho tsentsen asetsena mu ndzɛmba a ɔko kyew ho wɔ fɛwdzi kwan do. Aserewsem yi wɔ adzesua kɛsɛ a ɔtwe bɔhwɛadzɛfo hɔn adwen ko do. Adzesua a paserew yi da no edzi na ɔdzi dwuma wɔ ho no bi nye subanpa, subanbɔn, ahotsew na asetsena mu nkyɛrɛkyɛrɛpa. Mpen pii no dza ɔtaa yɛ nye dɛ wɔyɛ dze gor nyimpa etsitsir bi a wɔwo ɔman no mu ho, dɛ ebia, esikafo, amanyɛfo, abemfo, enyimnyamfo, atsenankongua, ekuafɔ/edwumayɛfo na mpo mberantse na mbabaawa a wɔwo ɔman no mu. Sɛ wɔyɛ dɛm paserew yi a wɔtaa wɔdze tu fo, wɔdze kyɛrɛkyɛrɛ na afei wɔdze hwɛhwɛ ɔman no mu asetsena pa, dɛ mbɛ nyimpa nyinaa botum atsena fɛfɛfɛw, ɔdo na enyigye mu.

4.3.2.2. Nyɛbea ho Paserew

Nyɛbea ho paserew yi kyere kwan a nyimpa bi ye hon ndzɛmba fa. Iyi na akyerewfo a wɔkyerew ndzɛmba fa paserew yi ho no dze gor anaa wɔdze dzi nyimpa bi a hon bra a wɔbɔ no nye ɔman no n'amambra bɔ ebira ho. Asetsena mu no, mpen pii yetaa hu nyimpa bi a hon suban ara nye de ndzɛmba a wɔye nye de wɔbɔko etsia amambra no. Dem nkorɔfo yi by nye mbarimba a wɔgor hon ho anaa wɔnye honho deda, mbasiafo a wɔgor honho anaa wɔnye honho deda, mbɔndarto, nyinkutwe basabasa nye koratwe fi, ewifo weremfo, ammpɛedwuma akwadwefo, ɔbonsamtawanomfo na hon a wɔbɔ asansabra. ɔbra biara a ɔnye asetsena pa nnko no wɔye dem paserew yi dzi ho few dze kyere anaa wɔye dze ka ho asem.

4.3.2.3 Tsebea ho Paserew

Tsebea paserew yi ye paserew a no mu aserewsem no gyina agofomba etsitsir no hon tsebea a wɔko mu no do papaapa. ɔye nyimpa asetsena ahorow mu aserewsem a se ehwehwe mu a ihu de ɔnye abrabo no ko pɛpɛpɛ. Dza yetaa hu no wɔ aserewsem yi mu nye de, mpen pii no ɔye a nnye agofomba no hon pe na ɔba no dem anaa tsebea a wɔko mu no nnye hon pe na mbom de mbre tsebea no tse no, ɔno na ɔma wɔko mu demara a wonnyi hi tum biara. Dza ɔba nye de ɔtwe adwen ko tsebea bon ahorow a ɔma nyimpa ye ndzebon pii mu do. Na se ɔba no dem so a, bɔhwɛadzefo no hu agofomba no wɔ dem tsebea yi mu serew hon wɔ dza wɔko mu anaa wɔfa mu no ho.

4.3.2.4 Agofoba ho Paserew

Se wɔgor agofoba bi ho a, ɔno na yefre no agofoba ho paserew no. Iyi mu no, adze a osi do dua ankasa ye agofoba no su nhyehyee ho na mbom nnye atosem no ne nhyehyee no. Se ehwe mu a, ihu de, ɔnye tsebea ho paserew bɔ ebira koraa. Ber a tsebea ho paserew rohwe de tsebea no mu ndzɛmba bema ndzɛmba a ɔroko do fa agofomba no ho aye serew no, agofoba ho paserew no dze, ogyina agofomba no ankasa do. Paserew iyi mu no, ɔkyerewfo no tow kandzea no dze hwe agofomba no mu biara do ma wohu kwan a yehu nyimpa wɔ daadaa asetsena mu no ara pe. Iyi mu no, nnye nyimpa potsee bi na ebia wɔdze hon enyi sa no na mbom otum ye de ebia osikanyi, ohianyi, ɔdehye na akowa anaa amampanyimfo, amamfo, edwumayefo, adanwuranom, asɔfo na asɔmba nna kuromfo na nkurow nketsenketsemufo do.

Mbubudo

Ehu de agor no aye dew? Ha yi yeesua ehu na yea kyerekyere ahwɛgor n'adzeban de ɔye abrabo mu osuahu a wɔagye enyim ara ahyehye no agor anaa nkɔmbɔdzi kwan do. Yɛeakyere no bobea so de ɔto ye de epintampintan anaa akaasi na aperper ba mu. Agofomba mmpa ahwɛgor mu da na eso wɔye ɔyɛkyere no wɔ prama do ma bɔhwɛadzefo hwe anaa wotsie dze hɔn adwen dzi nkɔmbaa no do hu mu nokwar na akohwi. Yehu de ɔkyerɛwfo no twar de ɔwea nkɔmbɔdzi nhyehyɛekwan no ho yie ama no dwumadzi aada nyimpa suban edzi yie mapa. Afei, yehwɛe abenegor na paserew a ɔye ahwɛgor etsitsir ebien no. Hye no nsew de, ahwɛgor etsitsir ebien yi nyinara wɔ no nkor bata na no su ahorow.

Dwumadzi

Bua nsembisa yi

1. Eɛnɔdze nye obenegor?
2. Kyerɛw dza inyim biara fa paserew ho.
3. Kasa fa dza odzidzi do yi nyinara ho na kyere mbre no mu biara tse:
 - a. Suban bi ho paserew
 - b. Nyɛbea ho paserew
 - c. Tsebea ho paserew
 - d. Agofoba ho paserew
4. Kyere ahwɛgor no su ebiasa na kyere no mu biara ase yie.

TSIR 5: Abasem/ayesem/akyerewtsen

Nyienyim:

Afei, yeedu abasem do. Tsir yi mu no, yebepensapensa abasem mu yie. Yebohwe n'adzeban, n'ahorowgu na no su bi. Migyedzi de, se yehwe abasem wie a, ibotum akyerew sorbo sorbi a oda akyerew kasadwin ahorow no mu na nsedzi a owo mu. Ye nko do!

Botae

Adzesua yi nko ewiei no, nna itum pensapensa abasem

1. n'adzeban mu
2. n'horowgu mu
3. no su mu

5.1.Abasem n'adzeban

Ha yi, mbre yesi kasa no, demara so na yekyerew. Onntse de awensem a wogyee enyim ara hyehye nsem dze wen no bi. Otse de erema kodzi anaade erotow anansesem: mbre isi kasa no, noara na ehwe ho dze kyerew. Ekyerew no tsenn. Akyerewtsen a. Hye no nsew de akyerewtsen mu no, yewo abotsirmu na dza onnye abotsirmu.

5.2.Abasem Ahorow

Abotsirmu: Ne dzin ara na yeaka no: abo-tsir-mu-a. Obotum aye asem bi a esi da na erohwe ho abo wo tsirmu aka asem bi afa ho. Dza ohia ara nye de dza ereka no, okenkanfo no enyi begye ho –osiande ereka ekesi asem potsee bi do. Iyi na gyama yebotum aka de oye Kweku-anansesem bi

anaade kodzisem bi, a obi bo ne tsirmu ka no. Ofa asem a osi bea potsee bi do dze ye; oma agormba/agodzifo bi ba mu, na woye ndzeyee potsee bi dze da suban bi a osi edzi; dze kyere adwen bi anaa odze ka asem. Okyerew ma ekenkan iynom.

Onnye Abotsirmu: Ono nokwasem a. Iyi so ye akyerewtsen. Oye dza ofa onyimpa dasanyi ankasa ankasa n'abrabo mu nsem ho. Anaaso mpo de ofa bea potsee bi ho, anaaso mpo nsem a esisi ankasa ankasa wo mbea potsee bi do ho.

Se edze abotsirmu akyerew to iyi ho a, ibohu de ha dze yi ono nokwasem bi a esi pen a. Mbom okyerewfo no tum gyina no botae do dandan nsem no bi dze kyere n'adwen. Nsem potsee ankasa ankasa a osisii anaa esisi pen no, otum dandan mu fa no nkorkor ka ho nsem dze du no botae ho. Wotum ye dem dze da adwen edzi. Oye nsem bi a oye nokwar wo abrabo mu ho. Ha dze yi, nokwasem o. Osi wo abrabo mu. Oka onyimpa dasanyi ne wiadze asetena mu nsem, bo ho dawur. Adzesua yi mu no, ebekenkan Mfantse kasadwin mbuukuu ahorow no bi ama aafa do dze atse dza yereka yi ho ase yie.

5.3.Abasem no su

Se wobegye akyerew kasadwin bi atomu de abasem/ayesem a, owo de ndzembra a odzidzi do yi da edzi wo dem akyerew kasadwin no mu:

- Wokyerew toa mu kor wo tsir tsir na asensin mu. Akasafo a wokasa wo mu no tum fa akwan ahorow do kasa ma abasem no no mu ntsease da edzi.
- Abasem taa ye atsentsen. Wonntwaa nkasafua dodow biara nntoo ho naaso, otaa wowar.
- No mu nsem no nye nokwar se. Osiande wogyina asetsena mu nsem do na wohyehye. Wotum kyere fa abakosem ho, abrabo
- Akyerewfo no dwen akenkanfo no hon ho yie ansaana wohyehye.

Mbubudo:

Yeesua de akyerew kasadwin ye kasa a wodze edzi edwin wo akyerew mu na no nkor bata kor nye abasem. Dem kasadwin yi nye daadaa nkombodzi se. Wokyerew fa wiadze mu nsem ho, a se annye abotsirmusem a, obeye nokwasem a esi da wo onyimpa dasanyi n'abrabo mu. Okyerewfo no tum fa gyanabew bi, dze agormba/agodzifo ka nsem a otum si wiadze, dze da n'adwen edzi, dze tu fo, bo asem bi ho dawur, dze tow nyimdzee do, onye pii a okeka ho.

Dwumadzi

1. Kyere ayeseɛm ase tsiabaa.
2. Kyere ayeseɛm ahorow ebien a esua wo ha no na kyere mu yie.
3. Fa mfatoho a o fa kyere ayeseɛm no su ebien .

TSIR 6: Awenseɛm

Nyienyim

Yema wo akɔaba ba tsir esia wo hen adzesua yi mu. Yewo enyisun de w'enyi agye dza yeedzi kan esua no ho. Kuw yi mu no, ibosua ndzembra pii afa awenseɛm ho. Ibosua awenseɛm n'adzeban, ibohu awenseɛm ahorow no mu bi, bio, ibohu awenseɛm no su ahorow. Yema wo tsir nkwa! Ko do kenkan.

Botae

Adzesua yi nko ewiei no, nna itum:

4. Kyere awenseɛm ase
5. Kyere awenseɛm ahorow no mu bi
6. kyere awenseɛm no su ahorow no mu

6.1. Awenseɛm n'adzeban

Mpen pii no, oye dzen de nyimdzeɛfo beye adwen kor wo awenseɛm n'asekyere ho osiande, abemfo pii gyina hon nyimdzee, suahu na nwomasua ntsetsee do dze kyere awenseɛm mu. Iyi ntsi, hen adzesua yi mu dze, yebekyere awenseɛm ase de, oye kasadwin no nkor bata bi a wodze kasa frenkyemm ahyehye no nsensanee nsensanee na no mu nsem no mu do, okenyan atsenka owo nkyerease dodow na ohia ndwenho.

6.2. Awenseɛm ahorow bi

Awenseɛm gu etsitsir ahorow ebien: Sanku awenseɛm na Atoseɛm awenseɛm

6.2.1 Sanku ho Awensem

Sanku ho awensem ye tsiabaa. Mpen pii no ɔfa ndwom su. Ɔtse de ndwom a obi tow dze da n’atsenka bi edzi. Dem awensem yi nyaa ne dzin fii tsetse Helaman mu. Tsetse Helaman mu no, nna ɔye ankorankor bi na wɔtaa dze sanku ho awensem yi dze da hon atsenka bi a wɔwɔ edzi. Mbre ɔtse nye de, aber a onyia no rotow awensem (a ɔahyehye no de ndwom) no, nna ɔrobo sanku so dze gyegye ho. Nde mber yi dze, ɔwɔ mu de wɔmmfa sanku no nnka awensem no ho dze, naaso dzin a wɔdze too do de *sanku ho awensem* no abeka ho a obiara a ɔbotow ndwom biara a ɔda n’atsenka edzi a ofi n’akoma mu no, dem dzin yi na wɔdze ma no.

Sanku ho awensem nndzi nhyehyee ɔkyee biara do. Sanku ho awensem pii kyerekyere mbre mbre biribi tse mu – de ebia enyimtsewee, enyigyina bi a okenyan ɔkasafɔ bi n’atsenka. Bi so wɔ ho a, ɔkyere mbre nyimpa bi tse, anaa mbre nyimpa ne tsebea tse wɔ asaase yi do. Sanku ho awensem pii noara fa adwenmusem kasasu na ndwom do dzi dwuma. Ɔye awensem a ɔma ɔkyerewfo na ɔkenkanfo no nyinara kye atsenka kor noara a ɔwɔ awensem no mu no. Sanku ho awensem no mu bi nye: Nguanhwefosem awensem, Amoma, Atsenka ho Awensem na Nsui.

6.2.2 Atosem Awensem

Atosem awensem ka ayesem ho wɔ awensem afa mu. Osian mbre awensem no su tse no ntsi, ɔsesa fi awensem ne nhyehyee no ho koraa. Kwan a kasadwimfo no fa do ka ne nsem hyehye no wɔ atosem awensem mu nye de, ɔhwehwe de ɔbema ne nsem no abɔ n’atsenka a ɔwɔ no emuamua ama oeenya nsunsuando bi ekenyan etsiefo a woritsie no anaa n’akenkanfo. Iyi ntsi, atosem awensem hwehwe de ɔbeka nsem a ohia anaa nsem a ɔbotɔ akoma do. Se yerekenkan awensem no a, yehye su ahorow a odzidzi do yi nsew: Mber a odzi mbɔtra, mbeambea ahorow, na adwen a no mu do a ne ntseasee ye dzen wɔ atosem turodoo mu.

Atosem awensem a ɔwar a ɔfa ekunyin ho no, wɔfre ***okunyin awensem*** (epic). Okunyin awensem kor a agye dzin wɔ wiadze nyinara no fi Helaman mu. Ho na nyimpa bi tse de Homer kyereew *Illiad* na *Odeseus*. Hwehwe nwoma yi bi na kenkan na ɔye nwoma a ɔye enyika. Akanman mu so, Oguaa Aban na Asantehen Ɔsee Tutu so ye okunyin awense. Atosem awensem no bi nye okunyin awensem na adwontow awensem.

6.3. Awensem no su

Awensem ne kyerew ye soronko kakra fi ayeseɛ na ahwegor ho. Nhyehyee no nnye kasapɛn kasapɛn anaa dɛ nkɔmbɔtwetwe kwan a wɔfa do kyerew ahwegor no bi. Awensem a wɔakyerew ne nhyehyee tse dɛ ndwom a wɔahyehye wɔ asɔr ndwom buukuu mu ara pɛr. Wɔahyehye awensem wɔ nkyekyemu nkyekyemu/afaafa ahorow mu na no mu biara wɔ nsensanee ahorow.

Bio, awensem mu no, agofomba nntaa nndzi nkitaho dɛ mbɛ yehu no wɔ ayeseɛ na ahwegor mu no. Awensem akyerewfo nntaa mmfa nsem pii nndzi dwuma dɛ mbɛ ɔtse wɔ ahwegor na ayeseɛ mu no. Mbɛ ɔtse nye dɛ, wogyina hɔn atsenka do na wɔtaa dze hyehye awensem na wɔda ndzɛmba a etwa nyimpa ho ehyia edzi wɔ mu. Wogyina hɔn atsenka do dze hwehwe nkasafua a wɔgye dzi dɛ obotum ekenyan etsiefo noara so hɔn atsenka do dze kyerew awensem no. Woyiyi nkasafua a ɔfa dza wɔreka no ho na wɔhyehye no fɛfɛfɛw. Iyi ma awensem mu nkasafua ye dza ɔye enyigye na otum kenyan atsenka ahorow tse dɛ enyigye anaa awerehow, dɛw anaa no huam na dza ɔkeka ho.

Awensem taa dze nkasafua a otwa adwen mu mfonyin dzi dwuma. Osiandɛ awensem akyerewfo nntaa mmfa nkasafua pii nndzi dwuma ntsi, wɔtaa tsi nkasafua bi anaa nsensanee bi mu mpen pii dze si dza wɔpɛ dɛ wɔka no do dua, na iyi boa ma ɔtwe etsiefo na akenkanfo hɔn adwen si dza wɔpɛ dɛ wɔdze to gua no do. Ntsimu/nsisido ahorow a yetaa hu no wɔ awensem mu no ma odu beebi a nna awensem no ekenya ndwom su bi; no mu ngyegyee na nsem a wɔtsi mu wɔ ne ka mu no tum ma ɔye dɛw san ye enyigye. Nkasafua na nsensanee ntsimu bi so wowɔ mu a, hwe mpen dodow a wɔtsi mu no na dwen siantsir a ɔkyerewfo no yee no dem ho. Yɛbɛfa awensem na yeaye ho mpensampensamu wɔ kuw a odzidzi do yi mu ama atse dza yereka no ase yie.

Mbubudo

Adzesua yi mu no, yeapensapensa awensem mu. Yeahwe awensem n'adzeban, no su na n'ahorowgu so. Kuw ahorow a ɔwɔ hɛn enyim no, yɛbɛfa awensem ankasa na yeaye ho mpensampensamu ama ntsease edzi mu yie.

Dwumadzi

Bua nsembisa a odzidzi do yi nyinara yie

1. Kyere sorbi sorbi a ɔda sanku ho awensem na atosɛm awensem ntamu?

2. Kyerekyerɛ awensɛm ahorow a odzidzi do yi mu fann:
 - a. Nguanhwefosɛm awensɛm
 - b. Atsenka (ode)
 - c. Okunyin awentsen awensɛm
 - a. Adwontow awensɛm
3. Ma awensɛm no su ebiasa na kyere mu yie.

KUW 3: AKYERƐW KASADWIN MU KASASU AHOROW BI

Mbueienyi:

Dɛ mbre yeedzi kan akã no, kasadwumfo biara nnkasa traa dɛ mbre mbofra anaaso mpo nkorɔfo bi a wɔnnkwadaar wɔ kasa bi mu si kasa. Ansaana kasadwumfo dze dwumadzi bi boto gua no, ɔwɔ dɛ ohu dɛ etsiefo enyi begye dza ɔrebeye no ho. Onam dem ntsi, kasadwumfo taa dze nkasafua na nsenkuw bi a ɔma no dwumadzi bi sɔ enyi dzi dwuma; mekyere nkasafua na nsenkuw a ɔma atsenka soronko bi. Dem nkasafua yi na wɔfre no kasasu. Se kasadwumfo no dze kasasu a ɔdze enyigye na atsenka soronko bre n'etsiefo dzi dwuma yie a, ɔma no dwumadzi no ye ɔkrabɔhwɛ. Kasasu a yereka ho asem no bi nye ngyinahɔma, sɛ-nyimpa, ntotoho, ntsimu/nsisido, enyihanhan, nsengor, enyido-ebirabɔ-tsiaba, asɛmbisa a onnyi mbuae, tsetse kasa, ngyegyee-sɛ-adwen, ndze nsasae nap ii a ɔkekaho. Kuw yi mu no, yɛbɔhwɛ kasasu ahorow a ɔtaa puepue akyerɛw kasadwin mu bi na mfaso a ɔwɔ ho.

Kuw no Botae

Kuw yi mu adzesua nko ewiei no, nna itum pensapensa kasasu a odzidzi do yi mu

1. Bɛ
2. Kasambirenyi
3. Adwenmu mfonyintwa
4. Asesɛsɛm/ngyinahɔma
5. Ekyirhwɛ/nkɔmponbu na kanhwɛ na nkɔntsembo
6. Erekasa kyere woho na Egyinatu.....

TSIR 1: BƐ/MBƐBUSƐM

Nyienyim:

Kasadwin ye abrabɔ. Osian dem ntsi, akyerɛwfo wen ma ɔnye abrabɔ sɛ. Wɔdze nsem a otwa abrabɔ ho mfonyin ahorow bi na wɔdze hyehye mu ma odzi mu. Mfantse hon kasaa mu adze kor a otwa abrabɔ ho mfonyin tsiabaa nye bɛ. Adzesua yi mu no, yebeye mpensampensamu afa bɛ ho.

Botae

Tsir yi mu adzesua nnko ewiei no, nna itum:

1. kyere bɛ ase
2. ma bɛ ho mfaso
3. kye bɛ mu gu ahorow
4. ma bɛ ho mfatoho bi

1.1.Bɛ n'askyere

Bɛ ye kasafrenkyemm a yɛdze kyere asem bi a yɛpɛ dɛ yɛka mu anaa dɛ yɛdze si asem do dua ma nyimpa tse ase pefee. Ɔye nsempɔw a nananom ahyehye ato ho dze da abrabɔ mu suahu edzi. Sɛ obi rekasa na obu bɛ a ɔfata hye mu a, ɔye etsiefo no dɛw na mpen pii no wɔka dɛ ɔkasafɔ no n'ano atsew. Abɛbu ma kasa ye huam, ɔda adwen tsitsir a ɔwɔ asem bi mu edzi na ɔma ntseasee so da edzi pefee. Akanfo bu bɛ fa ndzembra biara a ɔfa hon abrabɔ na hon asetsena mu ndzembra ho. Akanfo tum bu bɛ aber biara mbom, yɛwɔ ber biara na bɛ a ɔfata dɛ yebu. Yetum bu bɛ fa ɔdo, ɔtan, ayamuyie, abawo, mbowa, ohia, nokwardzi, nyansa na adze ho.

1.2.Bɛ ho mfaso

1. Ɔye asetsena mu suahu na abrabɔ mu akyerɛkyerekwan.
2. Otwa asem tsentsen tsia na wɔdze bɔ asem pɔw.
3. Ɔma kasa ye dɛw, ɔma asem ye huam.
4. Ɔda amambra na abakɔsem edzi.
5. Ɔma etsiefo dwen yie.
6. Ɔda anotsew edzi, sɛ obi dze bɛ wurawura ne kasaa mu a, ɔma ɔmanfo hu dɛ n'ano atsew.
7. Ɔma yehu gyedzi a Akanfo wɔ wɔ Nyankopɔn na abodze mu.
8. Yɛdze tu fo.

9. Oda aboḁḁze mu ndzamba ahorow edzi ma yehu hɔn su na hɔn bobew.
10. Nde mber yi mpo wotum bu be dze si akan dze gye hɔn enyi.

1.3.Be Ahorow

Be gu mu ahorow anan

1. Be turodoo

Iyi ye be a oye asendaho a oyi abrabo mu nokwar edzi. Be turodoo mu nsem no dze be no mu adwen pue preko per na oda abrabo mu nokwasem a ekyingye biara nnyi ho edzi. Mfatoho:

- nsu a odo wo na oko w'enyina mu
- Okoto nnwo anoma
- Borosuow a oye dew na abaa da ase

2. Asem-se-be

Iyi ye be a anansesem anaa abakosem taa ekyir. Bi wo ho a oye nsem pokyee a osisii. Inyim asem a osii bi a mpanyimfo dze aye be a? Hɔn suban se be ntsi na wofre hɔn asem-se-be.

Asem-se-be tum twa asem tsentsen tsiaba na oda esumasem bi edzi. Mfatoho:

- Opoku mfa no nku
- Nnye obi na okum Antwi
- Obi n'amandze san obi

Dwumadzi: Hwehwe mbre oye a be a owo sor ha yi baa.

3. Ngyedo-be

Ngyedo-be ye be a owo afaafa ebien. Obi bu ofa a odzi kan no a nna obi so dze ofa a oto do ebien no agye do. Wodze ofa a odzi kan no fre na dza oto do no so ye ngyedo. Dem be yi yi ndzamba ahorow ebien edzi na odzi ho dwuma. Mfatoho:

- Atow pete itur----- asɛɛ w'akorabo
- Oyirikayiri----- banyin rubowu a na ne yer suro no
- Nyimpa bohwe yie no-----nna ofi dza oehun

Dwumadzi: Hwehwe ngyedo be ahorow ebiasa na enye afofor nkyee.

4. Abɛbudze

Abɛbudze yɛ nsɛnkyɛrɛdze a wɔdze kasa. Ɔyɛ abɛbu nsɛnkyɛrɛdze. No mu pii wɔ ho a ɔyɛ edwindze anaa ɔyɛ adze a wɔdze si bamkyim na akyeampoma do. Itum hu bi wɔ atam mu, mpaboa do, mpetsea do, edinkra a ɔwɔ kente mu nye edwindze ahorow pii. Dza ɔwɔ dɛm bɛ yi ho nye dɛ, hon a wɔtse nsɛnkyɛrɛdze ase no na wɔtaa tse ase. Mfatoho

- Owu atwer
- Gye Nyame
- Asetsena pa ma awerɛfir
- Huw m'enyido ma me ntsi na atwe ebien nam

1.4.Bɛ ho mfatoho bi

Bɛ mu nsentsitsir fa wiadze ndzɛmba ahorow pii ho, bi nye yi:

Awar ho mbe

- Wiadze wɔtsena no beenu beenu
- Basia kɔ awar a, ɔdze ne na kɔ
- Awar no kwan war

Awo ho mbe

- Awo sɛ wo na sɛ annwo bi a, wokyir.
- Awo nye wo yamu.
- Awo wodzi no nantsirnanka na wonndzi no hen nua ba.

Ɔyer ho mbe

- Ɔyer pa sen sika
- Ɔyer pa yɛ ahodze
- Wo yamu ye a, mmfa wo yer nnkyɛ

Mbanyin ho bɛ

- Ɔbarima wɔyɛ no dɔm ano na wɔnnɛ no fie
- Banyin nntu ntafi nnto famu na ɔmmfa ne tekyerɛma mmfa
- Ɔbarima na ɔnom edur a ɔyɛ nwen

Ebusua ho mbe

- Ebusua yɛ dɔm, na wo na ba nye wo nua
- Ebusua dua, wonntwa
- Ebusua dɔ fun

Mbofra ho mbe

- Abofra bo nwaw, na ommbo akyekyer
- Abofra twa fufu a, otwa ma oboko n'ano
- Abofra n'ano ye dzen a, odze hyen aben na ommfa nnhyen wedur

Yarba ho be

- Yarba nyim ba na onnyim ko
- Yarba nnkoku wo a, n'edur nnye na
- Yarba a oboku wo no nnyim edur

Nsamanfo ho be

- Nsamanfo mpo pe hon dodow na hen atseasefo
- Otseasefo na oma osaman no kon do to
- Osaman tweon tseasefo ansaana oedzidzi

Enyihaw ho be

- Enyihaw mu nnyi biribi d[ohia
- Etse faakor a, etse w'adze do
- Isum maberebere efir a, iyi egyawaadwow

Awerekyekye ho be

- Akyea na ommbui osen abebu nyina dew
- Wimu nnye nsakra na
- Nyame ne nber nye mber pa

Ohia ho be

- Ohianyi no bo mmfuw
- Ohianyi nnyi nyenko
- Ohianyi no fun, wosie no anapa

Nokwardzi ho be

- Asempa ye tsia
- Itwa nkontompo ma wo safee yew a eda paa do
- Nokwar dzi itur

Nyankopon/ Nyame ho mbe

- Nsem nyina ye Nyame asem
- Asaase se: adze a Nyame daye nyinara ye
- Onyame nye hen

Nyimpa ho mbe

- Nyimpa ye few sen sika
- Nyimpa nnye nwura
- Nyimpa si bon kwan mu a, afotu ye no de nsenkwaa

Owu ho mbe

- Owu atwer, obaako mmfow
- Wo na wu a, nna w'ebusua asa
- Obra twar wu

Mbowa ho mbe

- Akyekyer se: nsa ko na nsa aba
- Kontromfi se: mo suman nye m'enyi
- Aborɔnoma se: kwantsia ye mbusu

Mbubudo

Adzesua yi mu no, yegahwe be n'adzeban, no ho mfaso, n'ahorowgu na mfato ho ahorow bi. Akanfo gyedzi de, be ye mpanyimfo dze osiande hon na wowo nyansa na nyimdzee. Akanfo tum so bu be hye: mpanyimfo, nananom, nyimpa (atseasefo bi hon edzin bataho), mbowa, ndua, nhoma. Wotum ka de: mpanyimfo se.....Akyekyer se..... Nana Kwabo na okaa n'asem de..... Dem nsem yi nyinara na oma kasa ye dew ye huam.

Dwumadzi

1. Kyere be ase yie.
2. Kyere be ahorow no na fa mfatoho a ofata kyere no mu biara yie.
3. Kyere dza odzidzi do yi ho be eben ebien:
 - a. Edwumaye
 - b. Sika
 - c. Awoo
 - d. Obu/enyidzi

Tsir 2: Kasambirenyi Nyieyim:

Kasambirenyi ye kasadwin no mu kasasu kor. Kasambirenyi so ma kasadwin da nsew fi daadaa kasa ho. Tsir yi mu no, yebeye mpensampensamu afa kasambirenyi ho.

Botae: Adzesua yi nkɔ ewiei no, nna itum

1. Kyere kasambirenyi ase
2. ma kasambirenyi ho mfaso
3. ma kasambirenyi ho mfatoho bi

2.1. Kasambirenyi n'adzeban

Se ɔba no de obi rekasa na ɔmmpe de ɔpa asem a ɔreka no ho tam anaa ɔma asem kor no n'enyi da ho pefee a, obir kasa no enyi, otum ka asem no wo kwan bi do ma gyede edwen ho ko ekyir ansaana aatse ase yie. Kasa mbirenyi ye kasa a yebir n'enyi wo ne nkae mu, yefura no tam anaa yekata do na ntseasee nda edzi pefee. Yennkotum egyina nkasafua a wodze ahyehye no do ennya no mu ntseasee. Dem kasa a obi ka dze suma anaa dze huntsa no, na wofre no *kasambirenyi* anaa *kasakoa*. Akanman mu no, nnye nsem nyinara na woka no wo bagua mu dem ara anaa woka no wo mbofra enyim.

Mpo, se obi pe de oka asem bi a no ho nntsew a, onnka no pefee dem ara, obir enyi de mbre obeye ma se adze kor no ye nkɔn anaa ɔye ammbɔdzin a, asem no ho atsew. Bio, yebir asem enyi kata ne yaw do. Afei, nsem bi wo ho a onnyi de woda no edzi wo ber a mbofra wo ho a, wotum bir enyi. Se mpanyimfo bi hyia ridzi mpanyinsem bi na se woemmbir enyi ma mbofra no tse a, wobotum dze asem kor no ekyima ma asem no atahye, bi nkɔhwe a, nna wɔmmpe de asem no tahye dem ber no. Se ehwe mu a ibohu de gyama Akanfo wo kasambirenyi a ɔfa honam akwaa no mu biara ho.

2.2. Kasambirenyi ho mfaso

Akanfo nnye hon biribiara kwa. Wowo siantsir a woye hon biribiara. Dza odzidzi do yi ye Mfaso bi a ɔwɔkasambirenyi ho”

1. ɔma kasa ye dew ye huam.
2. ɔboa ma wodze asenhia sie ananabenfo, mbofra na hon a wɔmmpe de wotse asem bi.
3. Obue adwen mu.
4. ɔma yedwen ko ekyir tse abrabɔ mu nsem ase yie.
5. ɔkyere anotsewee anaa ɔpow.

6. Oma yehu baguamu kasa.
7. Omma yennya amandze.
8. Oma kasa ho tsew na no mu so ye dur.
9. Kasambirenyi horan kasa a obi reka; ohoahoa kasa no anaade omema do.
10. Kasambirenyi nyin adwen osiande se obi dze kasambirenyi dzi dwuma a, ogye ndwenho yie ansaana ntseasee aye edwuma.

2.3.Kasambirenyi ho mfatoho bi

KASAMBIRENYI	ASEKYERE
Oada ne benkum do	Oewu
Noho ewu/noho nnyiho	Onntum nnye basia nnwo
Ogye daamba tu sre	Ohia aka no
Sika afow pata	ohia aba
Yi no asotsir	Bo no amandzee/ka kyerε no
Wasa no	Ka gu n'asowa mu
N'enyi etutu egu ne nsamu	n'enyi aber yie
Woebu ne ketε mu/ Woetsia ne nantsir	woetu kwan, oko
Ka ntsin mu	mia w'enyi/ yer woho
Ne saafee ayew/n'adwen ho aka	Oabo dam
Wɔawe akyekyer ne tsir	Ne tsir mu ye dzen
Oriyi n'enyi do	oreda
Adze ato n'enyi	Asenkese bi ato no
Dua ebu aka ne se mu	Adan aba no do
Nsu boto nde	Asempa besi nde
N'ano awow	N'ano atsew
Noho adan/ Bosoom ewia no/Oafa adze	Onyinsen
Ne yafun redan no kaw	Okom dze no

Ɔdze ne nsa abɔ dua mu	Ɔaka dza wɔnnka/ ɔabo mbusu
Ɔasan awoe/Nsa annka	Abɔdomaba a ɔawo no fofor bi ewu

Mbubudo

Yeehu dɛ, kasambirenyi yɛ kasa mu nkyen a ɔma kasa yɛ dɛw na ɔyɛ huam. Ɔyɛ kwan ɔkasafɔ bi fa do fura asem bi tam ma ne ntsease nnda edzi prɛko prɛ. Kasadwumfo dze dɛm kasasu yi dzi dwuma bebereɛ. W’akenkan mu no, ɔyɛ a hyɛ no nsew.

Dwumadzi

1. Kyerɛ kasasu ase yie
2. Kyerɛw siantsir anan a Mfantsefo nndzi kasambirenyi ho agor.
3. Kyerɛw kasa mbirenyi enum a onnyi buukuu yi mu na kyere ase

Tsir 3: Adwenmu mfonyintwa

Nyienyim: Kwan kor a akyerɛw kasadwumfo fa do ma hɔn akyerɛw nye nokwar sɛ nye dɛ, wɔdze nkasafua a otwa adwen mu mfonyin hyehye hɔn akyerɛw mu. Dɛm adze yi a wɔyɛ yi boa ma akenkanfo bi tɔ kɔ do kenkan buukuu bi osiandɛ ɔma ɔkenkanfo no dze n’adwen bubu dza ɔkyerɛwfo no reka no na ɔdwen ho kɔ ekyir. Ma yenhwe adwenmu mfonyintwa kasasu no n’adzeban.

Botae:

Adzesua yi nko ewiei no, nna itum

1. Kyerɛ adwenmu mfonyintwa kasasu n’adzeban

Adwenmu mfonyintwa n’adzeban

Dɛ mbre ne dzin tse no, adwen mu mfonyintwa yɛ nhyehyɛɛ bi a ɔwo kasadwin mu a akyerɛwfo dze nkasafua bi yɛ ma otwa mfonyin wɔ akenkanfo hɔn adwen mu. Ɔnnye dɛ adwen no mu mfonyin ara keke, na mbom, dɛ mbre Wolosky, (2001:188) na Hirssch, (1999:286) kyere no,

mfonyin no na nkasafua no wɔ nkitsahodzi bi a ɔma yetse awenseɛ no ase na ɔsan ma yehu no wɔ adwen mu na enyi do.

Gray (1984:102) so kyere de, “mfonyin” ye ahyensewdze a yedze ma kasafua bi dze kyere mbre yesi hu ndzɛmba bi a enyi tua ho. Se kasasu bi tse de ngyinahoma anaa ntotohoseɛ ma hen mfonyin bi na ɔtwetwe hen atsenka a, ɔno na wɔfre no adwen mu mfonyintwa no. Dem mfonyin yi mu dodow no, wɔdze kyere kasasu ahorow a ɔwɔ kasadwin bi mu. Iyi boa ma okenyan akenkanfo hon atsenka.

Hwe mfatoho a odzi do yi: *Ɔye ogya* (Ngyinahoma). Dem ngyinahoma yi ye mfonyin kann bi na atsenka a ɔkyere adze hu (de obi dze n’enyiwa ehu biribi na obotum akasa afa ho). Ɔsan kyere atsenka; de yetse biribi ne nka wɔ hen wer mu.

Migyedzi de, erekenkan yi ara no, ogya ho mfonyin aba w’adwen mu na erodwen mbre adze kor a wɔreka ho asem no sin ye ogya se na ogya noara no bobea. Iyi ntsi, yeka de, dza adwenmu mfonyintwa kasasu yi ye nye de, ɔfa kasasu ahorow do kyerekyere nsem, ndzeyee na adwen ahorow mu wɔ kwan bi do ma obi hu no pefee wɔ enyido. Ɔboa ma akenkanfo twa dza wɔreka ho asem ho mfonyin de mbre asem no ye nokwar. Ɔboa ma akenkanfo hon ntseasee wɔ biribi ho no dzi mu.

Bio, mfatoho bi tse de: *Nna wimu aye sum kebii naaso, nworaba puei ma wimu hyerenee*. Dem mfatoho yi mu no, wɔdze ahosu bi (sum na kan) na wɔdze rutwa mfonyin afa mbre wimu yee.

Hwe mfatoho iyi so: *Wɔdze nsanku ndze see kommye a nna ɔwɔ ho no*. Dem mfatoho yi so, ihu de wɔdze ngyegyee na wɔdze rutwa mfonyin afa dede na kommye ho.

Kasasu ahorow a ɔtaa boa twa adwen mu mfonyin no bi nye enyihanhan, ntotoho, ntsimu/nsisido, ngyinahoma, se-nyimpa na asesese. Yetum so gyina otsie ho ndzɛmba bi tse de ndwom, nsem, dede na kommye do twa adwen mu mfonyin fa biribi ho. Yegyina ndzɛmba a enyitua ho do tse de ahosu, bobew, adze bi ne keseye do nya adwen mu mfonyintwa. Yesan gyina ndzɛmba a yetum dze ns aka anaa yetum suomu do; mbre biribi ye mberew anaa dzen fa twa mfonyin wɔ hen adwen mu. Afei so, yenam tekyerema kahwe do so twa mfonyin wɔ hen adwen mu. De adze bi ye dew, ɔye wen, ɔye nkyen, ɔkaw nyinara no, yegyina do twa biribi ho mfonyin. Mfar anaa nka so boa adwenmu mfonyintwa: ɔye huam, ɔbon anaa ɔye nyan so boa twa adwen mu mfonyin fa biribi ho

Mbubudo

Nkyerekyeremu a yedze ama wo sor ha no da edzi pefee de, adwenmu mfonyintwa nnye kasasu kor, mbo, kasasu ahorow a wɔboa ma akenkanfo tse akenkan bi ase yie tse de mbre hon enyi tua adze kor no ho. Otum ba de, akyerew kasadwin bi wo ho a, buukuu no no mu nsem no nyinara twa mfonyin wo adwen mu onam mbre okyerewfo no esi dze nsenkuw na nkasafua ahorow akyerew no ntsi. Yenam dem mfonyintwa yi do nya ntseasee mapa fa akyerew kasadwin bi ho.

Dwumadzi

1. Fa woara wo nkasafua kyere adwenmu mfonyintwa kasasu ase yie.
2. Fa mfatoho a ofata kyerekyere mu.

Tsir 4: Ngyinahoma/ Asesesem

Nyienyim: Afei, yefe de yeka ngyinahoma na asesesem/ntotoho ho asem osiande no so ye kasasu a yetaa hyia wo akyerew kasadwin mu papaapa onam dwuma ahorow a wodzi ntsi.

Botae:

Adzesua nko ewiei no, nna itum ye mpensampensamu fa

1. ngyinahoma ho
2. asesesem/ntotoho ho

4.1. Ngyinahoma

Ngyinahoma ye kasasu a kasadwimfo dze dzi dwuma wo ber a odze adze bi rototo biribi fofor a wonnyi twaka biara ho. Wotaa dze kasafua 'ye' na wodze kyere nkitsahodzi a oda dem ndzemba no mu. Wotum ka de ebia '*Kwesi ye ponko*'. Dem ngyinahoma yi kyere de, Kwesi wo ponko no suban ahorow bi ntsi wodze ponko no egyina ho ama Kwesi. Suban a ponko wo no bi nye ahoodzen, nsunom, enguantu na adze. Yetum so dze obra toto oko ho na yeka de '*obra ye ko*'. Yedze iyi kyere de, abrabɔ nnda famu de mbre oko so nnda famu no. Abrabɔ mu wo nkukuhwease, opira, amandzehu, ahoboaboa na dza okoka ho. Ngyinahoma ahorow bi so na odzidzi do yi:

- Ɔye preko
- Amba ye bɔdɔm
- Ɔye enumfo tebrebe a mbofra nyinara num ano.
- Ɔye ɔtwe
- Ɔye ɔdɔtɔ a n'ase wɔ nwin

4.2. Asesɛsɛm/Ntotoho

Iyi ye kasasu a yɛdze ndzɛmba anaa adwen ebien a ohyia toto ho ber a yɛdze nsem bi tse dɛ: *tse dɛ, dɛ, kyen, sen*, toto dɛm ndzɛmba ebien yi mfinimfin. Wɔdzɛd ntotoho dzi dwuma wɔ nsagu mu, daadaa nkɔmbɔdzi mu, afotu kasa mu, ayan, ndwom ahorow na nsui mu. Wɔkyerɛ a, ntotoho ye ngyinahɔma tsentsen. Mfatoho:

- Ɔye boniaye kyen akokɔ
- Oguan dɛ pɔnkɔ
- Ɔye obur dɛ preko
- Onyim nyansa tse dɛ Ɔhen Solomon
- N'ano nsu dɛ nwaba
- Ɔaber dɛ ngo
- Ɔhyeren dɛ nsorma
- Ne tsirmu ye dzen kyen owu
- Omuo dɛ anyen

Mbubudo

Adzesua yi mu no, yɛahwɛ asesɛsɛm na ngyinahɔma adzɛban, mfaso a ɔwɔ ho na no ho mfatoho bi. Dza ɔwɔ dɛ eyɛ nye dɛ, aber biara a ebɛkenkan buukuu biara no, hwɛhwɛ dɛm kasasu yi wɔ mu na hwɛ dwuma a ɔkyerɛwfo no dze ridzi.

Dwumadzi

1. Kyerɛkyerɛ Mfaso ebien ebien a ɔwɔ ngyinahɔma na asesɛsɛm ho dɛ mbɛ wɔdze dzi dwuma wɔ akyerɛw kasadwin mu.
2. Kyerɛ sorbi sorbi kor ebien a ɔda ngyinahɔma na asesɛsɛm ntamu.
3. Ma ngyinahɔma na asesɛsɛm ho mfatoho ebiasa ebiasa.

Tsir 5: Ekyirhwe/nkomponbu na kanhwe/nkontsembɔ

Nyienyim: Adzesua yi mu no, yebɔhwe kasasu ebien bi so a kor bɔ nkɔntsen tow kandzea hwe enyim na kor so nam nkomponbu do hwe ekyir kaakaa dza osii ansaana dza yeruhu anaa yeretse no sesei no reba. Dem kasasu ebien yi nom nye *kanhwe/enyimhwe* na *ekyirhwe*.

Botae

Adzesua yi nkɔ ewiei no, nna itum:

1. Pensapensa kanhwe mu pefee
2. Pensapensa ekyirhwe mu pefee

5.1. Ekyirhwe

Ekyirhwe/nkomponbu ye ahwee bi a woye dze twa anaa hye nsem anaa ahwegor dwumadzi bi mu dze kyere nsem anaa ndzeyee bi a esi dada wo dwumadzi no mu no. Iyi ye kwan bi a kasadwin akyerewfo fa do dze kyere ahwee bi a okyere ndzemba bi, nsem bi anaa biribi a odzii kan sii ansaana ebi a wohyee dwumadzi no ase. Iyi ye nkyerekyeremu bi a wodze boa akenkanfo anaa bodweadzefo ma wotse ndzeyee bi a agorba bi da no edzi no ase. Mpanyin se, “ɔpe nnsi kwa” Ekyirhwe tum ye asem bi ho nkaakaa, anaa adwendwen, atosem bi anaa daa bi a agorba bi soe. Ekyirhwe mu no, otum ba de agorba bi tum kaa biribi awerefir mu. Se ɔba no dem a ɔma agor anaa dwumadzi no nyina dan bu nkompon ko ekyir kohwe nsem bi a osisii no ara dze besi dza wowo do (sesei) no do. Se ekyirhwe anaa nkomponbu ba ahwegor bi mu a, ɔma obiara hu nsem a osisii ahyese no mbre ɔtse ma ɔbofoa dza esi (sesei) no do ma ntseasee ba dza ɔroko do no mu. ɔye nkaakaa kasasu.

5.2 Kanhwe/Enyimhwe/Nkontsembɔ

Kanhwe/Enyimhwe/Nkontsembɔ nye ekyirhwe/Nkomponbu bo ebira. Aber a kanhwe/enyimhwe robo nkɔntsen atow kandzea ahwe enyim no, nna ekyirhwe nam nkomponbu do rohwe ekyir akaakaa dza dza osii ansaana dza yeruhu anaa yeretse no sesei no reba. Kanhwe/enyimhwe ye kasasu bi a kasadwin akyerewfo bi nam do dze yi asotsir dze kyere dza akenkanfo anaa bohweadzefo nhwe enyim wo dwumadzi no mu. Mpen pii no, yehu kanhwe wo akyerew kasadwin dwumadzi bi n’ahyese. Wodzi kan twa dza obesi wo dwumadzi n’ewiei anaa ne finimfin beebi ho mfonyin kyere bohweadze anaa akenkanfo wo kasadwin no n’ahyese ho ara ansaana dwumadzi nkaa no atoa do.

Mfaso tsitsir a ɔwɔ kanhwɛ ho nye dɛ, ɔboa akenkanfo anaa bɔhwɛadzefo ma wɔdze hɔn adwen kɔ dza oribesi wɔ dwumadzi no mu no do. Iyi boa ma ɔkenkanfo bi si nketse dɛ ɔbɔkɔ do akenkan ehu dza obesi. Dem ara so na bɔhwɛadzefo so ye hɔn enyi penn wɔ dza wɔrohwe no ho. Hwe dɛ ibotum akyerew nsem tsiabaa bi a ɔye kanhwɛ ho mfatoho a.

Mbubudo

Adzesua yi mu no, yehun dɛ, aber a kanhwɛ/enyimhwɛ robo nkɔntsen atow kandzea ahwe enyim no, nna ekyirhwɛ nam nkɔmponbu do rohwe ekyir akaakaa dza dza osii ansaana dza yeruhu anaa yeretse no sesei no reba. Naaso hwe na hu dɛ, kasasu ebien yi nyinara wɔ dwuma soronko a wɔdzi.

Dwuamadzi

1. Ebenadze nye ekyirhwɛ kasasu? Kyere mu yie
2. Fa mfatoho a ɔfata kyerekyere Kanhwɛ kasasu mu yie
3. Ma ekyirhwɛ kasasu ho mfaso ebien.
4. Ma kanhwɛ kasasu so ho mfaso ebien.

Tsir 6: Erekasa kyere woho na Egyinatu

Nyienyim: Kasasu ahorow bio a yebɛka ho asem nye *Erekasa kyere woho na Egyinatu*. Akyerɛwfo taa dze dem kasasu yi dzi dwuma wɔ ahwɛgor mu papaapa osiande ɔboa ma hɔn dwumadzi no ye enyika. Tsir yi mu no, yebɛpensapensa *Erekasa kyere woho na Egyinatu* kasasu mu fann.

Botae

Adzesua yi nko ewiei no, nna itum pensapensa:

1. Erekasa kyere woho kasasu mu
2. Egyinatu kasasu mu yie
3. Kyere sorbi sorbi

6.1.Erekasa kyere woho

Iyi ye kasa bi a agorba bi nye noara noho kasa a, onnkasa nnkyere obiara. Bohweadzefo no hu na wotse de agorba no rubuebue n'ano rekasakasa. Mpen pii no, dem ndzeyee yi ye tsentsen kakra kyen egyinatu. Yekyere de, agorba no kasa kyere kakra sen egyinatu. Mfaso a owo dem ndzeyee anaa kasasu yi ho nye de, oboa ma bohweadzefo no hu dza okoko do wo agorba no ne tsir mu. Dza okoko do wo agorba no mu bi tse de ne tsirmupow, yawdzi, atseetsee, enyigye, awerehow anaa tsebea a ohu no ho wo mu nye dza okoka ho a nkye bohweadzefo no nnyim no nyina da edzi wo dem ndzeyee no mu.

6.2 Egyinatu

Egyinatu, de mbre yehu wo ahwigor mu no, ye kasasu anaa ndzeyee bi a okyere ber a agorba bi bekasa wo agoprama no do akyere bohweadzefo wo aber a ne mfefo agormba nkaa no nntse bi. Bohweadzefo no ara na wotse dza dem agorba no reka. Dem kasasu anaa ndzeyee yi ye tsiatsiaba koraa kyen erekasa kyere woho no. Mfaso a owo egyinatu ho nye de, oboa ma bohweadzefo tse nsem bi a ofa agormba nkaa no ho. Osan so boa ma bohweadzefo hu adwen a okasafo no dwen fa agofomaba nkaa no ho. Fa dem kasasu yi toto egyinatu a oko do wo asendzi mu ho.

Mbubudo

Adzesua yi mu no, yeehu de, erekasa kyere woho na egyinatu nyinara ye kasa ahorow a oko do wo akyerew kasadwin mu nkankaara ahwigor. Erekasa kyere woho ye kasa bi a agorba bi nye noara noho kasa a, onnkasa nnkyere obiara. Egyinatu so ye ber a agofoba bi kasa kyere bohweadzefo wo aber a ne mfefo agormba nkaa no nntse bi

Dwumadzi

1. Kyere iynom ase de mbre wodze dzi dwuma wo akyerew kasadwin mu:
 - a. Erekasa kyere woho
 - b. Egyinatu
2. Kyerew mfaso ebien ebien a owo erekasa kyere woho na egyinatu ho
3. Kyere sorbi sorbi ebien a oda erekasa kyere wo ho na egyinatu ntamu.

KUW 4: ƆBRA WƆTƆ BO BO MU MPENSAMPENSAMUYE

Mbueienyi:

Kuw yi mu no, yebeye **Ɔbra wɔtɔ bo bo** buukuu no mu mpensampensamu. Dem buukuu yi mu mpensampensamuye yi boboa ama aatse nsem a yeakasa afa ho no mu biara ase yie. Ndzemba ahorow a yebɔhwe wɔ kuw yi mu nye sibeaber, agofomba a horow a wɔwɔ buukuu no mu na hɔn su ahorow. Yebesan ahwe botae na nsentsitsir ahorow a ɔkyerɛwfo no gyinaa do kyerɛw buukuu no. Afei, yebesan ahwe esuadze ahorow a ɔwɔ buukuu no mu. Kasasu ahorow a ɔwɔ buukuu no mu no so, yebɔhwe. Dza yepɛ de eye nye de, epɛ buukuu no bi na ekenkan de mbɛ ɔbeye ebetse mpensampensamuye no ase yie.

Botae

Adzesua yi nko ewiei no, nna itum kyer

1. Oبرا woto bo bo no towbo na ne sibeaber
2. Agofomba etsitsir a wowo buukuu no mu bi na hon dwumadzi
3. Botae
4. Esuadze
5. Esuadze
6. Buukuu no no mu nsem na buukuu no ne dzin no mu dzi

Tsir 1: Oبرا woto bo bo no towbo na ne sibeaber Nyienyim:

Tsir yi mu no, yebobo buukuu no tow na yeahwe ber na bea a okyerewfo no kyerew no buukuu no wo mu. Yebeka okyerewfo no ho asem kakra na yeaka buukuu no so no ho asem kakra. Ma yenko do ε.

Botae

Adzesua yi nko ewiei no, nna itum

1. Bo **Oبرا Woto Bo Bo** no mu nsem no tow
2. Kyere ber na bea a wokyerewfo buukuu no wo mu

1.1. **Obra Woto Bo Bo** no towbo

Obra Woto Bo Bo ye abasem/ayesem buukuu bi a Owura D.E.K.Krampah na okyerewee. Buukuu no fa abrabo mu nsem ho. Odze afotusem ahorow to gua. Buukuu no wo krataafa 103 na tsir 16.

Tsir biara wo etsifiasem a obo dza owo mu no ntow.

Buukuu no fa anyenkofo beenu bi a wohyee hon anyenkofa no ase wo hon mbofraber mu. Anyenkofo beenu yi hon edzin nye Kofi Amponsa na Kodwo Kusi. Wowee skuul wo afe kor mu. Woyee hon adwen de wobeye aborofa dwuma mbom Kodwo Kusi n'egya tuu no fo de onsua nsaanodwuma. Osor hon mu kor biara edwuma a ofae de obeye. Mber guu mu no, Kofi Amponsa faa enyiber bon tutuu mbirika wo obra mu. Kofi Amponsa kowiaa edwuma mu ndzamba osiande nna ope de onya noho mber tsiaba bi mu, ma okedaa efiadze. Kofi Amponsa n'ahoto no ne kese fi epiapia a ne na Ehuramba dze piapiaa no no do. Obaa no, okaa n'enyi famu hwee ne nyenko Kodwo Kusi ne bra ho hyee obra fofor ase. Odze no nkakrankakra dem araa ma mber guu mu no, onyaa ahoto na enyimnyam de mbre Boadze hyehyee maa obiara no.

Nokwar, obra woto bo bo. Kodwo Kusi dze, otoo no bo ase bo ne bra no, ndzamba kor yie maa no. Owo mu de nna ahyese no onnda famu dze naaso, odzii konyim wo abrabo do. Kodwo Kusi so n'edwuma tuu mpon na obeye odzefo.

1.2. **Obra woto bo bo ne sibeaber**

Se yeka sibeaber a nna yerepe akyere ber na bea a okyerewfo bi dze no buukuu bi mu nsem wura mu.

Aber yi, ma yenhwe ber na bea a okyerewfo no kyereew no buukuu no wo mu. Wodaa buukuu yi edzi wo afe 1977 mu. Iyi kyere de, okyerewfo no ne nyimdzee wo ndzamba a nna etwa noho ehyia wo dem aber no mu no na ogyinaa do dze hyehyee buukuu no mu nsem no. Kasa a okyerewfo no dze kyereew no buukuu no ma yehu de owo nyimdzee wo Mfantse kasa ho. Yetum so gyina Mfantse kasa no do ka de, Duaseman a oboe no wo Mfantseman mu iyi ntsi, asem no sii wo Mfantseman mu. Se yeyi Mfantseman mu a oye beebi a abasem yi sii fi ho a, yetum so ka de abasem no sii wo Duase. Okyerewfo no ka de, "Mber bi a abasen ko no, mberantse beenu bi tsenaa ase wo

Duase wɔ Akanman mu.” Iyi ma yehu beebi potsee a abasem no sii. Iyinom fi ho a, abasem no mu nsem no bi sisii mbea ahorow bi tse de Kofi Amponsa na Kodwo Kusinom hon efie fi na hon adan mu, Gyamatado kwan mu, guamu, Sekunde, Swedru, efiadze, na mbea ahorow pii a okyerewfo no maa n’agofomba no dzii dwuma wɔ ho. Hye no nsew de beebiara na dwumadzi potsee a okyerewfo no maa agofomba no dzii wɔ ho.

Se yehwe ber a dwumadzi no kor do no so a, yebeka de nna nye tsetse mber naaso, nye tsetse ber a onnyi ekyir pii. Yehwe ndzemba a osisii buukuu no mu a, nna nye mber a nna Aborofo aba Sika Mpoano ma wodze abaefor ndzemba bi tse de skuul, hen, krakyedwuma bi tse de aporisi edwuma nyinara aba. Dem ndwuma yi nyinara da edzi wɔ buukuu no mu. Agofomba no hon nyimdze na hon adwen wɔ ndzemba bi ho no so boa ma yehu ber a wokyereew buukuu no. Yehu de, dem aber no a wokyereew buukuu no, nna skuulko nnyee pii tse de nde mber yi. Nna nkorɔfo hon adwen wɔ skuulko ho no wɔ famu ntsi, yehu de okyerewfo no mpo pegyaa edwumasua na kuwadwuma wɔ buukuu no mu osiande dem aber no, nna ono nye ndwuma ahorow a no ho hia Akanfo papaapa.

Mbubudo

Hye no nsew de, se epe de ihu mber na bea a okyerewfo bi dze no ndwuma hyee mu a, ndzemba bi a wɔ de ehwehwe no mu bi nye ndzemba anaa amambra ahorow a oda edzi wɔ buukuu no mu. Dem amambra no bema ehu ber kor a nna wodze dem amambra no dzi dwuma wɔ mu. Mpo edziban ahorow, agofomba no hon adwen wɔ ndzemba bi ho no so ma yehu ber na bea bi a wodze kasadwin edwuma bi hyee mu. Otɔfa bi so, okyerewfo noara ka wɔ buukuu no mu ber ba bea pokyee a okyerewfo buukuu no. Hye no nsew bio de onnye beebi faakor anaa aber kor per mu na akyerew bi ko do. Ber no tum ye tsetse anaa abaeforber. Otum so ye anapa, ewiaber, ewimbir, anafua, afahyeber, eyiyeber na adze. Otum so ye dapen no no mu nda no mu biara; Kwesida, Dwowda, Benada na adze. Ber na bea no tum kyere agofomba a okyerewfo no dze hon dzi dwuma. Okyere okyerewfo no botae so na oboa ma yehu amambra ahorow.

Dwumadzi

1. Kenkan D.E.K.Krampah no buukuu **Obra Wɔto Bo Bo** na fa woara wo nkasafua bo no tow.
2. Fa mfatoho a ofata kyere ber na bea a D.E.K.Krampah kyereew no buukuu **Obra Wɔto Bo Bo** wɔ mu.

Tsir 2: Ɔbra Wɔtɔ Bo Bo mu agofomba bi na hɔn dwumadzi

Nyienyim: Ɔkyerɛwfo D.E.K. Krampah dze agofomba pii dzii dwuma wɔ “Ɔbra Wɔtɔ Bo Bo” mu. Dem agofomba yi, da su ahorow pii edzi kyere akenkamfo. Dem agofomba yi mu bi nye Kofi Ampɔnsa a ɔka Kodwo Kusi ho ma wɔyɛ otsiban/agofomba etsitsir wɔ buukuu no mu. Maame Ehuramba, Ɔpanyin kwesi Badu, Ɔpanyin Yaw Fori, Maame Esi Fuaa, Kɛsewaa, Kɔsemaa, Tweba, Enntsie na agofomba pii na ɔkyerɛwfo no nam hɔn do dze no botae to gua. Tsir yi mu no, yɛbɔhwɛ agofomba ebiasa na kwan a wɔfaa do boae ma buukuu no mu nsem no dzii mu.

Botae:

Adzesua yi nko ewiei no, nna itum:

1. Ka Kofi Ampɔnsa noho asem
2. Ka Kodwo Kusi noho asem

3. Kyere Ehuramba no su

2.1.Kofi Ampɔnsa

Kofi Ampɔnsa noara so na wɔfre no Ananias Kofi Baidoo. Ɔye otsiban wɔ wɔ buukuu “Ɔbra wɔtɔ bo bɔ” mu. Kofi n’awofo nye ɔpanyin Kwesi Badu na Maame Ehuramba a hɔn nyina fi Duase. Kofi Ampɔnsa ye obi a nna n’awofo hɔn nsamu ye. Ɔye nyimpa a no noho kwaw, ɔwar, noho ye dzen na ɔbɔ mbɔɔɔden wɔ adzesua mu kakra. Ampɔnsa wiee skuul no, ɔdze hyee n’adwen mu de akrazyedwuma ara na ɔbeyee. Iyi ntsi, ɔkyerekyerew edwumahwehwe ho krataa dze kor ndwuma ahorow mu ma wɔfa no ma ɔbeyee krakyedwuma no. Owaar Kesewaa kor Sekunde na ɔnye no woo mba baanan.

Dza yebeka afa Ampɔnsa ho bio nye ne kasakwan; ɔnam de ɔye nyimpa a otuw noho ntsi ber bi a ne nyenko Kodwo Kusi kaa kyeree no de n’egya de ɔdze no boko ekosua edwuma no, dza Ampɔnsa kaa nye de “Oo efuratamfo ye mbɔɔɔr ae! De wo Papa nnhu few biara wɔ akrazyedwuma mu? Eben na ɔye few sen de aberentse behye ɔsortar fufuw egu famutar na asopaatsee fofor do? Eben ye ahomka sen dem.....Yehu dem asem yi wɔ (Krataafa 10). Iyi ma yehu de Kofi Ampɔnsa innym kasa. Ommbu adze so, na ɔye ahomado. Kofi Ampɔnsa buu Kodwo Kusi na n’awofo de wɔye nkorɔfo a wonnym dze. Nyame nam ne nyenko Kodwo Kusi no nkɔmbɔɔɔdzi wɔ n’edwumasua ho kasaa kyeree Ampɔnsa naaso nna ntsen edzi kan ahye no mu ntsi oenntsie. Su kor so a ɔwo Kofi Ampɔnsa ho nye de onnyi abotar. Dem suban yi a ɔwo noho yi ntsi na ɔmaa ɔkyerewfo no too buukuu no dzin Ɔbra Wɔtɔ bo bɔ no. Odzi kan no, kofi ennya abotar amma ne nyenko Kodwo wɔ n’edwumasua ho a ɔdze too n’enyim no ho. Ɔdze ebufuw kekaa nsem tsiaa kodwo ara ma ɔdaan ɔham wɔ hɔn ntamu. Kofi Ampɔnsa anntweɔn ma Kodwo emmfi ho koraa na ɔdze ebufuw fii dan no mu dze ham puei. Yehu iyi wɔ krataafa dubiako (11). Dza otsia ebien nye de Kofi ennya abotar annhwehwe ne sika sidi anan a ɔyewee no na ɔdze hyee Kodwo kusi a onnym ho hwee no.

Kofi Ampɔnsa ye edwumadzen. Wɔfaa no edwuma mu de ɔnkɔhwe aban adansidwuma ndzemba do. Kofi bɔɔ n’awofo na nkorɔfo amandzee na n’egya yee ahoboa sii mu nye no koree kɔhwehwee obi dze no hyee ne nsa. Adze kyee no Kofi kehwee n’edwuma ase. Ɔbɔɔ mbɔɔɔden wɔ n’edwuma mu ma ɔhwedofɔ no nyaa noho enyigye. Ɔkyerew fie bɔbɔɔ n’egya na ne na amandzee de biribiara rokodo wɔ n’edwuma mu yie.

Ber a Kofi Ampɔnsa nye n’awofo ribedzi nkra na ɔakehye n’edwuma ase no, afotu a wɔdze maa no no bi nye de onhwe yie wɔ edwuma a ɔrekeye no mu, ɔnye setsie na mbrehoadze na afei ɔmfa

biribi mbra fie (krataafa 33). Kofi annye setsie. Se ɔyɛɛ setsie na ɔbrɛɛ noho adze wɔ n'edwuma no mu a, nkyɛ oenntutu mbirika annkɔtɔ mbusu mu.

Kofi nnye badwemba. Ɔdze n'adwen maa ne na. Ne na Ehuramba huhuor no na ɔdze ne gyinabew wɔ edwuma no mu ho nkɔmbɔ kyinii bɔɔ man adze. Kofi noara so hyɛɛ ase hyehyɛɛ ntar a ɔdzi mu na ɔyɛ few mapa dze kyereɛ de ampa, ɔwɔ dzibew na afei so ofi kurow kɛse mu bae. Dem ntuw sunsum a ɔwɔ Kofi Ampɔnsa ho yi maa ɔkasaa kyereɛ no nuanom de gyama ɔwɔ tum a wɔdze fa nyimpa wɔ edwuma mu. “Se hom wie skuul a, medze hom nyina bogu edwuma mu”. (Krataafa 37). Binom mpo nyaa no ntsee de Kofi nye panyin a ɔfa nyimpa wɔ edwuma mu. Dem ntsi egyanom binom bohun no wɔ Duase de ɔmbɔ mbɔdzen mfa hɔn mba wɔ n'edwuma mu.

N'egya kwesi Badu maa no afotu pii naaso Kofi ammfa no mu biara annye hwee.

Kofi Ampɔnsa ye obi ɔmena noho do na ɔyɛ ntsen so. Onnyi Ahobrease na abotar su koraa. Ɔgye noho dzi dodow. Yehu n'ahomemado wɔ nkɔmbɔ a ɔnye Duasefo a ohyiaa hɔn no dzii. Ɔdze n'akɛseyɛ tahyee na aber biara ɔka de obesi brɔɔgdan kɛse na ɔatow afasin ato ho (Krataafa 45). Ampɔnsa ennya enyidzi biara de ɔbɔhwɛhwɛ asaase a ɔpɛɛ de osi dan wɔ do no wura na oetu ho nsa ama ɔaama kwan ma oesi dan no. Ɔdze noara ne pɛ faa asaase no osiande oenya sika ntsi, ɔdze ne pɛ yɛɛ dza noara pɛ. Iyi ye suban bɔn a ɔwɔ Kofi Ampɔnsa ho a onnyi de ɔkenkamfo biara foa do. Abaatan pii dze no yɛɛ mfatofo dze tuu hɔn mba fo osiande Ampɔnsa beyɛɛ kasabɔdzin wɔ fie biara mu wɔ Duase hɔ. Wɔhwɛɛ no wɔ enyi do na woennhu de nna Ampɔnsa rututu mbirika dodow wɔ n'abrabo mu.

Kofi ye ewi. Kofi faa dzibew a ɔdzi wɔ edwuma no mu de ɔyɛ noara n'apɛsemadzi ntsi ɔdze no tum wiaa adansi ho ndzɛmba tse de sɛment, ntaaboo, nkyense a wɔdze kur dan, ndadze a wɔdze si dan na dza ɔkeka ho fii Sekunde baa Duase dze behyɛɛ ne dan si ase. Ɔkyerewfo no ma yetse ase de Kofi ammfa dakor pɛr wiaa dem ndzɛmba a ɔtsetse dem no. Ndzɛmba no mu bi mpo ye dza ɔtɔntɔnee na onyaa sika botwo so dze besii ne Maame Ehuramba ne nsamu de ɔmfa ntuatua edwuma no ho akaw. Nda nyina nnɛ, de mbre mpanyimfo dze aye akasabebu no, anafua dakor a Ampɔnsa wiaa Aban ndzɛmba sɛment adzesoa ara twir a taapoor kata do maa hɛnkanyi bi na no beɛnyi de wɔmfa nkɔ Duase ma wɔmfa nkotoa ne dan no do no, Nyankopɔn yii n'etsir do ahatsew. Nna Sekunde aporisifo a wɔwɔ aban ne mpampi (barrier) ekyir enya no ntsee de wɔnkyer hɛnkanyi no. Wobisaa hɛnkanyi no nkrataa biara a ɔda ndzɛmba no do na dza ɔkae ara nye de ndzɛmba no nnye ne dze na ne panyin Ananias Kofi Baidoo na ɔsoma no ne dze a. Aporisifo no kaa hɛnkanyi na ne beɛnyi no koguu dan bi mu na wɔnkaam hɔn do. Annkyer koraa na Duase kurow mu hyɛɛ

ase yee huhuhuhu. Nkorɔfo hyee ase kekaa de Kofi Amponsa enya asem wo n'edwuma mu. Binom kaa de wodze no akoto efiadze na binom so mpo kaa de oepira ma oda ayarsabea. Dem nsem a ofa Kofi Amponsa ho yi tahyee ma nkorɔfo dzii ono na ne na Ehuramba eduwa dodow.

Kofi n'egya tsee asem no na ɔkor Sekunde de ɔrokɔhwehwe nokwar a ɔwo mu. Kofi kaa mbre nsem no sii bae nyina kyeree n'egya na bobor boor ɔpanyin Badu. ɔtaa dzinn kakra na afei obisaa no de ɔye nokwar de dem ndzemba a wɔse beye mfe anan yi afa nyina woara fae? Kofi dze su yii n'egya ano de noara na ofa na ɔtamfo abonsam na odaadaa no. ɔye nwanwa de, ɔkaa nokwar a ɔwo asem no mu nyina kyeree n'egya. ɔkenkanfo na ɔtamfo abonsam a odaadaa Kofi nye woana?

Oennsi abotar, ɔannye setsie amma n'egya n'afotusem pii a ɔdze maa no de onhwe yie na ɔbra woto bo bo no, ɔmaa sika ho enyiber na akɛsedze ne ye ho enyigye hyee no ma, ɔdzii ne maame Ehunramba n'afotu bon do na iyinom nyina na ɔdaan abonsam daadaa no.

Ekyir no Kofi dzii yaw pii de ɔnam n'ewisem ntsi n'ebusuafo hweer sika dodow wo no ho. Ohun de enyinguase ato no ntsi n'asem nye “Mara se Nyame boa me ma mifi dem asem yi mu fi a nna mobɔhwe yie” (Krataafa 85). Aporisifo wiee hon nhwehwemu wo asem no ho na wodze Kofi Amponsa kor asedzibea. Wɔbɔɔ no sombo pii wo n'ewisem no ho buu no fo a oennya ano yi biara ennyi. Wodze no kotoo efiadze afe kor de onkeye ekurutudwuma na ɔba so a ndzemba a ɔfefae no nyina no so oebotua ama aban. Atsembu no tahyee kurow no mu ho nyina na dza dodowara wɔkae nye y; nokwar mpanyimfo kae a wɔmmboa de: “Anantu a ɔso kyen sere biara no nna yarba wo mu.”

Afei so “Dua bi annkyer nyin a nna osi kukuw enyim”. Oo, saa atwer ewu a nkye yeehu ne tsentsen ampa. Kofi Aponsa nda a wodze hyee no no soe ma woyii no fii efiadze bae no, fer kaa no dodow naaso ɔgyee afotu a ne nyenko Kodwo Kusi dze maa no no too mu ma dza noara ɔannhwehwe ekyir kwan de ɔbeye no afei, ɔnye ne yer yee kuadwuma, suoo hon adar mu. Esuafo, se yese yereka Kofi Amponsa noho nsem a mber bɔbɔ hen. No ntuw, ne seanntse, ne tsen, ne mbirikatutu wo abraɔ mu a abotar na enyidahɔ biara nnyi mu ntsi, Amponsa fii n'akrakyedwuma mu beyee okuafo.

2.2.Kodwo Kusi

Kodwo Kusi n'egya nye ɔpanyin Yaw Fori na ne maame nye Esi Fuua a hon nyina fi Duase. Kodwo n'egya yee n'adwen de ɔnnkefa no ako skuul. ɔpee de nkye ɔnye no beye hamu dwuma ama oeehu n'asaase n'ano osian de Kodwo nye ne ba banyin a odzi kan. Kodwo Kusi no wɔfa Donko anngye egya no n'adwen annto mu. Ekyir no hon beenu nyina hon adwen yee kor de kodwo

boko skuul. Kodwo Kusi ye nyimpa a owo abotar na oye badwenbanyi, otum sepe noho wo enyigyeber mu na onnye ahomemado. Onyaa adwen de obeye akrakyedwuma na mbom n'egya dze too n'enyim de ope de oma osua fitadwuma. Dem asem yi annye no dew naaso ekyir no ogyee n'egya no nsusii no too mu na odaa n'egya ase. Wokotuu Kodwo ne tsinsa wo Kumase ma okehyee n'edwumasua ase.

Mfe ebiasa a Kodwo dze kosuaa fitadwuma no soe ma n'egya kopoon no. Woboo no esu na no wura no hyiraa no de afei oaye panyin ntsi omfa konyimdzi mpaa no ho nkehye edwuma ase mpe nedze. Dom pii fi Kodwo n'egya na ne na afamu na bi so fi Owura a okyeree no edwuma no n'afamu. Wodze enyigye yee amandze no dze poon Kodwo too mpanyin wiase mu. Wowiee amandze no nyina ye no, Kodwo ne kyerefo Kwame Andze kasaa de odze enyigye na pepa hyira no kosokoso de omfa dza oesua no nkobo bra, "mesere de medze enyigye na pepa hyira wo kosekose de omfa dza oesua no nkobo bra "mesere de su pa a okyeree no wo me nsamu no omfa no demara nkobo ne bra".

Yehu de, Kodwo wo ahobrease, abotar na tsema na oye obi so a odwen hwe kan hu dza ndaamba obesi. Iyi ekyir no oye obi a owo enyidzi osiande oemmbu n'egya na ne kyerefo no enyimtsia. Okyererefo Andze hyiraa no ma obehyee n'eduwuma ase. Akenkamfo, se abofra a owo suban pa dem esua edwuma ewie na oapon no a, ana dwetsir boko no? Egya na wofanom no nyina boko okyererefo Kwame Andze anohoba de onnkekyer biara Kodwo ne nsa beka edwindadze nyina ama oetum ahye edwuma ase.

Kodwo kobuee n'edwuma wo Soadur, oye edwumadzen dzii nokwar wo mu ma nkorofu kamfoo n'edwumaye ma ne dzin tahyee. Iyi maa onyaa esuafo pii wo n'ase. Awofu no kraa Kodwo dze too n'enyim de wope de owar. Kodwo gyee too mu na wogyee Abena Sam maa no awar. Onye ne yer a obeye oguandzinyi wo edzibanton mu no nyaa mba beenu. Kodwo a oye badwembanyi a odwen hwe kan no hun de obehia de obeye edwuma fofor bi abata ne fitadwuma noho ama se oye panyin na ogyaa ne fitadwuma a oedzidzi do. Odze too n'egya n'enyim na odzen n'ano totoe nyaa haban bi wo beebi maa no.

Kodwo tuua haban no ho kaw na oye ho amandze biara a ofata wo ho. Ohwehwee apaafo ma wonye no kor haban no mu kehyee edwuma no ase. Woduaa eburow, boredze, dwow, bankye na kookoo. Odze sika a onya fi ne fitadwuma no mu bi boaa n'ekuwadwuma no. Iyi nyina annhaw no nna owo enyigye osiande nna onyim de orebere ma daakye bi oedzi. Obra woto bo bo dem ntsi Kodwo dze abotar, enyidaho, enyidzi na ahobrease yee n'edwuma no. Biribiara a odze yee

n'edwuma no ye adze a noara nyae fii ne nsaanodwuma mu. De mbre adze biara se edze abotar na enyidahɔ hyehye no yie a onyin ye kese no, dem na Kodwo ne yer Abena n'edwuma so yee. Otsiee no kun n'afotusem wo n'egoadzi no ho na onyaa mpontu wo n'egoadzi mu.

Kodwo Kusi tsee no wo soadur de ne gyafɔ Kofi Amponsa enya amandze no, ogyaa ne biribiara a ɔreye too nkyen kor Duase de oriketsie mu yie na se biribi wo ho a obotum aye dze aboa a.... (Krataafa 78). Onua, se ɔwo nye Kodwo a nkye ibotu dem anamɔn yi? Kodwo ammfa dza Kofi Amponsa dza ɔyee no no annye no hwee na ɔdween mboa a ɔfata de ɔdze boa ne nyenko no. ɔde Kodwo n'awofo ye efuratamfo na afei Kodwo nkye ekuadwuma a n'egya hwe a ɔfata no no.

Iyi emmbu Kodwo n'abaw mu. ɔwo a nkye ebeye den? Kodwo n'asem nye de, "Hwen nya a nna enyiwa so enya". Dem ntsi obuu asem a ato Kofi Amponsa no de ɔye noara n'asem na aba. Oyii sika sidi ɔha de ɔno na ne yer dze boa de womfa nsɔw ahoboa biara a wɔreye do mfa mbo asem no ho bra" (krataafa 83). Kodwo tsee ne gyafɔ no nka de woeyi no efiadze ma ɔaba fie ntsi dakor bi osii mu keseraa no. Kodwo no nkɔmbɔdzi na ne ndzeyee maa fer na mfehoakyir kakra a nna ɔwo kofi no mu no fii ho. Kodwo hyee ne nyenko no de ɔmbesera no wo Soadur. Woyee ahoboa dze yee Kofi Amponsa na ne yer awaawaa etuu na wo Soadur. Dza Kodwo Kusi duaa n'afotusem do dze maa Kofi Amponsa nye yi: magye dzi de se efa abotar na enyidahɔ tsie dem nhyehyee yi a eyiedzi beba (Krataafa 99). Tserɛ, Kodwo Kusi ye ɔyamuyiefo, badwemba, do, nyenko pa na no mboa ma ɔmaa ne nyenko Kofi Amponsa n'abrabo sii no yie bio.

2.3.Maame Ehuramba

Maame Ehuramba ye ɔpanyin Kwesi Badu ne yer. Hɔn ba nye Kofi Amponsa. Su a odzi kan a ɔkyerɛwfo no ka fa Maame Ehuramba ho nye de ɔye nyimpa a ɔbo nkwankwan. ɔpe ham na onnyi abotar so. Maame Esi Fuua sereɛ kwan de ɔroko wo ber a obebisaa asem a osii Kofi nye Kodwo ntamu no ɔanngye no do. Mbom ɔhyee ase de ɔreham dedeɛde (Krataafa 14). Ehuramba dze ham twitwi bi faa Duase ɔbrɔn tsitsir no do de Duase atamfo ndabrabafo ei....(krataafa 66). Ehuramba dze hɔn nyinara boɔ mu hyee hɔn ahorba. ɔsanee kor ne fie na ɔkedaa hatsee de mbre biribiara nnsii. (Krataafa 67). Hɔn a wodzii kan tsee asem no bekae no, Ehuramba dze hɔn nyinaa boɔ mu nde ndaansa anafua twaa hɔn de nhwi a wodze oyiwam rutwa. ɔhamee kyeree dodow na ɔye me nwanwa de ese anntse. (krataafa 69).

Maame Ehuramba ye obi a osuo asem mu a onngyaa mu. Kofi ne sidi anan a ɔyewee no, Maame yi nnyim onyia a ɔfaa sika no naaso oduaa kwan bi do de ɔresɛ Kodwo kusi ne dzin wo kurow no

mu. Se oribehyia nyimpa biara a nna oahye ase, “Ewi, otwaa ewi.” Se oka dem ara a nna nyimpa a oehyia no no, egyina ebisa no asem kor a odze nam. Onnyi abaatando. Maame Ehuramba da ho ara gye dzi de Kodwo na ofaa ne ba no sidi anan a oyewee no.

Oye nyimpa a oye apebiakyere. Se wohuhoor Kofi Ampofo ma no so tuuw noho a nna ne na Ehuramba dzi kan. Ono na odze Kofi ne gyinabew boɔɔ oman adze. Nna n’adwen ara nye de odze ne ba no rutuw. Maame Ehuramba amma ne ba no afotu pa wo n’edwumaye mu. “Edwuma a ereye no, oye a dwen fie. Se inya biribiara a fa bra fie ma memfa nsie wo. Seseiara oman yi mu ha dodowara atse bea a wo gyinabew ekodu, nkankaara de aban sement na ndzamba nyina hye wo nsamu yi. Afei so onam de onam de owo na itua edwumayefo kaw yi, mususu de edze sika no bi beba abegye kookoo ahaban, (kraatafa 38). Dem afotubon yi amma Kofi Ampofo anndwen de obra woto bo bo na no nsunsuando na otoo no no. Dem su a yehu no wo Maame Ehuramba noho yi onnyi de obaa biara nya bi ko awar.

Oye nyimpa a oper adze ho dodow. Asem a ommfa no ho mpo nna orekefem edzi. Dan no ara wonnyae nnsii, naaso ono oetum akyekye adankora a owo mu no dada. Oamma no kun Kwesi Badu bi osiande ono onnye busuanyi. Iyi da no edzi de Ehuramba ye oyiberfo. Oye nyimpa a ommfa asem nkye “hoɔ, Tweba, ntsi esi wo bo de enye me beham anaa? Ono gyina yie na wofre me Ehuramba, muhuran de muoko” (kraatafa 64). Oye nyimpa a onnyi abotar, no bo haw no. Onye Tweba dze boɔ enyi ma se nyimpa annko ho ntsem a nkye bon bae. Ehuramba tamee suoo Tweba ne tsinhwi mu twee no taan, na Tweba so boɔ Ehuramba awerow ma n’enyim guu nguar demara. Onam Ehuramba ne ndam ntsi oantse dem huhuhunhu a nkorɔfo kekaa faa Kofi n’asem no ho wo Duaseman mu ho wo n’asomu osiande nna obiara dwen de se oka ma Ehuramba tse a, obetsetse no mu, (kraatafa 65).

Su kor so a odzi wo Maame Ehuramba ho nye de oye obi a onnyi enyidzi ne onntsie afotu so. Yehu dem suban yi wo noho wo mbre osi kasa kyere ne mfeɔ binom na nkankaara noara no nuabanyin opanyin Enu. “Enu ei, ma menka menkyere wo de mma nnye de ebekasa ebubu me mbe biara. Me ba n’asem na yereka na wo so wodze yi? ntsi wo so ewo ho yi inyim nyansa ma tsere irutu emi fo? Morohwehwe mbanyin ma woaaka akyere me nnye owo bi a. Annye yie ara! Annye.....(kraatafa 85).

Owura D.E.K krampah nam Obra woto bo bo do riya dem nyimpasu yi akyere hen ma yeehu de dem nyimpa yinom wo wiase ntsi owo de yehwe henho yie. Bio, oma yehu de su ahorow a Ehuramba daa no edzi no nnye ntsi obiara a owo dem suban yi mu no gyae.

Mbubudo

D.E.K.Krampah nam Kofi Amponsah, Kodwo Kusi, Ehuramba na agofomba ahorow do da no edzi de, suban ahorow pii wo wiadze na no mu biara a obi befa no, no nsunsuando wo ho. Okyerewfo no dze Kodwo Kusi gyinaa ho maa abrabɔ pa na Kofi Amponsa so gyinaa ho maa abrabɔ bɔn. Odze Ehuramba na Esi Fuaa gyinaa ho maa abaatanye na mbatsetse. Ohia de obiara a ɔbɛkenkan buukuu yi mu no bɔhwe suban ahorow a ɔkor do na nsunsuando a no mu biara nyae na odze atoto ne bra ho na se nsesae bi wo mu a, tserɛ ɔasesa.

Dwumadzi

1. Woana nye Kofi Amponsa wo ɔbra wɔtɔ bo bo mu?
2. Kyere mbre Kodwo Kusi na Ehuramba hon su no boa twa suban ahorow a ɔwo wiadze ho mfonyin.
3. Kyere mbre agofomba nkumaa bi tse de Esi Fuaa, ɔpanyin Donko, ɔpanyin Fori, Kɔsemaa, na pii a wɔkeka ho hon dwumadzi boa ma buukuu no dzi mu.

Tsir 3: Botae a okyerewfo no gyinaa do dze hyehyɛ 'ɔbra wɔtɔbo bo' no mu bi Nyienyim

Okyerewfo biara nnhyehyɛ no dwumadzi kwa; wogyina botae bi do. Botae ahorow pii do na D.E.K Krampah gyinae dze kyereew no buukuu yi. Dem tsir yi mu no, yebɔhwe no mu anan per. Kenkan buukuu no na kyerew nkaa no

Botae

Tsir yi mu adzesua nko ewiei no, nna itum kyere botae anan a ɔwo 'ɔbra wɔtɔbo bo' mu. a.

Mbofra hon ntsetsee

- b. Nyimpa no suban ahorow
- c. Ewisem nnye adze papa
- d. Nyenko bi sen onua

3.1. Mbofra hon ntsetsee

Kofi Amponsa na Kodwo Kusi ennya ntsetsee kor. Oson hɔn mu biara mbɛ wosi tsetsee no. "Kofi Amponsa dze, nna sika wɔ ne fie. Ne maame Ehuramba dze sika hyɛ no wɔ ne mbɔfra ber mu." Ehuramba huran dɛ mouko na n'ano yɛ dzen wɔ biribiara mu. Bahyɛbɔn a Ehuramba dze hyɛ ne ba no kowiee no bɔn. Kodwo dze n'awofo maa no tsetsee pa na afutu pa so. Ber a Kodwo n'egya hun dɛ ne ba no ne gyinae a woesi dɛ ɔbeyɛ aban edwuma no nnkɛsi no yie daakye no, otuu no fo dɛ onkosua nsaano edwuma. Kodwo ne maame so tsetsee ne ba no yie ma osii no yie so.

3.2.Suban ahorow

Ɔmmfa ho dɛ Kofi Amponsa na Kodwo Kusi yɛ anyɛnkofo mapa no, nna hɔn suban bɔ ebira koraa." Ntafo mpo ɔson hɔn mu biara hɔn suban." Duasefo nyinara, nna obiara nyim anyankɔfo yi suban. "Kofi Amponsa yɛ obi a otu kakra. Ne siantsir nye dɛ, sika wɔ fie." Nna Kofi pɛ mbasiafosem na onntsei afutu. Ɔkaa dɛ "ɔnnkɛma obiara akyerɛ no dza ɔnye." Kodwo nntse dem. "Kodwo dze ɔdwe na ɔyɛ ɔbadwembanyi. Ɔmmpɛ ntuw wɔ kan biara mu." Mpen pii no, ber a Kodwo bohu dɛ na nyanko Kofi Amponsa rutuw no ho no," ɔka kyere no dɛ Ei Kofi ɔwɔ dze!" Hɔn mu biara suban kyereɛ hɔn ewiei wɔ hɔn abraɔ mu. Kodwo Kusi n'ahobrase boss no maa onyaa edwuma pa na yer pa so waar no. Mbom Kofi Amponsa ne ho a otu na wenttsei afutu pa fi n'egya hɔ ntsi, ɔhweer n'egyapadze.

3.3.Ewisem nnye adze papa

Nokwar, ewisem nnye ad papa. Aba Kɔsema a nna ɔyɛ Kofi Amponsa ne mpona dadaw kowiaa Kofi ne sika wɔ ne dan mu ma wɔdze hyɛ Kodwo Kusi. Iyi dze mansotwe na ekyingye baa anyankɔfo beenu no tamu. Aba Kɔsema nara kaa mbɛ osii faa sika no na siantsir a ɔfae. Ɔkaa dɛ ber a ɔnye Kofi Amponsa twee mpona no, "ɔsee sika wɔ Kofi no ho." Kofi Amponsa so maa ewisem dzii enyim kan. Ne maame Ehuramba tutuu guu n'asomu dɛ "sɛ ɔyɛ a, onwia n'edwuma mu ndzɛmba no bi mbra fie mbeyɛ egyapadze, na aban edwuma dze, dza wɔyɛ ara nye no." Dem afutu bɔn yi tsenaa Kofi Amponsa adwen mu ara ma ɔhyɛ ase dɛ ɔrowia n'edwuma mu ndzɛmba abeyɛ egyapadze wɔ fie. Ewiei koraa no, wɔkyer no too efiedze na dza ɔwɔ nyinaa so fii ne nsa.

3.4.Nyenko bi sen onua

Kodwo Kusi na Kofi Amponsa hɔn anyɛnkɔfa no dze nna ɔyɛ kra bɔhwɛ. Duasefo nyinaa kaa hɔn ho asem dabaa. Dem mbrantse beenu yi yɛ etsipenfo na wɔbɔɔ mu nyinii. Nna wɔtse brɔn kor mu ntsi hɔn anyankoyɛ no hyɛ ase wɔ hɔn mbɔfra ber mu. Mbom nna wɔmmɔ ebusua kor de naaso

mbre osii goree no maa wɔbeyɛ enuanom. Ɔmmfa ho de sikasem ho ekyingye tsetseew hon ntam mfe pii no, Kodwo Kusi boaa Kofi Amponsa yie paa ber a ɔkɔ ahokyer mu no. Ber a woyii Kofi Amponsa fii fieadze no Kodwo Kusi boaa no wɔ sikasem mu na ɔmaa no asase de ɔno na ne yer wondzidzi do. Kodwo Kusi hyɛ ne nyenko Kofi Amponsa bɔ de "ɔtse nkwa mu yi na Kofi Amponsa da ho ara ye ne nyanko yi dze, mboa biriara a obehia ɔdze bɔboa Kofi Amponsa na ne yer kesi ber a obenya anan egyina do bio."

Mbubudo

Ndzemba pii na ɔkyerɛwfo no gyinaa do dze hyehyɛ no buukuu no naaso no mu anan pɛr na yeaka ho asem. Ndzemba bi tse de abaatanɛ na mbatsetse, awar, ndwuma ahorow, asetsena/abrabo mu nsem, na pii a ɔkeka ho. Dem botae ahorow yi ma buukuu no mu nsem nye asetsena mu nsem ye pɛr.

Dwumadzi

Gyina buukuu no mu nsem do kyerekyere botae a odzidzi do yi mu yie

1. Abaatanɛ na mbatsetse
2. Awar mu nsem
3. Ndwuma ahorow
4. Asetsena/abrabo mu nsem

Tsir 4: Ɔbra Wɔtɔ Bo Bɔ no mu Esuadze bi

Nyienyim: Tsir yi mu no, yɛbɔbɔbɔ esuadze ahorow bi a ɔda edzi wɔ buukuu no mu. Ɔkyerɛwfo biara nnhyehye no buukuu kwa. Ɔdze esuadze ahorow hyɛ mu de mbre ɔbeye a akenkanfo benya buukuu no mu mfaso. Demara so na D.E.K. Krampah no buukuu **Ɔbra wɔtɔ bo bɔ** tse. Ma yenhwe buukuu no no mu afotusem no bi.

Botae

Tsir yi mu adzesua nkɔ ewiei no, nna itum kyere esuadze ahorow a ɔwɔ buukuu no mu.

***Ɔbra wɔtɔ bo bɔ* no mu Esuadze bi.**

1. Esuadze tsitsir kor a buukuu yi dze ma hen nye asodzi a ɔda ebusuasantsen mba nyinara do de wɔbɔboaboa mbofra hon ntsetsee. Se ɔnnɛ Kodwo Kusi no wɔfa Donko a nkyɛ n'egya ammfɔ no annkɔ skuul. Buukuu no mu no, odur mber bi no, Kodwo Kusi ne Papa Yaw Fori yɛ de ɔnnkefa no akɔ skuul. Ne siantsir nye de, Kodwo Kusi nye ne ba panyin ntsi ɔpe de otu gya dzi n'ekyir. Kodwo Kusi no wɔfa Donko nye Kodwo Kusi ne papa kekasae ma papa no tsee ase dze no kor skuul. Se ɔnnɛ Wɔfa Donko a, nkyɛ skuulkɔ bɔɔ Kodwo

Kusi. Iyi kyere hen de, se yenya kwan na owo de yebue nkorofu hon enyi anaa yenye nkorofu kasa fa biribi ho a, owo de yeye no dem. Buukuu no ma yehu de, “nna Kodwo Kusi n’ekyir ye har kakra naaso oye nna Wofa Donko aboa n’akontan Yaw Fori ma oekptua”.

Dem ndzeyee yi ye ndzeyee pa a owo de obiara sua!

2. Buukuu no tu fo wo setsie, obu na enyidzi a owo de mba dze ma egyanom, awofu na mpanyimfo ho. Buukuu no ma yehu de, Kodwo Kusi tsiee n’awofu hon afotu pa ma okosuaa edwuma no, osii no yie wo abrafo mu.
3. Buukuu “Obra Woto Bo Bo” si no tadua ma hen de onnyi de nyimpa fa enyiber bon tutu mbirika koto mbusu abaw mu, de mbre Kofi Amponsa yee no. Nyew edzidzi daa daa ye sen edzidzi preko. Kofi Amponsa dze enyiber bon wiaa edwuma mu ndzamba pii dze besii ne dan. Da kor wodze ndzamba no reba ara na aporisifo kyeer henkanyi no a odze ndzamba no na henkanyi no so bo Kofi ne dzin ma wokyeer no kotoo efieadze. Merekasa yi na se noara miaa n’enyi na otsiaa sika nkakrankara dze sii ne dan a, nkye dem asem yi annto no.
4. Buukuu yi no mu nsem hia wo abrafo mu osiande oma afotu pii. Okyere hen de ntuw anaaso ahomemado nnye suban pa de mbre Kofi Amponsa yee no. Onam Kofi Amponsa na na Maame Ehuramba hon suban bon ntsi, asem too hon no, nkorofu pii hon enyi gyee tsebea a wokor mu no ho. Se oye na woye nkorofu a wobre hon ho ase a, nkye nyimpa pii bohu hon mbobor akyen dza osii no.
5. Okyere hen de mbasiafossem nnye. Amponsa kefaa kosema mpona ma owiaa noho sika ma odze hyee ne nyenko Kodwo no, odze akasakasa botoo hon ntamu. Buukuu no ma yehu de mbofra hon ndaamba eyiedzi da awofu do. Kofi Amponsa n’efiadze ndae gyina ne maame Ehuramba n’afotu bon do, na Kodwo Kusi ne yieye gyina n’egya Yaw Ofori n’afotu pa do.
6. Buukuu no kyere de, se eye nyenko a, owo de eye nyenko pa. Kodwo Kusi yee nyenko pa maa Kofi Amponsah wo aber a Kofi kor ohaw mu no. Danndwen dza Kofi dze yee no mber bi no mbom, oye no mboa de mbre ofata.

Mbubudo

Esuadze ahorow pii wo buukuu no mu. No mu fa kakraabi na yeabobo do wo ha yi. Kenkan buukuu yi na hwehwe esuadze ahorow a owo mu na fa toto abrafo ho.

Dwumadzi

Kyerew adzesua ebiasa a enya efi Obra wɔɔ bo bɔ mu. Fa mfatoho a ɔfata kyerekyerɛ wo nsem mu yie.

Tsir 5: Obra Wɔɔ Bo Bɔ no mu Esuadze bi

Nyienyim: Tsir yi mu no, yɛbɔbɔbɔ esuadze ahorow bi a ɔda edzi wɔ buukuu no mu aka dza yɛayɛ no ho. Ɔkyerewfo biara nnhyehyɛ no buukuu kwa. Ɔdze esuadze ahorow hyɛ mu dɛ mbɛ ɔbɛyɛ a akenkanfo benya buukuu no mu mfaso. Demara so na D.E.K. Krampah no buukuu Obra wɔɔ bo bɔ tse. Ma yɛnhwɛ buukuu no no mu afotusɛm no bi so nka dza yeedzi kan ahwɛ no ho.

Botae

Tsir yi mu adzesua nkɔ ewiei no, nna itum kyere esuadze afofor ahorow bi a ɔwɔ buukuu no mu.

Obra Wɔɔ Bo Bɔ no mu Esuadze bi

Adzesua pii na sɛ obi kenkan Obra wɔɔ bo bɔ fi n’ahyɛse kesi ewiei a obenya efi buukuu no mu. Obiara a ɔbɛkenkan no bohu hia a ohia dɛ obenya abotar wɔ n’abrabɔ mu. Mpanyimfo sɛ “sɛ etɔ bo gua ntsetsea a ihu n’ayamudze” na “abotar so tutu nkowaa”. Sɛ Kofi Ampɔnsa nyaa abotar wɔ n’abrabɔ mu a nkyɛ oenntutu mbirika annkɔtɔ mbusu abaw mu. Ɔwɔ dɛ hɛn biribiara a yɛbɛyɛ no, ɔwɔ dɛ yɛnya abotar tweɔn hwɛ dza Nyame beyɛ osiandɛ Nyame ne mber nye mber pa.

Kofi Ampɔnsa na kodwo Kusi wieɛ skuul ma wodzii konyim wɔ hɔn nsɔhwɛ mu no, hɔn awofo kum nkokɔ maa hɔn dze bɔɔ hɔn abaw do. Dza akenkamfo benya efi iyi mu nye dɛ sɛ obi yɛ adze a oye a ɔwɔ dɛ yɛbɔ n’abaw do ma no mbo na yɛ osiandɛ mpanyimfo sɛ “Ɔbran twa par a, wɔma no mbo”.

Adzesua kor so a yɛkenkan Obra wɔɔ bo bɔ a yɛbenya efi mu nye dɛ; awofo nyina bema hɔn mba ntsetsee pa. Ɔwɔ mu dɛ egɔa Yaw Fori nnyi sika na ɔyɛ habanasenyi dze naaso ohun hia a ohia dɛ Kodwo wieɛ skuul no ɔdze no kɔto edwuamsua mu. Otuu ne tsinsa yɛɛ amandze biara a ohia wɔ ho na owieɛ n’edwumasua no so ɔpoon no fii ne kyerefo no nsamu. Demara na ɔwɔ dɛ awofo nyinara yɛ dze boa hɔn mba.

Owura D.E.K Krampah nam **Ɔbra wɔtɔ bo bɔ** do ma akenkamfo eehu ebusuafo hɔn asodzii wɔ mba ntsetsee mu. Ɔye a Wɔfa Dɔnkɔ boa n'akontan Yaw Fori ma okotua Kodwo no skuul mu kaw (krataafa 7). Yehu bio de Kodwo suaa fitadwuma wiee ma wɔpoon no no, n'egyanom na no nwɔfanom nyinara boaa no. Iyi ye bataboa a ɔye few osiande Kodwo ye yie a ɔdze kɔ ebusuafo no mu ntsi ɔfata de ebusuafo no so tua noho kaw bi, nnye egypta no nko n'asodzii.

Ɔye egyptanom hɔn asodzii de ɔtɔfabi a wɔnye hɔn mba tsena ase dwendwen hɔn asetsena abrabo mu nsem ho. Nna Yaw Fori to de ɔnye ne ba yi dwendwen nsem ho kaansa ne ba no suar denara mpo a oemmbu no de, sebew onnyim dze. Iyi ye adzesua kor a ɔwo de akenkamfo hye no nsew. Adzesua anaa osuahu bio a yenea fi buukuu no mu nye de mponatwe nnye. Kofi Amponsa na Aba Kɔsema twee mpona araa beye mfe ebien. Onam dem mponatwe yi do na Kɔsema wiaa Kofi ne sika sidi anan a ɔdze ntoto bɔtoo ɔno na ne nyenko Kodwo ntamu no. Nsunsuando bɔn a ɔye enyinguase hye no nsew yie wɔ hɔn abrabo mu. Yaa nye Kwesi Enntsie twee mpona ma nyinsen puee mu no. Yaa bɔɔ Entsie ne dzin ara na Enntsie paam no see de ɔnnye ɔno faa no. “Woara hwe o, ma nde fonafona yi! Ne ba no mpo onnya sika biara nnto edziban mma onndzi (krataafa 21). Aber a Kodwo Kusi dur ne mpanyin afe do no, n'awofo hwehwee basia kegye no awar maa no. Ɔwo de aber biara yekaa de ɔbra wɔtɔ bo bɔ na yesie abotar wɔ dwuma biara mu nkankaara hen awar mu. Iyi ye adzesua kor a, obiara a ɔbekenkan buukuu no benya dze abɔ bra, osiande mpanyin se “se epe no ntsem a ihue no amon”.

Ɔkenkamfo, bɔnfakye so ye adzesua kor a buukuu **Ɔbra wɔtɔ bo bɔ** da no edzi. Kodwo Kusi ammfa enyimtsia a Kofi Amponsa dze buu ɔno na n'awofo nyina annye hwee. Ɔkor do nyaa ɔdo maa no. Onam Kodwo Kusi do na Amponsa nye ne yer nyaa ahotɔ na enyigye wɔ hɔn asetsena mu. Ɔwo de yebo mbɔdzen dze bɔn kye ama Bɔadze so dze hɔn bɔn akye hɔn. Ekyingye biara nnyi ho de obiara a ɔbekenkan **Ɔbra wɔtɔ bo bɔ** no benya osuahua pii a ɔdze bɔbɔ ne bra ma oeesi no yie, osiande mpanyin se “Dza idua no noara na ibu”.

Mbubudo

Ɔbra wɔtɔ bo bɔ buukuu no ma akenkanfo esuadze pii. Obiara a ɔbekenkan no mma n'adwen nda ho na onsua no mu nsem no yie na ɔmmfa mbo ne bra na oetum so afa do etu afofor fo. **Dwumadzi** Kenkan **Ɔbra wɔtɔ bo bɔ** yie na kyerew no mu esuadze nyinara a enya wɔ mu.

Tsir 6: Ana buukuu ne dzin Obra wɔtɔ bo bɔ nye no mu nsem kɔ do?

Nyienyim: Afei, yɛpɛ dɛ yɛhwɛ dɛ ana dzin a D.E.K. Krampah dze too no buukuu no fata no a. Yereyɛ iyi osiandɛ, ɔkyerɛwfo biara hwɛ dɛ no buukuu ne tsirasɛm na no mu nsem no kɔ. Hye no nsew dɛ, ɔsor obiara na mbre osi hu adze fa. Iyi ntsi, obotum aba no dɛ, dza w'adwen yɛ wo nnkenye dza yeakyerɛw wɔ ha yi aye pɛr. Kenkan dza ɔwɔ ase ha yi

Botae

Ansaana tsir yi nko ewiei no, nna itum kyere dɛ buukuu no ne dzin fata no anaa dɛ ɔmmfata no.

Ana buukuu ne dzin Obra Wɔtɔ bo bɔ nye no mu nsem kɔ do?

Sɛ yebohu dɛ buukuu bi ne dzin a ɔda do nye no mu nsem kɔ do a, ɔwɔ dɛ yehu dzin no n'asekyere. Iyi ekyir no, ɔwɔ dɛ yɛhwɛ otsiban a ɔwɔ mu no, no suban. Buukuu ne dzin aye noho kasabɛbu bi a ɔkasa kyere akenkamfo. Obra wɔtɔ bo bɔ. Sɛ ɔkannyi ka dɛ “tɔ wo bo” a nna ɔkyere dɛ mma nhyehye do nndzi dwuma bi. ɔwɔ dɛ inya abotar anaa ntoboase wɔ dwumadzi bi a ridzi mu. Sɛ obi ridzi dwuma bi na ɔtɔ no bo a, dem dwumadzi no ho tsew, ɔyɛ fɛw na owie pɛ yɛ. Demara na sɛ obi anntɔ no bo a, dem dwumadzi no sɛɛ, ɔnnɛ fɛw na onnwie pɛ yɛ. Obra nnyɛ adze a nyimpa dasanyi dze dakor anaa ndaansa bi wie bɔ. No kwan war. Enyigye, mpontu, amandzɛhu, ahokyer, ɔhaw na atsetsee wɔ mu, dem ntsi ɔwɔ dɛ obi a ɔrehyɛ obra ase no yɛ ahweyie, abotar na enyidaho dze hyɛ ase.

ɔkenkamfo biara botum aka no pefee dɛ buukuu no ne dzin na no mu nsem no kɔ do ara yie. Kofi Ampɔnsa a ɔyɛ otsiban wɔ buukuu no mu no yi suban ahorow bi edzi a ɔma buukuu ne dzin no fata no. Bea a odzi kan a yehu dɛ buukuu ne dzin fata no nye ber a Kodwo n'egya kaa kyereɛ no dɛ ɔpɛ dɛ osua edwuma no, ɔkɔr ne gyafɔ Kofi ho kɛkaa nsem a n'egya kae no kyereɛ no. ɔnam dɛ Kofi Ampɔnsa enya pɛ dɛ akrakyedwuma ara na ɔpɛ dɛ ɔyɛ na ɔdze ahoper rebɛhyɛ obra ase ntsi, oennya ntseasee amma Kodwo no nsusuii no, Kofi Ampɔnsa buu Kodwo Kusi n'awofo dɛ woyɛ efuratamfo. Kofi nnyi enyidzi na abrabo a enyidzi nnyi mu so nnyɛ dza owia yie (kraatafa 11).

Dza ɔtɔ do bio a ɔma yehu dɛ buukuu ne dzin nye no mu nsem kɔ do nye mbre Kofi sii tutu mbirika wɔ n'abrabo mu wɔ n'edwumaye mu. ɔdze n'akeseyɛ tahyee wɔ nkombo a ɔnye Duasefo a ohyiaa

hon no dzii mu. Yeedzi kan aka Amponsa no ntuw na n'ahomemado ho asem. Afei so ose, anamon kwan a ne na fa do ko haban mu no obesakyer no aye no akwampaae. Afei so owie no dem a, abobue fiadze kese bi wo Duase a oboton mu amanadze ndzemba nko ama no nkorofu eegyaa de wotu kwan koto ndzemba.

Ana Enngye Inndzi de nna kofi Amponsa rututu mbirika dodow wo n'abrabo mu? Nna no were efi de obra woto bo bo. Enyidaho, abotar na ahohyedo a Kofi ennya ma otutuu mbirika wo n'abrabo mu no no nsusando na odze no kefir efiadze no. Kofi Amponsa enntsie afotu a n'egya dze maa no no mu biara, onora gyinaa ne pe na n'ahomemado, n'akeseye na no ntuw do yee dza ope. "Da biara a ebeba fie no, afotu a medze ma wo nye de hwe yie na obra woto bo bo. N'egya Kwesi Badu n'asem nye yi na Kofi ammfam anye hwee.

Setsie a Kodwo Kusi yee maa obiara n'enyi gyee no ho. Kodwo ennya ebufuw enntsia Maame Ehuramba wo asem a odze dzii no no ho. Hwe; Kodwo n'ahobrease na no nokwardzi wo n'edwumaye mu nye mbre osii dze enyidzi a ofata maa ne yer na mpo esuafo a okyeree hon edwuma no. Odweene hwee kan hun hia a ohia de odze kuadwuma bata ne fitadwuma noho ama se ogyaa edwuma a oedzidzi do. Ana obra wonnto bo bo bi? Dza owo sor yi ma yehu no de buukuu **Obra woto bo bo** ne dzin na no mu nsem ko do koraa. Ekyingye biara nnyi ho na owura D.E.K. Krampah ammfom de odze dem dzin no maa buukuu no.

Mbubudo

Dza yeaye nye de, yeahwe ndzemba bi a yebotum egyina do aka de buukuu ***Obra woto bo bo*** no ne dzin fata no. Ndzemba pii wo ho a yeannka ho asem. Kenkan buukuu no bio na hwehwe nsem ahorow a osirii wo buukuu no mu fa kyere de buukuu no ne dzin fata no anaa de ommfata.

Dwumadzi

Fa mfatoho a ofata kyere de D.E.K. Krampah no buukuu ***Obra woto bo bo*** ne dzin fata no anaa ne dzin mmfata no.

KUW 5: TWER NYAME MU MPENSAMPENSAMUYE

Mbueienyi:

Kuw yi mu no, yebeye **Twer Nyame** buukuu no mu mpensampensamu. Dem agodzi buukuu yi fa ababaaawa bi a wofre no Amba Onnyibi ho. Onam no suban pa ntsi, ne mfefo beenu taan no ara dze adzewia too no do ma wotwaa no esu fii no kurow mu ho. Ne maame aberwa Nyamekye dzii n'ekyir ma ohweer no nkwa. Ekyir no onyaa akokodur sanee baa no kurow mu ma anyenkofo beenu a wowiaa egudze too no do no daa nokwar no edzi. Ohen no buu hon fo na oyee de obotwa hon esu, osiande mpanyimfo de, 'Abaa a wodze bo Tekyi no wodze bo Baah so'. Amba hun hon mbobor na omaa ohen no dze hon bon kyee hon. Amba annhwe enyinguase a wodze guu no, mpo ne maame a owui no ho. Dem buukuu yi mu mpensampensamuye yi boboa ama aatse nsem a yekasa afa ho no mu biara ase yie. Ndzemba ahorow a yebohwe wo kuw yi mu nye sibeaber, agofomba ahorow a wowo buukuu no mu na hon su ahorow. Yebesan ahwe botae na nsentsitsir ahorow a okyerewfo no gyinaa do kyereew buukuu no. Afei, yebesan ahwe esuadze ahorow a wo buukuu no mu. Kasasu ahorow a wo buukuu no mu no so, yebohwe. Yebesan so ahwe de buukuu **Twer Nyame** no ne dzin fata no anaa? Dza yeye de eye nye de, epe buukuu no bi na ekenkan de mbre obeye a ebetse mpensampensamuye no ase yie.

Botae

Adzesua yi nko ewiei no, nna itum

1. kyere sibeaber a okyerewfo no dze **Twer Nyame** wuraa mu
2. kyere agofomba ahorow a wowo buukuu no mu
3. kyere nsentsitsir ahorow a okyerewfo no gyinaa do kyereew buukuu no
4. kyere esuadze ahorow a wo buukuu no mu
5. kyere kasasu ahorow a wo buukuu no mu
6. kyere de dzin **Twer Nyame** no fata buukuu no a

Ma yenko do e!

Tsir 1: Sibeaber

Nyienyim: Yeedzi kan akyere ahwɛgor ase de abasem a wonam nkombodzi na agofomba ahorow do da okyerɛwfo bi ne tsirmupɔw edzi. Se ebetse ahwɛgor ase na akenkan ma ɔaye wo dɛw a, ɔno ɔwo de ehwe ndzɛmba ahorow bi na ehɛ no nsew. Ɔwo de yetum dze hen adwen bubu ma ɔye de agor a yerekenkan anaa yerehwe no ye abrabɔ ankasa. Ɔwo de aber biara yekenkan agor bi de mbre asem no si ara per na yɛdze hen adwen bubu anaa susu nsem a yekekan no ma ɔye tse de dza orisi pɛpɛper. Se yetum dze hen adwen bubu ma ndzeyee, kasa, egyinaesi, ndze, akonaabadzi, afadze, sibeaber na adze a ɔwo akenkansɛm no mu no ye de abrabɔ mu dze ara per a, ɔno nna tsere yennyi haw wo agor no ne ntsease ho koraa. Yebekenkan agor bi ma ɔaaye hen dɛw papaapa. Ne nyinara mu no, ɔwo de yekenkan ahwɛgor wo abotar mu, yeye aso ma dza yerekenkan no na yema hen adwen mu da ho fa akenkan no mu nsem ho. Aber biara a yebekenkan agor bi no, ndzɛmba ebiasa na ɔko do: suahu a yenya wo akenkansɛm no ho, mbre yesi kyere akenkansɛm no ase na mbre yesi ker dza yeakenkan no. Dwendwen dem ndzɛmba ebiasa yi ho yie. Se yehwe ahwɛgor ne nhychyee a, sibeaber dzi mu akotsen papaapa. Akyerɛwfo gyina ndzɛmba a ɔko do wo aber na bea potsee bi do na wodze hyehye hon ahwɛgor. Tsir yi mu no, yebohwe ber na bea a Kobena Gyate Akwa dze no buukuu ***Twer Nyame*** wuraa mu. Na ndzɛmba a ɔda edzi wo dem mber yi mu.

Botae

Tsir yi mu adzesua nko ewiei no, nna itum kyere ber na bea a okyerɛwfo no dze ***Twer Nyame*** wuraa mu.

Twer Nyame mu sibeaber

Sibeaber kyere ber, bea na amambra mu ndzɛmba bi a ɔwo dem ber na bea no mu. Otum so ye ndzɛmba a enyi nntua ho bi tse de sunsum mu nsem bi a wohwe ho hyehyee ahwɛgor bi. Ndzɛmba a ɔwo sibeaber ho nye:

- a. Bea potsee anaa kurow potsee bi a okyerɛwfo bi dzi n'agor wo ho. Se yehwe ***Twer Nyame*** a, beebi potsee a agor no kor do no nye Akanman mu. Okyerɛwfo no ma yetse ase de, okyerɛw agor yi wiei no, Metodest Kwesida skuulfo dzii kan dzii agor no wo 'Kumase Town Hall'. Dem bea yi ye bea a ɔwo Akanman mu. Iyi ntsi, yebotum aka de, dwumadzi no kor do wo Akanman mu. Kurow potsee a okyerɛwfo no bɔɔ wo Akanman mu na odzii no dwuma no wo ho nye Anka (Nyee 1:Ahwee 1-krataafa 4). Anka ho no na ahwɛgor no mu dwumadzi nyinara hye ase wo aber a wohyehyee Barimba Kwesi

Esuon ne ba Esi Abema. Se yeyi Anka fi ho a, agodzi no mu nsem no bi so sii wo Aberwa Nyamekye ne fie (krataafa 16-17). Ho na yehu de Aberwa Nyamekye rutu ne ba Amba Onnyibi fo fa mbre abrabɔ si tse ho. Yesan hu beebi tse de asendzii (krataafa 25). Ho na ohen na ne mpanyimfo abɔ ngua a woridzi asem. Yesan hu beebi a Amba nonko gyina pow mu (krataafa 38). Iyi ma yehu de okyerewfo no dze dwuma potsee bi hyee pow no mu. Pow no mu na wotwaa Amba esu a okoree, ho ara na Tsema yee Amba na ne maame mboa na pow kor yi ara mu na Aberwa Nyamekye wui. Iyi ma yehu de pow no mu ye beebi a no ho hia ma okyerewfo no ankasa. Okyerewfo no san dze hen ko Barimba Tawia ne fie na oma yehu de Barimba Tawia akɔwar bi aka ne yer Tsema ho (krataafa 46). Okyerewfo no san dze hen bowura dan mu aber a Amba risiesie ho (krataafa 54) na afei, odze hen Bowie wo ahenfie. Dem mbeambea ahorow a Kobena Gyate Akwa dze *Twer Nyame* no mu nsem wurawuraa mu no ma yehu de kasadwin ye abrabɔ. Na akyerew kasadwin da abrabɔ mu nsem ahorow edzi. Oma yetse ase de akyerewfo bo hon man na wodzi dwuma ahorow wo mu. Agofomba ahorow hon su, ndwuma a woye, hon fie asetsena na adze nyinara ma yehu ber na bea bi a okyerewfo bi kyereew no buukuu bi wo mu. Dem ndzemba yi ma yetse ahwegor no ase yie.

- b. Ber na donhwer potsee bi a wokyereew agor no wo mu: Kobena Gyate Akwa ma yetse ase de, ber potsee a odze kyereew agodzi no ye afe 1941. Mbom, afe a odzikan a odaa no edzi nye 1959. Yeyi dem mber potsee yi fi ho a, yehu donhwer bi de; dapen, ndaansa, anapa, Memenda na adze. Dem aber ahorow yi nyinara mu no, ndzemba potsee na osisii mu. Yehu ber a wohyehyee Esi Abema, ber a wotwaa Amba esu, ber a Amba ne Maame wui, ber a Barimba Tawia kɔwaar fofor, ber a Amba saan baa fie, ber a Amba waar Owuodzi na mber pii a owo buukuu no mu. Dem mber yi nyinara ye mber ahorow a okyerewfo no dzii dwuma ahorow wo mu ma woboae ma buukuu no dzi mu.
- c. Ndzemba ahorow a owo atsenae no mu, gyedzi ahorow, ndwuma, edzin ahorow na amambra mu nhyehyee ahorow so ma yehu ber na bea. *Twer Nyame* mu no, se yehwe mber a okyerewfo no dze no nwoma no wuraa mu no a, yebeka de oye tsetse aber a nna Aborɔfo no aba Ghanaman mu. Iyi ntsi, yehu Aborɔfo dwuma bi de porisi edwuma. Yehu dem edwuma yi wo dzin a okyerewfo no dze too ogofoba kor a wofre no Kɔpor Tanga. Kɔpor ye dzibew a owo porisi edwuma no mu. Bio, yehu de osiande nna Aborɔfo aba Ghana ntsi, yehu Kristosom wo ho. Yehu de aber a wokaa de Amba na

Aberwa Nyamekye de wɔmbɔ do no, wɔse wɔnnkɔbɔ do osian hɔn som ntsi. Eben ɔsom na wɔreka ho asem yi? Kristosom bi a? Amba kyere a, asɔr a ɔkɔ no mma no ho kwan ma onndzi nsew (krataafa 25-32). Bio, yehu wɔ buukuu no mu de, binom som enyame ahorow pii: Dziamon, Tingyani na adze. Okyeame no bisaa adasefo no de wɔkɔ asɔr anaa wɔsom bosom? Iyi ma yehu de dem aber no, nna ɔsom pii wɔ ho a asɔrkɔ so ka ho na nkorɔfo wɔ gyedzi wɔ ndzɛmba ahorow pii mu. Buukuu no mu so, yehu amambra ahorow pii wɔ mu. Yehu asɛndzi, ɔhen na ne mpanyimfo, nsewdzi, awar dodow, esutwa, bragor na amandze ahorow pii. Owɔ mu de dem ndzɛmba yi wɔ ho nde mber yi so mbom, se yehwe aber a wɔkyerɛw *Twer Nyame* ne dze a, nna dem ndzɛmba yi nnye na koraa. Na ɔda edzi pefee mber na bea a Kɔbena Gyate Akwa kyereɛw *Twer Nyame* wɔ mu.

Mbubudo

Yɛahwe ndzɛmba ɛtsitsir ebiasa a yebotum egyina do dze akyerɛ sibeaber wɔ akyerɛw kasadwin bi mu. Iyinom nye bea potsee anaa kurow potsee bi a ɔkyerɛwfo bi dzi n'agor wɔ ho, ber na dɔnhwer potsee bi a wɔkyerɛw agor no wɔ mu na ndzɛmba ahorow a ɔwɔ atsenae no mu, gyedzi ahorow, ndwuma, edzin ahorow na amambra mu nhyehyɛɛ ahorow. Hyɛ no nsew de, akyerɛwfo gyina sibeaber do paw hɔn agofomba, na wɔnam sibeaber ara so do da hɔn botae ahorow edzi. Sibeaber no na ɔkyerɛ mbre agofomba no dzi hɔn dwuma. Akenkanfo anaa bɔhwɛadzefo tum gyina sibeaber do nya ahwɛgor bi mu ntseasee.

Dwumadzi

1. Kyere sibeaber ase tsiabaa.
2. Gyina ndzɛmba anan a osisii wɔ *Twer Nyame* mu do kyere sibeaber a wɔkyerɛ ahwɛgor no wɔ mu.
3. Kyere nsunsuando ebien a sibeaber nya wɔ ahwɛgor do.

Tsir 2: Twer Nyame mu agofomba ahorow na hɔn su

Nyienyim: Tsir yi mu no, yebɔhwɛ agofomba ahorow a wɔwɔ *Twer Nyame* mu na mbre hɔn dwumadzi boa ma buukuu no dzi mu. Agofomba a wɔwɔ ahwɛgor mu no tɔ de wɔyɛ agofomba etsitir na nkumaa. Agofomba etsitsir no mu no, yewɔ otsiban na hɔn a wɔko tsia otsiban no. Na agofomba a wɔboa ma ahwɛgor no mu dwumadzi nyinara kɔ do no a wonnyi agor no mu a ɔhaw kɛse biara nnkɛba no nye agofomba nkumaa. Agofomba a wɔwɔ *Twer Nyame* mu no bi nye: Amba Onnyibi, Esi Abema, Akyerɛ, Araba Dapaa, Ekuwa Enyampa, Tsema, Efuwa Sikafew, Kwesi Esuon, Tawia, ɔhen, Owuodzi, Mumuni Moshi, Abongo Frafra, abaguafo na adze. Tsir yi mu no, yebefa agofomba yi mu bi na yeaye hɔn su na hɔn dwumadzi mu mpensampensamu.

Botae

Tsir yi mu adzesua nkɔ ewiei no, nna itum:

1. kyere agofomba etsitsir na agofomba nkumaa bi a wɔwɔ *Twer Nyame* mu
2. kyere mbre agofomba no hɔn su si boa ma buukuu no mu nsem dzi mu
3. kyere mbre agofomba no mu biara no dwumadzi boa ma buukuu no mu dwumadzi kɔ do

3.1.Amba Onnyibi

Amba Onnyibi nye otsiban wɔ *Twer Nyame* mu. Ono na okedzii Esi Abema abaawa wɔ aber a wohyehyɛ no no. Ɔyɛ ɔba ma Aberwa Nyamekyɛ. Ɔdaa suban pa edzi ɔnam ntsetseepa na afotu pa a ne na dze maa no ntsi (krataafa 17). Amba Onnyibi beyɛ ɔyer maa Owuodzi. Ɔnam no su, ne ban na ahobreɔdze a onyae ntsi, wɔmaa no do kopuee ahemfie (krataafa 69,76). Ne yamu ye (ktf76). Ɔdze bɔn kye (ktf 76). Ɔkyerɛwfo no nam Amba na Aberwa Nyamekyɛ do, Tsema so ka ho do, kyere Kristosom papa (ktf 22). Ɔkyerɛwfo no nam Amba do tsi akenkanfo mu de aber biara nyina mu no na adze nyina besi hɔn yie. Ɔdze Amba gyinaa ho maa abrabɔ pa, nkankara Nyamesom pa. Ɔnam Amba do ma buukuu ne dzin *Twer Nyame* no ma buukuu no mu nsem na ne dzin nye no se. *Dwumadzi*: Fa nsem a osisii *Twer Nyame* mu kyere Amba Onnyibi ne nyimpaban wɔ buukuu no mu.

3.2.Tawia

Tawia ye agorba kor a ɔkyerɛwfo no gyinaa no do daa osuah pii edzi wɔ *Twer Nyame* mu. Ɔyɛ agorba tsitsir kor a no dwumadzi da Akan amambra edzi. Buukuu no mu no, ɔyɛ okun ma Tsema na Efuwa Sikafew. N'awar a ɔwaar Efua no ma yehu de Akanfo gye awar dodow to mu. Awar no

mu nsem so ma yehu de awar dodow nnda famu koraa (ktf 56). Ne nkyen na Amba ketsenae aber a Amba ne maame fii mu no (ktf 58-59). Onam no do ma Efua baa fie ho ma woboo Amba ewi mpon a oto do ebien no. Iyi ma yehu de ne yamu ye. Ne na-kuma nye Adwowa. *Dwumadzi*: Fa nsem a osisii Twer Nyame mu kyere Tawia ne nyimpaban wo buukuu no mu. Kyere mbre no su ma buukuu no dzi mu.

3.3. Araba Dapaa na Ekuwa Enyampa

Dem nkorofu yi ye agofomba a hon dwumadzi no boae ma buukuu no no mu nsem kor do. Woye Akyere ne mbaawa. Akyere ma akenkanfo tse ase de, Araba ye akwadwer na enyimhar (ktf 13). Wowiaa adze hyee Amba Onnyibi (ktf 13-14). Wosaa so dzii dasewia ma wopaam Amba fii kuorow no mu (ktf 20). Wodaa osom na gyedzi ahorow edzi (ktf 28). Hon ndzeyee ma yehu sibeaber a okyerewfo no dze no dwumadzi no wuraa mu. Araba Dapaa na Ekuwa Enyampa hon ndzeyee boa ma Amba Onnyibi tumii gyinaa ne nan do ma okyerewfo no so no botae baa mu. *Dwumadzi*: Fa nsem a osisii Twer Nyame mu kyere Araba Dapaa na Ekuwa Enyampa hon nyimpaban wo buukuu no mu. Kyere mbre hon su si ma buukuu no dzi mu.

Mbubudo

Kobena Gyate Akwa nam n'agofomba ahorow hon suban ahorow do na no botae ahorow edzi. Oma akenkanfo hu de suban ahorow pii wo wiadze na no mu biara a obi befa no, no nsunsuando wo ho. Ohia de obiara a obekenkan buukuu yi mu no bohwe dwuma ahorow a agofomba no dzii na nsunsuando a no mu biara nyae na mbre wosii boae ma buukuu no dzi mu. Suban ahorow a opuee mu no, akenkanfo mfa ntoto hon bra ho na se nsesae bi wo mu a, tsera asasa.

Dwumadzi

1. Woana nye Amba Onnyib wo *Twer Nyame* mu?
2. Fa agofomba ebiasa wo Twer Nyame mu na kyere mbre hon dwumadzi boa ma buukuu no dzi mu.

Tsir 3: Twer Nyame mu nsentsitsir bi Nyienyim

Okyerewfo biara nnhyehye no dwumadzi kwa; wogyina botae bi do. Botae ahorow pii do na Kobena Gyate Akwa gyinae dze kyereew no buukuu yi *Twer Nyame*. Dem tsir yi mu no, yebohwe no mu ebiasa per. Kenkan buukuu no na kyereew nkaa no.

Botae

Tsir yi mu adzesua nko ewiei no, nna itum kyere botae/nsentsitsir ebiasa a owo 'Twer Nyame' mu.

- a. Gyedzi mapa
- b. Enyiber na otan
- c. Ayamuye na otan

Kenkan ko.....

Nsentsitsir ebiasa a ahwɛgor Twer Nyame dze to gua.

Gyedzi mapa:

Gyedzi ye adze tsitsir a oda edzi wo bukuu no mu. Gyedzi soronko a Nyamekye nyaa no wo Nyame mu no tumii boaa no ma otsetsee Amba Onnyibi yie. Wosoom Nyame wo nokwar mu na wɔammpa aba wo no som mu da. Iyi ma yehun de gyedzi potsee a odzii akotsen nye Kristosom na gyedzi wo Nyankopon mu. Amba Onnyibi ye Nyamesomnyi mapa a odzi no som ho nokwar, oyi ho ntsi dza oye ntanka nye ndzɛmba ahorow a ommfata nyamesom no oannyɛ bi. Gyedzi soronko a na na oba beenu nyae no buɛe okwan maa hon wo hon ahokyer mu. Tsema yee hon mboa. Twer a wotweer Nyame a wɔammpa abaw no onam do ma Nyame sanee bohwee hon wo hon ahokyer mu ma nkunyim yee Amba Onnyibi dze. Ekyir no akowa beyee odzehye.

Enyiber na otan:

Twer Nyame mu no, yehu enyiber na otan de woye nsentsitsir a okyerewfo dze to gua. Enyiber nye otan ye adze a oba nyimpa ntamu a, odze ohaw kese ba. Amba Onnyibi wo dem ahwɛgor yi mu no, ye obi a nna osan ntsetsee a ne na dze ama no no ntsi onyaa enyimpa ma otum beyee Esi Abema abaawa. Iyi na onam do ma onyaa otan wo Araba Dapaa nye Ekuwa Enyampa enyim. Wotaan no ara ma wotwaa akohwi too no do ma wotoow ne nanadze itur, ono na ne na bobɔfo. Ber a egyanka Onnyibi ketsenaa Tsema na Tawia nkyen no so, Tawia ne yer Efuwa Sikafew ampe n'asem kepem de owiaa adze hyee no ma, onoara dze ahomtsew kor Anka bio.

Ayamuyie nye odo:

Okyerewfo no nam ahwɛgor yi do da ayamuyie na odo edzi. Se obi hwe ber a Amba Onnyibi na ne Na Nyamekye rutu efi Anka no a, wokodur kwantapon no do no, nna enyidar asa. Naaso abofo a wowo kurow a nna woroko do no do so yee hon mboa soronko. Nyamekye kaa nkyen gui no mpo, Tsema na no kun Tawiah dze Amba Onnyibi kor hon fie, tsetsee no de hon ba. Awarfo yi yee Amba

dem adɔye yi osian papa a ne na dze yɛɛ Tsema ntsi. Wɔdaa ɔɔɔ edzi soronko kyereɛ egyanka no. Ōhen a ɔwɔ Anka no so hyɛɛ Amba enyimnyam ber a nokwar no daa edzi no naaso Amba nam ɔɔɔ do dze Ekuwa na Araba hɔn mfom kyɛɛ hɔn ma wɔtsenaa Anka ber a asotwe biara ammba hɔn do.

Mbubudo

Ndzemba pii na ɔkyerɛwfo no gyinaa do dze hyehyɛɛ no buukuu no naaso no mu ebiasa pɛr na yeaka ho asem. Ndzemba bi tse dɛ abaatanye na mbatsetse, awar, ndwuma ahorow, asetsena/abrabɔ mu nsem, Akanfo hɔn amambra mu nhyehyɛɛ ahorow na pii a ɔkeka ho. Dem botae ahorow yi ma buukuu no mu nsem nye asetsena mu nsem ye pɛr.

Dwumadzi

Gyina buukuu no mu nsem do kyerekyere botae a odzidzi do yi mu yie

1. Abaatanye na mbatsetse
2. Awar mu nsem
3. Akanfo hɔn amambra mu nhyehyɛɛ ahorow

Tsir 4: Twer Nyame mu esuadze bi Nyienyim

Kasadwin buukuu biara no botae kor nye dɛ beda esuadze ahorow edzi ama akenkanfo ahwe do dze abɔ hɔn bra. Tsir yi mu no, yebobobo esuadze ahorow a ɔwɔ *Twer Nyame* mu do. Kenkan buukuu no ama aatse mpensampensamu a yɛbeye no ase yie.

Botae

Tsir yi mu adzesua nkɔ ewiei no, nna itum pensapensa esuadze anan a ɔwɔ *Twer Nyame* mu mu yie.

Yɛnkɔ do.....

Dem literekya buukuu yi ma no nkorɔfo a wɔkenkan no esuadze pii. Odzi kan, ɔma yehu dɛ ɔtan nnyi edur. Nyimpa bi wɔ hɔ a ɔbɔ ne bra tseneneɛ kwan do naaso ne mfɛfo tan no dɛ mbre Araba Dapaa na Ekua Enyampa dze yɛɛ Amba Onnyibi no. Iyi ntsi, buukuu no tu fo dɛ otwar dɛ obiara hwe noho yie wɔ nyimpa ho. Osiande Amba Onnyibi nndzi fɔ ntsi, yehun dɛ ekyir no, nkorɔfo a wotwaa akohwi too no do no, hɔn ho daa hɔ ma mbra nye hɔn dzii.

Buukuu no san kyere abadaa na ɔɔɔ mapa a ɔwɔ dɛ awofɔ nya ma hɔn mba. Yehun dɛ,

Aberwa Nyamekye nyaa ɔɔ na abadaa maa ne ba Amba Onnyibi. Iyi ntsi, odzii n'ekyir mpo wo aber a wotoow n'ananadze itur fii kurow mu ho no ma ɔnam do hweer no nkwa. Dem ɔɔ yi ara ntsi na ɔnam do ma Aberwa Nyamekye kyere ne ba no abrabɔ mu suahu ahorow no. Na ɔnam do ma Amba nyaa akokodur dze bɔɔ bra. Ne maa fii mu mpo, otuum gyinae bɔɔ ne bra. Woara hwe dza ɔtoo no wo ne maane no wu ekyir, se onnyi akokudur a nkye obotum egyina ano?

Esuadze kor so tsitsir kor a *Twer Nyame* da no edzi nye de “itu edubɔn a bi ka w’ano”. Amma wo nyenko enntwa akron a, wo so nntwa du’. Asotwe a wodze maa Onnyibi no afei ɔdanee baa n’atamfo no hon do.

Bio, buukuu yi tu hen fo de, se yetwer Nyame na yebɔ hen bra wo nokwar mu a, obeye hen okyirtafo na ɔahye hen enyimnyam. Amba Onnyibi na ne maame tweer Nyame nkotoo no, ɔmaa wodzii nkonyim. Buukuu yi mu nsem da no edzi de oye de yanya bonfakye. Onnyi de yedze bon tua bon kaw. Amba dze Ekuwa Enyampanom hon bon kyee hon. Amba gyinaa dem su yi do kyere Nyamesom papa.

Bio se obi mema noho do a, wobre no ase na mbom se obi bre no ho ase a woma no do.

Mbubudo

Adzesua pii na ɔwo *Twer Nyame* mu na no mu kumaa bi na yeabobo do wo ha. Yebesre de, kenkan buukuu no bio na hwehwe no mu esuadze ahorow no bi na fa bo wo bra.

Dwumadzi

Bua nsembisa yi nyinara.

1. Kyere esuadze anan a ɔwo *Twer Nyame* mu a yeannka ho asem wo ha. Gyina nsem a osisii wo buukuu no mu do kyerekyere wo nsem mu yie.
2. Fa mfatoho a ɔfata fi buukuu no mu kyere esuadze a odzidzi do yi mu yie.
 - a. Akokodur
 - b. Abaatanye na abadaa
 - c. Dasewia
 - d. ahobreadze

Tsir 5: Twer Nyame mu kasasu bi

Nyienyim: Kasasu ahorow pii na okyerewfo no dze dzii dwuma. Iyinom boa ma buukuu no mu nsem no da okyerewfo no ne tsirmupɔw edzi yie na ɔma buukuu no mu nsem no ye dɛw na odzi mu so. Kasasu ahorow a ɔwɔ mu no dɔɔ so naaso hen adzesua yi mu no, yɛbɔhwɛ no mu ebiasa pɛr. Bɔ mbɔɔzen kenkan buukuu no na ye kasasu ahorow nkaa no mu mpensampensamu fa kyere mbre wosi boa ma buukuu no mu nsem dzi mu.

Botae

Tsir yi mu adzesua nko ewiei no, nna itum pensapensa kasasu a odzidzi do yi mu dɛ mbre ɔtse a.

Bɛ

- b. Kasambirenyi
- c. Ntsimu

Bɛ ye tsetse kasa a mpanyin ka dze tu nkyirma fo. Wɔnam bɛ do twa asem tsentsen tsia. Okyerewfo no dze bɛ dzii dwuma pii ma no buukuu no mu nsem ye dɛw yie. Bɛ bi tse dɛ "Adze wɔ fie a wohu no mbofra ho". Dɛm bɛ yi Esi Abema ne na panyin Ata na obui dze tuu no fo ber a wɔrogor no bra no. Na okyerɛ ase dɛ se ntsetsee pa wɔ ebusua mu a, mbofra a wɔwɔ mu no hɔn suban kyere" dɛm

ntsi ɔwɔ de Esi bɔ bra papa. Be pii wɔ buukuu no mu. Dwumadzi: dza yɛpɛ de eye seseiara nye de ekyerɛw be ahorow a ɔwɔ buukuu no mu bi na ekyerɛ ase na kwan a ɔkyerɛwfo no faa do dze dzii dwuma.

Ntotoho: Dem kasasu yi, yɛdze ndzɛmba ebien a wɔnnse toto kor biara ho ber a yɛdze "de"anaa"tsede " ridzi dwuma. ɔkyerɛwfo no dze kasasu yi bi dwinii akyerɛw no. Mfatoho; "Seseiara etse de ndwera fita fita". Nyimpa na ndwera fitaa dze sorbi da hon ntamu yie na mbom ɔkyerɛwfo no dze Esi Abema rototo ndwera ho dze akyerɛ few a Esi aye dem aber no. Dem ntotoho yi kyere de, nkekaa biara innyi Esi ho. Na dem mbre adze fitaa se adze ka mu a ne few yew no dem ara na se Esi annhwe ne bra yie a ɔbeyɛ. Ntotoho pii wɔ buukuu no mu. Dwumadzi: dza yɛpɛ de eye seseiara nye de ekyerɛw ntotoho ahorow a ɔwɔ buukuu no mu bi na ekyerɛ ase na kwan a ɔkyerɛwfo no faa do dze dzii dwuma.

Kasambirenyi: Iyi ye kwan soronko a Akanfo nam do ka kasa bi a wɔmmpe de wɔka no de mbre ɔtse noara na ohia de obi dwen kɔ ekyir ansaana woehu atse ase. ɔba no dem a, ɔkasafɔ no bir nsem a ɔreka no enyi ma no mu ntseasee no nnda edzi prekoper. Ohia adwendwen. Kasambirenyi ho mfatoho wɔ Twer Nyame mu na odzi do no.

"Ebusua yi n'enyimnyam kitsa wo nsamu" Enyinyam nnye sika na yɛdze ekitsa hen nsamu naaso dem kasa yi reka hia a ohia de Esi bɔ bra tsenenee dze hye n'ebusua no enyimnyam. Mpo, nyimpa na ɔwɔ enyimnyam eso wɔdze ama ebusua. Wɔama ebusua no ase nyimpa. Iyi kyere de, ohia papaapa de Esi bɔbɔ bra dze epagya n'ebusua no. Kasambirenyi pii wɔ buukuu no mu. Dwumadzi: dza yɛpɛ de eye seseiara nye de ekyerɛw be ahorow a ɔwɔ buukuu no mu bi na ekyerɛ ase na kwan a ɔkyerɛwfo no faa do dze dzii dwuma.

Mbubudo

Nkasafua na kasasu ahorow pii na ɔkyerɛwfo no dze dzii dwuma wɔ buukuu no mu. ɔkyerɛwfo no dze nkasafua na nsem na kasasu ahorow yi dzii dwuma dze kyere mbre Mfantse kasa no mu dur tse. Dem kasasu ahorow yi bi nye be, kasambirenyi, ntotoho, se-nyimpa, enyihanhan, sesentsefo, ntsimu/nsisido, ngyinahoma, ebirabɔ, ntsimu na adze. Kasasu ahorow yi na pii a wɔkeka ho ma buukuu no mu ntseasee da ho. ɔnnye kasasu ne nyinara na yekyerɛ mu. Kenkan

buukuu no na kyerekyerew kasasu ahorow ne nyinara a ɔwɔ buukuu no mu na gyina buukuu no mu nsem do kyere siantsir a ɔkyerewfo no dze dzii dwuma.

Dwumadzi

Kenkan Twer Nyame bio. Gyina buukuu no mu nsem do kyere dza inyim fa kasasu ahorow yi ho.

- a. se-nyimpa
- b. enyihanhan
- c. ntsimu/nsisido
- d. ngyinahoma

Tsir 6: Ana dzin Twer Nyame no fata buukuu no?

Nyienyim: Dem tsir yi mu no, yebɔhwɛ ndzembra bi a ohia de yehye no nsew se yɛpɛ de yehu de dzin a Owura Akwa dze too no buukuu no fata no anaa de ɔmmfata no.

Botae

Ansaana tsir yi nko ewiei no, nna itum

- gyina buukuu no mu nsem do kyere de buukuu no ne dzin fata no anaa de ɔmmfata no

Ndzembra a ohia de ehye no nsew

Se yebɔhu de buukuu bi ne dzin a ɔda do nye no mu nsem ko do a, ɔwɔ de yehu dzin no n'asekyere.

Iyi ekyir no, ɔwɔ de yehwe otsiban a ɔwɔ mu no, no suban.

Hwe otsiban no na agofomba nkaa no hon ahyese.

Hwe otsiban no n'ewiei.

Hwe agofomba nkaa no hon ewiei.

Hwe nsem a ɔkyerewfo nok a fa otsiban na agofomba no honho.

Hwe nsem a agofomba noara keka fa hon ara honho.

San hwe dwuma a otsiban no dzii wo buukuu no mu.

Hwe ndzembra a agofomba nkumaa no yee dze tsiaa otsiban no na dza woyee dze boaa no.

Hwe agofomba nkaa no hon su.

Hwe gyedzi na ɔsom ahorow a ɔwɔ buukuu no mu.

Hwe ber na bea a okyerewfo no dze no dwumadzi no wuraa mu.

Se itum hwe nsem a osisii buukuu no mu aber a edze buukuu no mu nsem dze rekyerekere dza yeakyere wɔ sor ha yi mu a, ibohu de ***Twer Nyame*** ne dzin na no mu nsem no kɔ do anaa onnkɔ do.

Mbubudo

Dza yeaye nye de, yegahwe ndzamba bi a yebotum egyina do aka de buukuu *Twer Nyame* no ne dzin fata no anaa de ommfata no. Ndzamba pii wɔ ho a yeannka ho asem. Kenkan buukuu no bio na hwehwe nsem ahorow a osisii wɔ buukuu no mu fa kyere de buukuu no ne dzin fata no anaa de ommfata.

Dwumadzi

Fa mfatoho a ofata kyere de dzin a Kobena Gyate Akwa dze too no buukuu *Twer Nyame* no fata no anaa ommfata no.

KUW 6: MBER PA BɛBA AMPA NA AO M'AKOMA MU MU MPENSAMPENSAMUYE

Mbueienyi:

De mbre ne dzin tse no, awensem ye nsem a wɔawen a wɔdze da okyerewfo bi n'adwen edzi dze kyere esuafo anaa etsiefo. Botae a wɔdze kyere awensem dɔɔ so. Iyi ntsi awensem bi ye kwadwom, bi ye amanye na amando ho nsem na bi so fa obra na abɔdze ho. Nkasafua a ɔwɔ awensem mu no ye dza wɔahyehye no esiado, esiado demara. Dza ɔda nsew kɛse wɔ awensem a wɔakyere ho nye mbre wesi ahyehye no. Se yeyi mbre wesi ahyehye awensem nsensanee, nsensanee a, nkasafua a wɔdze ahyehye no ye dza wɔasan mu atase. Nkasafua no ye dza wɔason do ma ne ntseasee mu dɔ. Awemfo anaa akyerewfo no san mu yiye nkasafua potsee bi a ɔda hon botae edzi na afei so obotwa adwen mu mfonyin bi wɔ akenkamfo anaa etsiefo hon adwen mu ma

woeehu dza ɔrekyerew anaaso dza ɔpe de ɔka to gua hyehye. Nsensation kor biara dze akyerewamba kese hye ase na eka ne nyinara bo mu a, ɔma ɔye de biribi a gyama wodze susu homa ato ho aye. Ntsi mbre wesi ahyehye awensem no wo krataa do mpo ye ahomka keke na se ihu a, ɔye few na ɔma wo kon do de ebekankan awensem no. Awensem mbuukuu a woakyerew no wo Mfantse kasa mu bi nye: *Ao M'akoma Mu, Akanfo Awensem na Mber Pa Beba Ampa*. Kuw yi mu no, yebefa awensem bi efi *Ao M'akoma mu na Mber pa beba ampa awensem* mbuukuu no mu na yeaye ho mpensampensamu. Dem buukuu yi mu mpensampensamuye yi boboa ama aatse nsem a yeakasa afa awensem ho no mu biara ase yie. Ndzemba ahorow a yebohwe wo kuw yi mu nye ber na bea a ɔkyerewfo no kyereew awensem no, botae na nsentsitsir ahorow a ɔkyerewfo no da no, awensem no ne nhyehyee, kasasu ahorow a ɔwo awensem no mu na siantsir a ɔkyerewfo no dze dem kasasu no dzii dwuma no. Afei, yebesan ahwe esuadze ahorow a ɔwo awensem no mu. Dza yepe de eye nye de, epe awensem mbuukuu no bi na ekanan de mbre ɔbeye a ebetse mpensampensamuye no ase yie.

Botae

Kuw yi mu adzesua nko ewie no, nna itum ye awensem a odzidzi do yi mu mpensampensamu

1. Soer
2. Muruwu
3. Nyimpa bae a woako
4. Mber pa beba
5. Hwe yie
6. Da bi asem ntsi

Tsir 1: Soer awensem no mu mpensampensamuye Nyienyim:

Tsir yi mu no, yebepensapensa Soer awensem a Kobena Gyate Akwa kyereew no mu. Yebohwe awensem no n'asekyere, ɔkyerewfo no botae na nsentsitsir ahorow, tsebea a ɔkyerewfo no wo mu, ndze a ɔdze kasae na kasasu ahorow a ɔwo mu. De mbre aber biara yeka no, fa mber na kenkan awensem no yie ama eetum atse mpensampensamu no ase yie.

Botae

Adzesua yi nkɔ ewiei no, nna itum pensapensa awensem nom u fann wo aber a erohwe: a.

botae

b. nhyehyɛ

c. kasasu

d. ndze na tsebea

Awensem no

Soer

1. Soer gyina pintsinn ma wo man!
Yi ndzembahun nyina akwa,
Woedu ma yenza gyinanan,
Ntsi soer, na ma nnhwer wo mber kwa.
 2. Soer gyina pintsinn ma wo man!
Okor a ibuabua famu, Ma ntsi
inntum nnhom do nnko kan, Tu, na
sorsor nye w'afamu.
 3. Soer gyina pintsinn ma wo man!
Gyata a obi nnsen wo ndam,
Ada ma wɔgor wo ho gyan; Soer,
soer kyere wo mbanyinndam.
 4. Soer gyina pintsinn ma wo man!
Nyansafo nana, woana sen Wo
adwen na nyansa? Kenyan
Woho na, yinom hye man dzen. 5.
- Soer gyina pintsinn ma wo man!
- Sum ahye asaase yi do; Ma wo
nyimdzee nhyeren de kan
Nhwetse sum na ne nkeka ho.
6. Soer gyina pintsinn ma wo man!
Kunsa wo tam na yer woho, Edwuma
n'so, wi so redan.
Ntsi mma mmfa nnto famu, hom do.

7. Soer gyina pintsinn ma wo man!

Ma nokwardzi na korye su

Aber nyina ondzi wo kan Ama

w'ahoodzen eedzi mu.

8. Soer gyina pintsinn ma wo man!

Kaa afor a nananom boe

Dze boɔ hen awobea ho ban, Na

bo bi, na adze akye.

1.1.Awensem no n'asekyere

Okyerewfo a okyereew awensem yi nye Kobena Gyate Akwa. Dem awensem yi wo awensem buukuu '*Ao M'akoma mu*' mu. Dem awensem yi ma nkuranhye wo abrabo mu. Okyere amando na etuhoakye sunsum na afei so oman nkenyan a oboa ma nyimpa dze dzi dwuma bi. Okyere hen ndzembra bi a yenye mfa mboa hen man na okyere hen bio de yenyi ndzebon akwa na yembo tseneebra. Awensem yi tu hen fo de yenye de anoma okor ntu nko sor, mma yenngow henho wo abrabo mu. Okyere hen de yemfa hen ahoodzen nye edwuma pa mboa hen man. Oka de yemfa hen adwen, hen nyansaa na hen nyimdzee na nokwardzi mbo hen bra anaa so yemfa ndzi dwuma mboa hen man. Afei so yenkaa afor a hen nananom boe dze boɔ hen awobea ho ban. Iyi kyere de yenkaa hen nananom etuhoakye sunsum na yemfa etuhoakye sunsum mboa hen man no mpontu.

1.2.Botae

Okyerewfo no botae kor nye de obotwe akenkanfo hon adwen esi do de, ohia de wogyina na woko ma hon man. Ohia de omamba biara ye edwumadzen dze boa ne man no mpontu. Mma obiara mmbu noho tootoba, omfa enyiodzen mbir ne bogyaa enyi de okor na gyata mmfa nko ngye oman no nsi ho. Ohia de omamba biara bo obrapa a oboboa ma oman no etu mpon osiande dem na ewuakor yee. Okyerewfo no hye omamba biara de ensoer ngyina pintsinn mma ne man! Osiande se oman no bo a, omanfo ho bekyer hon.

1.3.Nhyehyee

Awensem no wo nkyekyemu/afaafa awotwe. Nkyekyemu kor biara so wo nsensanee anan. No mu nsensanee no nnwovar pii. Okyerewfo no ahyehye ne nsem no pepeper dze rekyere de, nsem a oreka no nyinara no hia no per. Nsensanee biara wo ewiei ngyegyee. Ofa a odzikan no mu ewiei ngyegyee nye 'a b a b'. Dza oto do ebien no ye 'a b a b'. Dza oto do ebiasa no so ye 'a b a b'. Dza

oto do anan no ye ‘a a a’. Woso ye dza aka no hwe! Ibohu de ne nyinara ye per. Okyerewfo no ye no dem ma awensem no ye dew ye huam. Oma awensem no nya ndwom su na nsem a owo mu no nyinara ho hia per.

1.4.Kasasu

Kasasu ahorow pii na okyerewfo no dze dzii dwuma. Iyinom boa ma awensem no da okyerewfo no ne tsirmupow edzi yie na oma awensem no ye dew na odzi mu so. Kasasu ahorow a owo mu no bi na odzidzi do yi:

Nkamu/Ntseamu

Okyerewfo no dze ahohiahia tseamu kyere n’akenkanfo de wonsoer waka nnye edwuma mma oman no. Dem ntseamu yi ma hon a woadeda nyina bo piriw na woma hon akadze do ye edwuma. Yehu dem ntseamu yi wo nsensanee a odzikan wo ofa biara mu. Soer gyina pintsinn ma wo man!

Okyerewfo no tseamu mu ka.

Nsisido/ntsimu

Osiande okyerewfo no dze enyiber na ahohiahia pe de omamba biara soer ye edwuma ntsi, osisi asem ‘soer gyina pintsinn ma wo man’ do wo ofa biara mu dze kyere n’enyiber wo dem asem yi ho. Osi do a, asem no ka okenkanfo ne tsir mu ma odwen ho anapa, ewimbir na aber biara.

Ngyinahoma ahyensewdze

Okyerewfo no dze nsem bi gyina ho ma nyimpakor a orekasakyere no no. Dem ngyinahoma ahyensewdze yi hye nyimpakor a worekasa kyere no no dzen ma ohu de biribi papa bi wo no mu a obotum aye dze aboa ne man anaa noara no ho. Odze ‘okor, gyata, nyansafo nana’ na pii a okeka ho gyina ho ma akenkanfo hu de wowo biribiara a otwar de wonya a obotum aboa ma wodze aye edwuma dze etu hon man mpon.

Asembisa a onnyi mbuae

Okyerewfo no nam asembisa a onnyi mbuae do dze twe akenkanfo adwen si do de obiara innyi ho a osen no adwen na nyansa mu. Okyere de obiara innyi ho a osen ndzemba apapa mu a obotum dze abo ne man ho ban. Nyansa a, nyansa; adwen a, adwen a; ahoodzen a ahoodzen! Dem ndzemba yi na okyerewfo no gyina do dze hye akenkanfo nkuran de wonsoer na wonkintsen honho wo edwumaye na abrao pa mu wonyi sum a ahye asaase do ma no mfi ho.

1.5.Ndze na Tsebea

Ndze a ɔkyerɛwfo no dze rekasa no wo sor. Yehu iyi wo mbre osi tsea nsensanee a odzi kan biara mu wo awensem no mu no. Osiande dza ɔreka ho asem no ye n'ehiasem ntsi, ɔbo mu ma beebiara a obiara wo biara no, ɔatse. Ɔsan so kamu dze kyere de se obiara tum soer ye n'afamu dze a, ɔman no botu mpon, na aye yie ama ɔmamfo no ara. **Tsebea** a ɔkasafɔ no wo mu no dze, ɔye ahohiahia tsebea. Osiande dza ɔreka no ye afotusem na kɔkɔbo a edzi afora ntsi, noho hiahia no na n'enyi so aber wo ho. Ohu no de nkorɔfo egyaa honho dodow. Dza ɔwo de wɔye dze boa ɔman no wonnye. Iyi ntsi, ɔkyerɛwfo no rotwe hon adwen esi do de wonhu hon gyinabew wo ɔman nom u na wɔnye dza oye mfa mboa ɔman no. Se ɔman no ye yie a, ɔmamfo so hon abrabɔ beye yie.

Mbubudo

Tsir yi mu no, yeaye **Soer** awensem no mu mpensampensamu. Yeahwe awensem no n'asekyere, botae bi a ɔkyerɛwfo no gyinaa do dze hyehyee awensem no. Yeahwe kasasu ahorow a ɔwo mu na awensem no ne nhyehyee so.

Dwumadzi

1. Kenkan awensem no bio.
2. Kyere wo ntseasee wo awensem no ho.
3. Kyere kasasu ahorow ebien a ɔkyerɛwfo no dze dzii dwuma wo awensem no mu a woannka ho asem wo mpensampensamuye no mu.
4. Kyere siantsir a isusu de ɔkyerɛwfo no dze dem kasasu no dzii dwuma no?

Tsir 2: Muruwu awensem no mu mpensampensamuye Nyienyim:

Tsir yi mu no, yebɛpensapensa **Muruwu** awensem a Kobena Gyate Akwa kyerewee no mu. Yebɔhwe awensem no n'asekyere, ɔkyerɛwfo no botae na nsentsitsir ahorow, tsebea a ɔkyerɛwfo

no wɔ mu, ndze a ɔdze kasae na kasasu ahorow a ɔwɔ mu. Dɛ mbre aber biara yɛka no, fa mber na kenkan awensem no yie ama eetum atse mpensampensamu no ase yie.

Botae

Adzesua yi nkɔ ewiei no, nna itum pensapensa awensem no mu fann wɔ aber a erohwɛ: a.

Botae/n'asekyere

- b. nhyehyɛɛ
- c. ndze na tsebea
- d. kasasu

Awensem no

MURUWU

1. 'Bi nsuo mo mu na muruwu,
Dofo bi mbra na morodwe;
'Bi dze m'akoma ahwe famu,
'Bi abɔ mo nkwa ahwetse;
Adɔfo, hom nhu me mbɔbɔr
Na m'ahom apa, munntum nnsoɛr, Ao,
me yaw tra awerɛhow.
2. Aber a menye wo hyiae no,
Mefaa no dɛ metu ehu,
Dɛ menya dofo tsemafo,
Dofo a ɔnye m'bokodu
Nna me nsa esi famu yi;
Ɔadan m'egya akwantsemfi; Hon
wowɔ se nserew me.
Na 'do egu m'enyim ase.
3. Medze m'akoma ny'na mma n'dɛ
Menye n', ewia anaa nsu mu,
No so tui fuaa me bam kyereɛ Dɛ
daa ɔnye m', gyede owu.
Nsu nntɔree, aahow so mpo mmbɔɛ

Hen enyigye wi so nntoree,
 Nna 'do ama muruwu yi;
 Ao, me ndaamba aye kebii.
 4. Saa tekyerema dew nnsi pi !
 Saa few hyenhyen ye mberew dem!
 Hwe mbre wodze me ebesi,
 Wɔaka me ato famu femm,
 Ao, egya wu, befa me ko
 Owu, bepa me enyibo;
 Bra botwa me ngyam nyina do.
 Bɔpon odo mu berefo.

2.1. Awensem no botae/asekyere

Awensem no dze yaw a obi no dofo dze no afa mu to gua. Asem kor no aye okasafo no yaw ara ma ne yamu ara a nkye owu abefa no ko. Awensem no ma yetse ase de, dofo bi dze no were ahye no dofo bi mu ma no dofo no edzi hwambo ma aka n'akoma. Adwen a okasafo no wo nye de, oye odo mu oberefo. Odo nye no enndzi no yie.

2.2.Nhyehye

Awensem no wo afaafa anan. Ofa kor biara dze asentsitsir bi to gua. Ofa a odzi kan no da no edzi de, obi ebubu okasafo no n'akoma ma ne bra nyinara aye basaa. Ofa a oto do ebien no so si do de obi edzi okasafo no hwambo ampa. Na ofa a oto do ebiasa na anan no so kyere dza okasafo no afa mu. Ofa biara wo nsensanee awotwe. Nsensanee biara so wo ewiei ngyegyee soronko. Dza odzi kan no wo ewiei ngyegyee nsisido a onye 'a b a b c c d d'. Nkyekyemu ebien no so wo ewiei ngyegyee nsisido a onye 'a b a b c c d d'. Wo so ye ebien no a aka no hwe. Okyerewfo no hyehye ne nsem no nyinara per dze kyere de dza oreka ho asem no nyinara hia no pepereper. Ewiei ngyegyee no so ma awensem no ye dew ye enyika na osan so nya ndwom su. Nkasafua a okyerewfo no dze hyehye no ne ntseasee nnye dzen. Iyi boa ma akenkanfo nya do na pe de wobekenkan awensem no na oma no mu ntseasee da edzi pefee.

2.3.Ndze na tsebea

Se ekenkan awensem yi a, inya atsenka bi. Etse yaw, ihu de obi edzi no dofo bi hwambo. Se wo dofo bi dze w'akoma ahwe famu da a, fa w'adwen koto na hwe mbre otse. Yehu de okasafo no wo

yaw mu. Tsebea a ɔwɔ mu nnye enyigye koraa. Awerɔhow, enyiber na yaw tsebea mu na ɔwɔ no. Asem a ato no ma ɔpe de owu befa no ko dze, ehwe a ɔye asenyaw ankasa. Nkasafua a ɔwɔ awensem no mu no nnkyere pefee de ɔkasafu no ne ndze wo sor anaa de ɔwɔ famu naaso owu asem dze ɔye enyibersẽm. Nkasafua no n'ano ye hyew; ndze no forafora. Woso ihu no den?

2.4.Kasasu

Kasasu ahorow a ɔkyerẽwfo no dze dzi dwuma bi na yeabobo do wo ha yi:

Enyihanhan: ɔkasafu no ka de, 'Bi dze m'akoma ahwe famu,'Bi abo mo nkwa ahwetse'. Iyi kyere de asem yaayaw ato ɔkasafu no dze naaso woana botum eyi obi n'akoma ahwe famu? ɔkyere de ɔkasafu no ahanhan n'enyi akasa dodow ma asem no aye hu. ɔato asem no no mu nkyen ma aye dokodoko dodow. Nsem ahorow pii so wo awensem no mu a ɔkyere enyihanhan. Hwehwe dem nsem no nyinara na kyerekyere mu yie.

Kasambirenyi: nkasafua na nsem bi so wo ho a ɔkasafu no ebir enyi. Oebir onam nsem no n'ano dzen na enyi a ɔye nyan ntsi. Akanfo pe hon dodow ntsi ndzẽmba a ɔdze owu ba dze wommfua do. Iyi ntsi, dem nsem yi ne nkae mu no, ɔkyerẽwfo no adan enyi kakra. Nsem yi mu bi nye: morodwese obi rodwe a ɔkyere de nyimpa kor no ruwu. Me nsa esi famu- kyere de obi adaadaa me anaa m'enyida do asa. Nsu nntɔree, aahow so mpo mmbɔe, hen enyigye wi so nntɔree-iyi so ye kasambirenyi a ɔkyere de asem biara ennsi na...Dem kasambirenyi ahorow yi nyinara ma awensem no ye enyika. ɔsan so ma akenkanfo dwen nsem no ho ko ekyir na wofa mu aba.

Sẽ-nyimpa: ɔkyerẽwfo no dze sɛ-nyimpa dzi dwuma wo awensem no mu. ɔma owu nya nyimpa no su. ɔfre owu de egya owu. ɔse 'ao, egya wu, befa me ko'. Kasafua 'egya' ye enyidzi abɔdzin a yedze ma nyimpa, naaso wodze ama owu. Iyi kyere de owu no ho ye dzen de nyimpa a otum fa nyimpa ko beebi a ɔdze no boko. Kasasu ahorow pii wo awensem no mu. Hwehwe na kyerekyere mu.

Mbubudo

Tsir yi mu no, yeaye **Muruwu** awensem no mu mpensampensamu. Yeahwe awensem no n'asekyere, botae bi a ɔkyerẽwfo no gyinaa do dze hyehyee awensem no. Yeahwe kasasu ahorow a ɔwɔ mu na awensem no ne nhyyehyee so.

Dwumadzi

1. Kenkan awensem no bio.
2. Kyere wo ntseasee wo awensem no ho.

3. Kyere kasasu ahorow ebien a okyerewfo no dze dzii dwuma wo awensem no mu a woannka ho asem wo mpensampensamuye no mu.
4. Kyere siantsir a isusu de okyerewfo no dze dem kasasu no dzii dwuma no?

Tsir 3: Nyimpa Bae A Woako Awensem no mu mpensampensamuye Nyienyim:

Tsir yi mu no, yebpensapensa **Nyimpa Bae A Woako** awensem a Kobena Gyate Akwa kyerewee no mu. Yebohwe awensem no n'asekyere, okyerewfo no botae na nsentsitsir ahorow, tsebea a

ɔkyerɛwfo no wɔ mu, ndze a ɔdze kasae na kasasu ahorow a ɔwɔ mu. Dɛ mbre aber biara yɛka no, fa mber na kenkan awensem no yie ama eetum atse mpensampensamu no ase yie.

Botae

Adzesua yi nkɔ ewiei no, nna itum pensapensa awensem no mu fann wɔ aber a erohwɛ: a.

Botae/n'asekyere

- b. nhyehyɛɛ
- c. ndze na tsebea
- d. kasasu

Awensem no.....

NYIMPA BAE ɔAAKɔ

1. Nyimpa bae ɔaakɔ, wiadze kaa hen daa.
Abɔdze nkaa n'nyina hyɛ iyi ma,
Bosoom na wi mpo wopue a, wɔtɔ,
Nyimpa mmfi wiadze, nyimpa bae ɔaakɔ.
2. Sɛ wi kɔtɔ ma sum hyɛ a,
Otwar dɛ dwumayɛfo pon edwuma,
Otwar dɛ ogya n'edwumadze hɔ,
Kɔhom wɔ fie, na nyimpa bae ɔaakɔ.
3. Dɔfo pa etwa esu no ewie,
Kwantunyi fonafo edu fie,
ɔkɔ beebi a edzikamfo wɔ,
'Siandɛ wiadze dze nyimpa bae ɔaakɔ.
4. Enyigye mbordo ahomka ben a!
Wiadze yaw rennhaw no dabiarada,
ɔdomankoma dɛ mu na ɔwɔ,
Hɔ na yerokɔ, na nyimpa bae ɔaakɔ.

3.1. Botae/asekyere

Awensem no yɛ dza obi ahwɛ nyimpa n'abrabɔ mu nsem nye dza ɔkɔ do wɔ wiadze a abɔ no enyikam na ɔreka. ɔyɛ dɛ asem no yɛ nwanwa ntsi, epue n'ano ma ɔreka kyere noara no ho. Dza

ɔahwɛ ahyɛ no nsew no ama oesi n'adwen egyinae de nyimpa rutwa mu ara anaade nyimpa beseen wiadze mu ara. Oehu de nyimpa ye kwantumyi ara, ɔammɛkye bo wo wiadze ha. Asem no risi wo wiadze yi mu. Dem asem yi ye ɔkasafɔ no nwanwa ma ntsi ɔaka anaa ɔreka ato gua. Oehu de ɔye na se bosoom na ewia pue a, wɔɔ. Demara na ohu de nyimpa so n'abrabo tse. Se wɔwo abofra ketseketse mpo a, otum twamu wo wiadze na se nyimpa nyin den ara mpo a otwamu fi wiadze. Dza oehu no ama oesi n'adwen pi de, "Nyimpa mmfi wiadze". N'asem no ye nokwar. Se yetwa no tsiaba a, dza ɔkyerɛwfo no reka nye de, biribiara a ɔwo ahyese no wo ewiei. Mber bi beba a, nyimpa n'abrabo wo asaase yi do beba ewiei. Wiadze yi mu yaw, edwumadzen, ɔfona, enyigye nyinara bobo adze. Owu na otwa nyimpa n'abrabo do wo wiadze. Nyimpa boko akohom wo beebi a asomdwee na ɔdo wo dabida. ɔkyerɛwfo no dua n'awensem do ma yehu de nyimpa ne wiadze abrabo ye ntwamuhɛn akwatu ara; yebeseen mu ara. Yeammɛkye bo. Hɛn akwantu n'ano mmpem wiadze abrabo, pii wo ekyir. Nyimpa tse de mframa a ɔdze hwii rebesen ara. Iyi na aye ɔkasafɔ no nwanwa ma epue n'ano ma ɔdze roto gua no.

3.3.Nhyehyɛɛ

Awensem no wo nkyekyemu/afaafa anan. Nkyekyemu biara dze asentsitsir bi to gua. ɔfa a odzikan no ma akenkanfo tse ase de abɔdze ahorow bi tse de bosoom na wi hɔn ndzeyɛ kaa hɛn daa de nyimpa wo beebi ko. Dza ɔto do ebien so ma yetse ase de, mbrɛ ɔtse biara no, wɔye adze a wowie. Dza ɔto do ebiasa no ka de edzikanfo ko dada. ɔfa a ɔto do anan so kyere de beebi a nyimpa boko akohom no ye ɔdo mu, beebi a ɔyaw biara nnyi. ɔfa biara so wo nsensanee anan. Nsensanee a ɔye per no ma yehu de, adze kor na ɔkasafɔ no reka ho asem. ɔkasafɔ no hye ne nsem no ase fi ɔfa kor na ɔdze wie ɔfa anan. Nsensanee anan a ɔwo ɔfa biara mu no so ma yehu de asem biara a ɔreka no ho hia no pepeper. Nsensanee biara wo ewiei ngyegyee nsisido. Ewiei ngyegyee nsisido a ɔwo ɔfa a odzikan mu nye 'a b c'. Wo so hwɛhwe ewiei ngyegyee a ɔwo nkyekyemu nkaa no mu. Nkasafua a ɔkyerɛwfo no dze hyehyɛ awensem no ne ntseasee nnye dzen pii. Iyi ma awensem ye dɛw na ne ntseasee so si pi.

3.4.Ndze na tsebea

Ndze: Kasadwumfo no duaa gyinabew bi do dzii dwuma no dze dur no botae ho. Gyinabew no nye de, oye no de obi gyina ekyir rohwe biribi, rodwendwen ho ma ntsi adwen bi ebodwir no ma osian no nwanwa a oye no ntsi, asem epue n'ano ma oreka. Ndze no aye de obi a oridzi eboobow wo biribi ho. Okamu kakra a na wabre ne ndze adze so kakra na oesi nkrum so kakra. *Tsebea* a okasafo no wo mu no aye de mbre obi egyina ekyir ahwe biribi ehu mbre adzekor no osi tow ko ma oye no nwanwa. Nyimdzee bi ebodwir no do de saana nyimpa ammbekyebo na mbom oye kwantunyi. Oma okenkamfo no so hu na okaa de saana oye kwantunyi, a ommfi wiadze ha. Tsebea a owo mu no ye nwanwa tsebea. Yesan hu de, okasafo no wo enyidado de beebi a dabi oboko no ye bea a ohaw biara innyi ho iyi ntsi enyigye wo ne ndze mu. Onnyi suro wo ne daakye ho.

Kasasu

Ntotoho: Dza yebɔ no enyikam kor wɔ awensem no mu nye de owemfo no dze kasa ntoho edzi dwuma. Oka de, 'de mbre bosoom na ewia pue no demara na wowo nyimpa ma ono so "pue" – oba wiadze. Dem ntotoho yi gyina ho ma "nyimpa ne mbae" na bosoom na wi a.....wopue". Iyi so kyere de biribiara wo aber a wodze pue na ber a wodze to. De mbre bosoom na wi woto no demara na nyimpa ba wiadze a, oko. Ndze ngyegyee a owo woto na oko mu no ma adwen no saa wo ntoho dwumadzi no mu. Oma adwen a owo mu no si pi. Se Nyame n'abodze hyenhyen a woma hyew na nwin, ewia bosoom – a obiara nnyi hon do tum mpo pue na woto a, nna akantam nyimpa a onyin ono so oba a, oboko. Ntotoho ahorow pii na owo awensem no mu. Hwehwe ebiase ka ho na kyerekyere mu yie.

Nsisido/ntsimu: Okyerewfo no sisi asem 'nyimpa bae oako' do wo ofa biara mu. Iyi kyere de asem no hia no. Asem no ye nokwasem a osi aber biara.

Se-nyimpa: Okyerewfo no dze se-nyimpa dzi dwuma dze kyere mbre wiadze si dze nyimpa ba ma owu so dze nyimpa roko. Oma owu na wiadze ahoodzen na tum bi a oye nyimpa nkotsee na owo dem tum no a odze ye ndzamba. Iyi ma yehu de owu wo ahoodzen a otum yi nyimpa fi wiadze. Ahoodzen so ye adze bi a yetaa dze ma nyimpa. Tserɛ, okyerewfo no ama wiadze na owu ase nyimpa prekoper.

Mbubudo

Tsir yi mu no, yɛayɛ *Nyimpa bae ɔaakɔ*, awensem no mu mpensampensamu. Yɛahwɛ awensem no n'asekyerɛ, botae bi a ɔkyerɛwfo no gyinaa do dze hyehyɛ awensem no. Yɛahwɛ kasasu ahorow a ɔwɔ mu na awensem no ne nhyehyɛ so.

Dwumadzi

1. Kenkan awensem no bio.
2. Kyerɛ wo ntseasee wɔ awensem no ho.
3. Kyerɛ kasasu ahorow ebien a ɔkyerɛwfo no dze dzii dwuma wɔ awensem no mu a wɔannka ho asem wɔ mpensampensamuyɛ no mu.
4. Kyerɛ siantsir a isusu de ɔkyerɛwfo no dze dem kasasu no dzii dwuma no?

Tsir 4: Mber pa Bɛba awensem no mu mpensampensamuyɛ

Nyienyim

Tsir yi mu no, yɛbɛyɛ *Mber pa bɛba* awensem no mu mpensampensamu ahwɛ dza awensem no dze to gua pefee na dza ne nkyerɛase tse. Hyɛ no nsew de, wo so botum ayɛ dem awensem yi ara no mu mpensampensamu wɔ kwan fofor do.

Botae

Tsir yi mu adzesua nko ewiei no, nna itum yɛ awensem *Hwɛ Yie* mu mpensampensamu wɔ aber a erehwɛ ndzɛmba bi tse de

1. Awensem no ne nkyerɛkyerɛmu

2. nsentsitsir a ɔwɔ awensem no
3. Awensem ne nhyehyɛ
4. Kasasu ahorow

Yenko do.....

Awensem no MBER PA BɛBA

1. Mber nyina nnse;

Ntsi no nua, sie abotar,

Sɛ ndɛ wo nsa esi famu a,

Mma mmpa abaw; mber pa bɛba;

Osiandɛ mber dzi adandan.

2. Mber nyina nnse;

Ntsi me yer pa, sie abotar;

Sɛ ndɛ yɛrobɔ ohia dondo a,

Hɛn nsa besi ayewa m' ɔkyena;

Osiandɛ mber dzi adandan.

3. Mber nyina nnse;

Ntsi me nyenko brebo, sie abotar,

Sesei, ekã no fabi na ɔmma a,

Kaa hu dɛ, mber pa bɛba;

Osiandɛ mber dzi adandan.

4. Mber nyina nnse;

Ntsi no dɔfo pa, sie abotar.

Sɛ akɔ na annye yie a,

Fa no dem ara,

Na kaa hu dɛ, mber dzi adandan.

5. Mber nyina nnse;

Ntsi m'egya pa, sie abotar.

Sesei minnya edwuma nnye,

Minyim dɛ mber pa bɛba,

Obi nnyim dza ɔkyena dze nam,

Ntsi sie abotar

6. Mber nyina nnse;
Ntsi no kun nsiyefo hye ahom,
Oبرا nye hen ridzi esi dze,
Nanso minyim de obeyeye yie;
Osiande mber dzi adandan

Nkyerekyeremu

'Mber pa beba' ye awensem a no mu nsem hye nkuran papaapa etsiefo na akenkanfo. Oye awensem a otse de nkombɔ twetwe. Ansaana obi beka de 'mber pa beba' no nna asem a ohaw adwen esi ma ohia kasa kyere na akoma to yamu wo dem nyimpa n'afa. O(a)kyerewfo yi rekyerew aka adasa akoma ato hon yamu de ommfa ho dza oeesi no, oye den ara 'mber pa beba' osiande mber wo ho yi 'odzi adandan'.

Nsentsitsir

Nsentsitsir ye okyerewfo ne tsirmupow a oda no edzi wo n'akyerew dze to gua ma n'akenkanfo. 'Mber pa beba' dze nsentsitsir dodow ara to gua na bi nye: nkuranhye, ber, abotare na papa na bon. Yebe pensampensam nsentsitsir yi mu nkorkor.

Asentsitsir a odzikan ye nkuranhye. Nkuranhye nye de biribi esi na ereka akoma to yamubnsem akata dza esi no do. Iyi nye okyerewfo na siantsir a okyerew n'awensem no. Yekenkan awensem no yie si ase a, yehu de dza okyerewfo no reka kyere 'no nua, ne yer, ne nyenko brebo, no dofo, n'egya na no kun pa' nyina ye nkuranhye sem a oka de, 'mber pa beba'. 'Mber pa beba', iyi nye asem a okyerewfo no reka akyere adasa.

Dza otodo bio ye ber. Ber dzi akotsen wo okyerewfo n'awensem yi mu. Oda mbre ber nye nyimpa nam na sesa a, otum sesa. Okyere de, ber bi tum ba a no mu nsem nnye nanso, oye de yeye nyimpa yi dze yetum sie abotar, nya akokodur, enyidahɔ na ahohyedo de mber botum adan. Awensem yi n'ahyese kepem n'ewiei nyina gyina bere na no mu nsem ho. Ber sesa, ber dan, ber nyina nnse. Ber ho hia na ose fata de yebotum atse ber ase. Mfatoho nye nkyekyemu kor;

'Mber nyina nnse;
Ntsi mo nua, sie abotar,

Sɛ ndɛ wo nsa esi famu a, Mma
mmpa abaw; mber pa bɛba,
Osiandɛ mber dzi adandan'.

Awensɛm yi mu nsɛm da edzi pefee dɛ aber nko, na no mu adzeyɛ nko.

Bio, abotar. Ɔkyerɛwfo n'asɛnka nyina gyina abotar do. Sɛ bɛba dɛ 'mber pa bɛba' a nna gye dɛ abotar bata ho. Sɛ abotar nnyi ho a dza ɔnnɛ na nyimpa bɛyɛ. Sɛ abotar nnyi mu a, nyimpa botutu mbirika ekehyia nsɔhwɛ a bia nkyɛ ndzɛmba papa rebɛ. Ɔkyerɛwfo no kaa 'sie abotar' fi n'awensɛm no ne nkyɛkyɛmu kor kesi nkyɛkyɛmu enum mu. Nkyɛkyɛmu biara mu no ibohu 'sie abotar' wɔ hɔn nsensanɛɛ a ɔtɔdo ebien mu. Nkyɛkyɛmu kor no ka dɛ 'ntsi no nua, sie abotar', ebien no ka dɛ 'ntsi me yer pa, sie abotar', ebiasa no ka dɛ 'ntsi me nyenko brɛbo, sie abotar', anan no ka dɛ 'mo dɔfo pa, sie abotar' na enum no ka dɛ, 'ntsi m'egya pa, sie abotar'. Ɔkyerɛwfo no tsii 'sie abotar' do dɛm ara. Iyi kyere asem kor a ɔpɛ dɛ ɔka; ne tsirmupɔw.

Dza otwa to yɛ papa na bɔn. Asentsitsir kor so a yehu no awensɛm yi mu so nye papa na bɔn. Yehu ebirabɔ a ɔwɔ ber na n'adzeyɛ mu. Yenya ber pa na ber bɔn. Awensɛm n'ahyɛsɛ kesi n'ewiei da no edzi dɛ sɛ bɔn wɔ ho a nna ɔno dze papa so wɔ ho. Iyi ntsi na ɔkyerɛwfo no kaa dɛ 'mber pa bɛba'. Mber bɔn aba dze mbom, mber pa bɛba. Yɛhwɛ nkyɛkyɛmu kor mpo a, ɔkyerɛwfo no ka no wɔ ne nsensanɛɛ ebiasa na anan mu dɛ, 'sɛ ndɛ wo nsa esi famu a, mma mmpa abaw; mber pa bɛba'. Sɛ ɔhaw aba a, 'mber pa bɛba'.

Nkasafua a ɔkyerɛwfo no dze dzii dwuma

Nkasafua a ɔkyerɛwfo no pɛ na ɔdze dzii dwuma wɔ n'awensɛm mu. Ɔkyerɛwfo no dze nkasafua a ɔda famu na ne ntseaseɛ so nnye dzen dzii dwuma. Mbom, ɔnnɛ bɛtɛɛ. Nkasafua na nsemfua no yɛ werɛm kakra osian kasambirenyi ne dwumadzi wɔ awensɛm no mu. Obiir kasa no enyi ntsi nsemfua bi wɔ mu a ohia nkyerekyerɛmu ketseketse bi ansaana ntsease ayɛ edwuma. Naaso, iyi mma kasa no nnye dzen biara; no mu da ho na ntsease wɔ mu.

Kasa mpaapaamudze

Akyerɛw na akenkan biara hia kasa mpaapaamudze wɔ ne dwumadzi mu ama oedzi mu. Kasa mpaapaamudze boa ma akenkan yɛ dɛw, mu tsew, ntsease ba mu na odzi mu so. Sɛ bi nnyi akyerɛw anaa akenkan mu a, ɔma dwumadzi no yɛ traɛ na aba biara mmba mu. Akyerɛw na akenkan mapɛ biara hia kasa mpaapaamudze wɔ no dwumadzi mu. Ɔkyerɛwfo no ammbɛl abor koraa. Ɔdze kasa

mpaapaamudze hyehyee n'awensem 'mber pa beba' mu ma n'akenkan na ne tsie yee dew. Okyerewfo no dze osi-san, nsanhɔ, osi-wiei na ɔdzedze nsanhɔ dzii dwuma. Se ehwe awensem 'mber pa beba' n'akyerew no yie a, nkyekyemu enum na esia n'ewiei no okyerewfo no ammfasiwiei ennsi ne nsensanee a otwa to n'ekyir. Nkye akyerew biara n'ewiei no wɔdze osi-wiei si ekyir mbom, iyi ye kwan a okyerewfo no kyereew n'awensem no ma ɔaye few.

Awensem ne nhyehyee

Awensem, 'mber pa beba' ye awensem tsiaba a ɔwɔ nkyekyemu esia. Nkyekyemu biara so wɔ nsensanee enum mbom, nkyekyemu enum nko wɔ nsensanee esia. Okyerew no ntsiantsia mu a ɔma n'akenkan nnye dzen. Nkyekyemu biara wɔ asentsitsir a ɔdze to gua. Yee pensampensam nkyekyemu biara mu yie.

Nkyekyemu a ɔdzikan n'asenstitsir a ɔdze to gua ye akokodur. 'Mber nyina nnse na ɔye ampa so. Ber bi ye enyigye, bi ye awerehow, bi kɔ yie, bi so nnkɔ yie naaso ne nyina mu no, okyerewfo no se de, 'abotar' ho hia. Mbom se ɔbra nnkɔ yie na ibotum enya dem abotar yi a, kye de ewɔ akokodur. Akokodur nye de ibotum egyina ɔhaw ano na nnkɛpa abaw wɔ mu. 'Se nde wo nsa esi famu a, mma mmpa abaw'. Se obi ne nsa si famu a nna okyere de, dem nyimpa no edzi 'nkogu'. Se obi dzi nkogu a ɔɔfabi a, ɔye dzen de obenya awerehyemu de ɔbeyee yie dabi. Dem nyimpa no hu noho de ne wiadze ase. Mbom okyerewfo no hye nkuran de se mpo nde edzi nkogu a, onnyi de epa abaw na de mbre nkogu aba no, 'mber pa beba' osiande 'mber dzi adandan'.

Nkyekyemu ebien no ne tsir asem gyina ahohyedo do. Yebeka ahohyedo osiande okyerewfo no dze 'yer pa' dzii dwuma wɔ ho. Basia ye Odomankoma abɔdze bi a, n'ahohyedo dze obi nnkotum akyere. Binom wɔ ahohyedo papaapa na binom so nnyi bi koraa. Yereka ahohyedo wɔ basia n'afa osiande okyerewfo no kor do kaa de, 'se nde yerobo ohia dondo a, hen nsa besi ayewa m' okyena'. Basia ye nyimpa bi a sebe, ɔmmpe hia. Basia biara mpe de noho tsetsew, ɔmmpe de ne fie to pan; ɔpe adze a ɔye few, adze a no bo ye dzen na ɔkasa ma noho. Se ahohyedo nnyi ho a obesi den beyee na basia a ɔpe dem ndzɛpa yi nye wo aye adwen wɔ awar mu de hon 'nsa besi ayewa m' okyena' wɔ ber a adzekyee biara mu no ɔhaw no sor ara na ɔko? Okyerewfo no reka de se ahohyedo wɔ ho a, ɔyer botum enya abotar ama ne hokafo na ɔatse honho ase de, 'mber dzi adandan'.

Nkyekyemu a ɔtɔdo ebiasa no kasa fa enyiwadzen ho. Ansaana obi befa nyenko no ɔhwe de ana dem nyimpa no n'enyi ye dzen, ɔwɔ abotar, otsie afotu? Iyi na bebiree a ɔkeka ho na yebisa. Okyerewfo no kasa kyere 'nyenko' de, 'sesei ekã no fabi na ɔmma a' na okyere de, dem

nyimpa no twe a, ɔɔntwe, ɔye biara a ɔɔnye yie; se ɔdze bo do a, ɔmmbo. Dem tsebea yi hia enyiwadzen mapa. Se innyi enyiwadzen a, ebepa abaw. Se w'enyi nnye dzen a adwen biara nnkeba wotsir mu de, 'mber pa beba'. Iyi saso ntsi na ɔkyerewfo no ahwe ehu na ɔreka de, nyenko(obiara) n'enyi nye dzen na ɔmfa ndamye ngyina akotorka nyina na se mpo 'ɔka no fabi na ɔmma a', mber pa beba osiande 'mber dzi adandan'.

Nkyekyemu anan no kasa fa enyiso ho. Enyiso nye de dza ibenya biara no ibosuo mu demara. Mbom, se asem bi to wo na efa no mbre ɔtse noara a, eye a ɔɔnye yie. Bi nye dza ɔkyerewfo noara kaa no wo ne nsensanee ebiasa no mu de, 'se ako na annye yie a; fa no dem ara'. Se yeka de obi 'ako ma annye yie a' na ɔkyere de, dem nyimpa no tuu anamon bi nso oendzi nkonyim. Dem nyimpa yi na ɔkyerewfo no reka de, ɔmfa no dem ara. Fa no de basia ako awo na sebe, ba no ammba. ɔye yaw, ye awerehow mbom obenya nkwa beye sen de ɔnye ne ba no boko. ɔwo nkwa no dze, ɔwo de n'enyi so ne nkwa a oenya. Se w'enyi so dza ewo a inya awerehyemu de 'mber pa beba' osiande 'mber dzi adandan'.

Nkyekyemu enum kasa fa enyidado ho. Ekenkan awensem no yie a ihu de ɔkyerewfo no afa ɔba ndze dze rekasa kyere 'n'egya' de osie abotar. 'Onnya edwuma nnye' no nnkyere de onnkenya edwuma aye ara da. Abofra no wo enyidado ɔbeye yie ntsi ɔkaa de 'minyim de mber pa beba, obi nnyim dza ɔkyena dze nam'. ɔwo enyidado de onnyi nde no, ɔwo no kyena. Se nde na biribi nko yie na edwuma mmbae a enyidado wo ho de, ɔkyena dze ndzepa na nsempa nam ntsi ɔbeye yie. Bi a nkye n'abaw mu ebu naaso ɔapa ho rekasa n'egya de 'mber pa beba'.

Nkyekyemu esia a otwa to no kasa fa nsiye ho. ɔkyerewfo no dze 'kun' gyina nsiye anan mu. Mbanyin enyi ye dzen. Se ɔhaw ba a, wofre de 'mbanyin mbra o!' Mbanyin hon su dooso na woye nsiyefo mapa. Ansaana banyin bi be pa abaw no, nna kye de kasa dodow aba mu na se nnye dem a, obegyina ekesi de dza ɔrohwehwe no obenya. Mbom, se banyin warfo botum egyina amandze ekesi ewiei a, kye de ɔwo yere badwemba bi taa n'ekyir. Iyi saso ntsi na ɔkyerewfo no kyereew no wo ne nsensanee ebien kesi anan mu de,

'Ntsi mo kun nsiyefo hye ahom,

ɔbra nye hen ridzi esi dze,

Nanso minyim de ɔbeye yie.'

Se ekyitafo bi nnyi ho a, nkonyimdzi nnyi ho. Inya obi a ɔgye wo dze wo abrabo mu a, wo ho har wo. ɔyer pa kyekye no kun were de, 'mber pa beba'.

Ewiei ngyegyee

Awensem biara wɔ ewiei ngyegyee a ɔma ɔda nsew wɔ kasadwin nkaa no ho. Ewiei ngyegyee ye ngyegyee a otwa to wɔ nsensanee biara ne nkasafua a odzi ewiei mu wɔ nkyekyemu biara mu.

'Mber pa beba' n'ewiei ngyegyee sã do; **abccd**.

Mber nyina **nnse**

Ntsi mo nua, sie abotar

Sɛ ndɛ wo nsa esi famu **a**

Mma mmpa abaw; mber pa beba;

Osiandɛ mber dzi adandan

Ɔsã dem ara dze kesi ase na iyi kwan a ɔkyerɛwfo no faa do hyehyɛ n'awensem ma ɔyɛ dɛw. Iyi ma awensem no dzi mu na owie pɛr yɛ.

Ndze na Tsebea

Ndze;

Ɔkyerɛwfo no ndze a ɔdze kaa awensem no ye ndze a ɔda famu koraa. Ibesi den ehu? Sɛ obi rekyekye werɛ anaa ɔreka obi n'akoma ato ne yamu a, ɔmmfa ndze a ɔyɛ dzen nnkasa. Ɔdze ndze a ɔdwen na da famu dzi dwuma ama ne nsem no ato akoma do. Iyi nye ndze a ɔkyerɛwfo no dze dzii dwuma a ɔma ne nsem no kã akoma na ɔkyekye werɛ. Ndze a ɔkyerɛwfo no dze dzii dwuma no ma awensem no dzi mu na dza ɔpɛ dɛ ɔdze to gua so nya kwan da edzi.

Tsebea

Tsebea a ɔkyerɛwfo no wɔ mu no ye awerekyekyer anaa nkuranhyɛ tsebea. Ɔdze abotar rekasa kyere nyimpa kuw bi tse dɛ enuanom, yernom, anyenkofo, adɔfo, egyanom na nkunom dɛ wonsie abotar osiandɛ mber pa beba.

Kasasu

Kasasu ye adze kor a odzi akotsen wɔ kasadwin. Kasa u ye su bi a ɔbata kasa ho a ɔma ɔyɛ soronko fi kasa traɛ ho. Ɔda nsew wɔ akyerɛw biara mu. Kasadwin a odzi mu biara dze kasa su bi dzi

dwuma. 'Mber pa beba' dze kasasu bi tse de kasambirenyi, se-nyimpa na ntsimu dzii dwuma. Yebe pensampensam kasa su biara mu.

Dza odzikan ye kasambirenyi. Kasambirenyi ye kasa a ɔasesã n'enyi a ɔma ɔdan kakra fi kasa traã ho. Mpanyin hye da dan anaa wɔ sesa kasa no su dze dzi nkɔmbɔ tsitsir se mbɔfra wɔ hɔn ntamu. ɔkyerewfo no nam mpanyin kasa do biir kasa no enyi dze ne nsem too gua. Yebohu iyi wɔ nkyekyemu kor kesi ebiasa mu. Dem nkyekyemu yi mu no, hɔn nsensanee a ɔtɔdo ebiasa dze kasambirenyi dzi dwuma. Mbom, nkyekyemu ebien ne nsensanee ebiasa na anan no ye kasambirenyi. Nkyekyemu kor ne nsensanee ebiasa no ka de, 'se nde wo nsa esi famu a'. Se wɔka de nyimpa bi ne nsa esi fame a, bi a na ɔato famu anaa ɔnoara nyimpa no na ɔpe na ɔdze ne nsa esi famu. Mbom, ɔkyerewfo no dze mpanyin kasa na mpanyin dwen totoo n'akyerew ho. Akan kasa mu no, se wɔka de obi ne nsa esi famu a na ɔkyere de, Dem nyimpa no edzi nkogu anaa ɔahwe ase wɔ kwan bi do. Nkye ɔkyerewfo no botum aka nobtraa de, 'se nde edzi nkogu a' naaso ɔannka no dem. Obiir kasa no enyi. Nkyekyemu ebien ne nsensanee ebiasa na anan no so ka de, 'se nde yerebo ohia dondo a, hɔn nsa besi ayewa m' ɔkyena'. 'Yerobo ohia dondo' no kyere de 'ohia adokor hen', 'yeridzi hia', 'ohia akyekyer hen' anaa 'oehia hen'. ɔtoa do kaa de, 'hen nsa besi ayewa m' ɔkyena' na yebe kyere iyi mu de, 'yebedzi yie ɔkyena' anaa 'ɔbeye yie ɔkyena'. Nkye ɔkyerewfo no botum aka no de mbre yakyerɛkyerenmu yi naaso, obir kasa n'enyi. Nkyekyemu ebiasa ne nsensanee ebiasa no so ka de, 'sesei, ekã no fabi na ɔmma a'. Dem nsemfua yi ne kasa traã mu no, nkye ɔkyerewfo no botum aka no de, 'sesei, eye woho den ara na ɔnnye yie a', naaso obir enyi. Mosusu de, ɔkyerewfo no kyereew n'asem no mbirenyi mu amma asem no annye yaw pii. Se ifura kasa tam a asem a ɔye yaw, ɔye awerehow na ɔye asefem tum dan ye bɔkɔɔ.

Kasasu a ɔtɔdo bio ye se-nyimpa. Se yeka de se-nyimpa a yekyerɛ mu de yedze nyimpa no su rema adze a nkwa nnyim, aboa anaa adze a ɔnnye nyimpa. Nsem bi wɔ hɔ a nyimpa na ɔka naaso yedze hye abowa anaa adze bi a nkwa nnyi mu ano. Ndzeyee bi wɔ hɔ a, nyimpa na ɔye nso yedze ma dza ɔnnye nyimpa. Su bi so wɔ hɔ a, nyimpa na ɔda no edzi naaso wɔdze dza nkwa nnyi mu anaa dza nkwa wɔ mu mpo a ɔnnye nyimpa na wɔdze dem su no ma no. Dem ndzɛmba yi nyinara na se yehu no de wɔ dze ama dza ɔnnye nyimpa a yefre no se-nyimpa. Ama ɔase nyimpa; senyimpa. Kasadwin mu na wɔtaa dze dzi dwuma. ɔkyerewfo no dze se-nyimpa dzii dwuma wɔ n'akyerew yi mu wɔ ne nkyekyem enum no ne nsensanee a ɔtɔdo enum mu. ɔse de, 'obi nnyim dza ɔkyena dze nam'. Dza ɔkyena dze nam na yebɔhwe. Nyimpa na ɔnantsew. Nyimpa na yebotum aka de 'ɔnam' ha anaa ɔnam hɔ no. ɔkyena nnantsew. ɔkyena nnyi nan na ɔnantsew ako beebi.

Nyimpa na ɔwɔ nan a ɔnantsew. Yehu no pefee de, ɔkyerɛwfo no dze nyimpa no su 'nam' dze ama ɔkyena. Iyi ntsi na yɛka de, ɔyɛ sɛ-nyimpa. Ɔaka n'asɛm no ma ɔnye nyimpa no su ase. Asenka no ase- nyimpa.

Dza otwa tun yɛ ntsimu. Ntsimu nye de, yebesisi nkasafua, nsentɔw anaa nsemfua bi do atoatoa do. Ehwe awensem no yie a, ntsimu dzi akotsen wɔ mu papaapa. Nkyekyɛmu kor kapem nkyekyɛmu enum no mu biara ne nsensanee a ɔtɔdo ebien no ne fa a ɔtɔdo ebien nyina dze nsemfua, 'sie abotar' dzi dwuma. Ɔdze dem nsemfua no reka dza ɔpede n'etsiefo na n' akenkanfo yɛ. Nkyekyɛmu biara ne nsensanee a odzi kan so dze nsemfua kor dzi dwuma 'mber nyina nnse'. Bio, nkyekyɛmu biara n'ewiei nsensanee dze nsemfua, 'mber dzi adandan' dzi dwuma mbom nkyekyɛmu enum dze, ɔmmfa dem nsemfua yi nndzi dwuma.

Mbubudo

Yɛahwe *Mber pa beba* awensem no na yɛayɛ mu npensampensamu. Ndzɛmba a yɛbobɔ do no bi nye awensem no ne nkyerɛasee, nsentsitsir ahorow a awensem no dze to gua, kasasu ahorow a ɔwɔ mu, ɔkyerɛwfo no ne tsebea na ndze a ɔdze kyerɛw awensem no na pii a ɔkeka ho. Bɔ mbɔɔɔzen kenkan awensem no bio na woara gyina wo ntseasee do fa yɛ awensem no mu mpensampensamu yie.

Dwumadzi Bua nsembisa a odzidzi do nyina

1. Kenkan awensem no bi na gyina do pensapensa dza odzidzi yi mu. Fa woara wo nkasafua yɛ.
 - a. awensem n'asekyere/ɛɛɛ
 - b. no mu nsentsitsir
 - c. kasasu ahorow
 - d. awensem ne nhyehyɛ
 - e. ɔkyerɛwfo no ne ndze na ne nhyehy

Tsir 5: Hwe Yie Awensem no mu mpensampensamuyɛ

Nyienyim

Tsir yi mu no, yebeye *Hwe yie* awensem no mu mpensampensamu ahwe dza awensem no dze to gua pefee na dza ne nkyerese tse. Hye no nsew de, wo so botum aye dem awensem yi ara no mu mpensampensamu wo kwan fofor do.

Botae

Tsir yi mu adzesua nko ewiei no, nna itum ye awensem *Hwe Yie* mu mpensampensamu wo aber a erehwe ndzamba bi tse de

5. Awensem no ne nkyeremyemu
6. nsentsitsir a wo awensem no
7. Awensem ne nhyehyee
8. Kasasu ahorow

Yenko do.....

Awensem no HWE YIE

1. Dza nyimpa beye biara;

Wobekã ho asem,

Naaso, nnye dza nyimpa bohu nyina,

Na wo de okã ho asem,

Ano patser a, osen anamon,

Ntsi hwe wo tekyerema yie.

2. Hwe w'edzidzi mu yie;

Nnye mbea nyina na wodzidzi,

Okom dze wo den mpo a,

Mmfa wo nsa ebien nndzidzi,

Obi rohwe wo ntrɔma,

Ntsi hwe yie

3. Hwe w'edwumaye mu yie; Kyen nnye daw a, nnye ne dede a,

Wo semina suar mpo a ohoa wo nsaano.

Sika ye anoma, otu;

Sika tu ane kyere ye dzen,
Ntsi onua, hwe yie.

4. Atɛkye, abo na nduasɛn wɔ kwan m'
Itu anamɔn a, hwe yie,
Eto abasa a hwe yie,
Ɔkwan ho wɔ nhwirom,
Abrewa sekan na nsoɛ pii, Ntsi
hwe yie.

5. Hwe yie wɔ w'akyenkofa m',
Ifura tangow ntsi nndzi epirapiragor,
Etse nhwehwe dan mu a, enntotw abo;
Fie nyimpa aye no ho abosomanketsew,
Odzi adandan mber pii mu,
Ntsi hwe yie.

6. Kaa de, ɔsempefo bi tsew kwan ho;
Ntsi hwe wo kasaa yie,
Na annto w' fintsidua,
Tɛkyerema tse de ogya na sekan,
Ɔwowɔ, otwitwa, odzi ewu,
Ntsi hwe yie.

7. Mpanyin ka asem bi de
Dua a, Kweku Ananse wuu do no;
Ne ba Ntsikuma nntɔ nkom wɔ ase,
Kaa bio so de;
Wɔmmfa nkongyaa mmpuw abowatsia ne ba;
Ntsi hwe nyia enye no rifimfen no yie.

Awensem ne nkyerɛkyerɛmu

Sɛ wɔka dɛ 'Hwɛ yie' a Akan kasa mu no ɔyɛ kɔkɔbɔ anaa kasakyɛ nsem anaa nkasafua a yɛdze dzi dwuma wɔ ber a afotusem anaa enyibersɛm bi abɛda gua. Ɔkyerɛwfo no dze nkasafua 'hwɛ yie' dzi dwuma wɔ n'akyerɛw mu dze bɔ kɔkɔ dɛ omuo dɛ nyimpa bɛtsena wiase dɛ sebe, ma biribiara mmfa noho na mbom, ɔsɛ fata dɛ akwan nyina mu no, yɛdze enyidahɔ bɛtsena na yɛanntɔ ɔhaw biara mu anaa yennyɛa amandze. 'Hwɛ yie' yɛ awensem a ɔkyerɛwfo no ahyɛ da dze kasa awen no kwan soronko do dze rutu fo.

Nsentsitsir

Nsentsitsir yɛ ngyinado nsem a ɔkyerɛwfo bɔ no apɔwapɔw wɔ ne nsem mu dze da ne tsirmu nsem edzi. Awensem 'Hwɛ Yie' dze nsentsitsir pii noara to gua. Iyinom bi nye: abrabɔ mu nsem, abrabɔ mu ahohyɛdo, aber do hwɛ na no mu ndzeyɛɛ, enyidahɔ wɔ biribiara ne nyɛɛ mu, anyenkoyɛ, papa na bɔn na bebiree a ɔkeka ho. Yɛbɔhwɛ nsentsitsir no nkorkor na yɛakasa afa ho.

Odzikan yɛ abrabɔ. Ɔbra da suahu ahorow edzi. Ɔbra ma yehu dɛ dza nyimpa bohu biara no ɔdze n'ano bɛka ho asem; dɛ ɔyɛ papa anaa ɔyɛ bɔn, wɔka anaa wɔnnka no nyimpa bɛka. Biribiara rokɔ owu a ɔkra nyimpa ansaana ɔakɔ ekowu na mbom nsem bi wɔ ho a ɔmmfata dɛ ɔdasanyi dze n'ano bɔbɔ do mbom hwɛ ara na ɔwɔ dɛ ɔdze n'enyiwa hwɛ amma ɔannkefa ɔhaw biara ammba no do. Ɔkyerɛwfo no da no edzi pefee wɔ ɔfa kor no mu dɛ ampaara abrabɔ yi mu no, 'dza nyimpa beyɛ biara, wɔbɛka ho asem.'

Ɔto do bio yɛ ahohyɛdo. Ahohyɛdo yɛ su bi a ho hia ma nyimpa biara. Asem biara hia ahohyɛdo, dɛ ɔyɛ papa anaa bɔn. Sɛ annhyɛ woho do a, ibenya amandze. Ɔbra akwantu yi n'ahyɛse kesi n'ewiei hia ahohyɛdo. Ahohyɛdo nnyihɔ a enyinguase ba, ɔhaw ba, esian to nyimpa na bebiree a ɔka ho. Ne saso ntsi na ɔkyerɛwfo no etsintsim wɔ n'awensem yi mu ada no edzi dɛ ahohyɛdo hia. Sɛ obi nnyi ahohyɛdo a, ne ferfo tum hu n'ahoto. Ɔkyerɛwfo no daa no edzi wɔ ɔfa a ɔtɔdo ebien no mu.

Bio no, awensem 'Hwɛ Yie' kyɛɛ dɛ ohia dɛ nyimpa yɛ enyidahɔ. Sɛ wɔka dɛ obi n'enyi da ho a na yɛrese dɛ dem nyimpa no hwɛ n'anamɔntu so yie. Ɔnnɔyɛ n'adze basabasa. Ɔyɛ adze no kwan do na wɔ ber a ɔsɛ mu. Ɔhwɛ afa na afa ansaana ɔayɛ biribi. Nyimpa a n'enyi da ho nnya amandze. Ɔdwen dza ɔyɛ ho yie. Iyi ntsi ɔkyerɛwfo no dze togua dɛ ahweyie ho hia papaapa na sɛ iyi beyɛ yie a ogyina enyidahɔ do. Yɛbohu no ɔfa a ɔtɔdo anan no mu.

Ewiei no, awensem yi kasa fa anyenkoye ho. Nyenko nnye dua na atwer no dababiara. Nyenko nde tum dan tamfo okyena. Nyenko ye naaso otofabi a ahweyie ho hia wo anyenkofa mu. Nyenko botum adan noho edzi wo dzem. Okyerewfo no da no edzi pefee de nyimpa sesa. Mma mmfa wo were nnhye nyimpa mu dodoodow; annhwe a oedzi wo hweambu. Okyere no ofa a otodo enum mu.

Awensem ne Nhyehyee

Nhyehyee ye kwan a okyerewfo bi fa do dze ne nsem to gua. Nkasafua a odze dzii dwuma, kwan a odze kasa mpaapaamu dze dzii dwuma na mpo nkyekyemu ahorow a odaa no edzi nyina ka nhyehyee ho.

Okyerewfo ne nkasafua a odze dzii dwuma

'Hwe Yie' ye awensem a n'akenkan nnye dzen. Okyerewfo no dze nkasafua a ne ntseasee nnye dzen koraa dzii dwuma. Nkasafua no da famu. Onnhia nkyerekyeremu bebiree biara. Obiara tum kenkan, tse ase na ofa aba pa fi mu. Obiara tum kenkan awensem yi, de eye abofra anaa panyin osiande nkasafua no nnye dzen. Mbom, osiande be wo awensem yi mu ntsi ohia badwemba ma otse awensem no ase. Iyi ma awensem ne fa bi hia nkyerekyeremu kakra.

Kasa mpaapaamudze

Okyerewfo no dze kasa mpaapaamudze ahorow dzii dwuma wo n'awensem mu. Odze nsanho, osisan na osi-wiei dzii dwuma. Iyinom boa ma akenkan ye dew, no mu da ho na ntseasee da edzi. Kasa mpaapaamu dze nnyi akyerew na akenkan mu a, ntseasee papa biara mmba akyerew na kasa dwumadzi mu.

Awensem ne nkyekyemu

Awensem 'Hwe Yie' wo nkyekyemu esuon. Nkyekyemu biara wo nsensanee esia, ka ofa esuon nko a ne nsensanee ye esoun. Okyerew no nsentow ntsiatsia mu. Nkyekyemu biara wo asentsitsir potsee bi a odze to gua. Yempensampensam nkyekyemu biara mu yie na yenhwe nsem potsee a okyerewfo no dze atogua mu.

Nkyekyemu kor no, okyerewfo no kasa fa kasa ho. Odaa no edzi kyeree de kasa dodow muo. Ampaara de dza nyimpa bohu biara no obeka ho asem. Yebohu iyi wo nsensanee a odzikan na dza otodo ebien wo ofa a odzikan no mu, *'dza nyimpa beye biara; wobekã ho asem'* na mbom okyerewfo bo koko de *'naaso, nnye dza nyimpa bohu nyina, na owɔ de okã ho asem,'* nsensanee ebiasa na anan no. Nnye dza edze w'enyiwa bohu nyina na owɔ de idzi ho nkombɔ. Nsem bi wo ho

a wɔnnka. Obi n'asem, oberempɔn bi n'asem, ɔmampanyin bi n'asem na nsem bi wɔ ho a edze asowa tsie ara na mmfa ano nnka. Nsensanee enum ka de, '*ano patser a, ɔsen anamɔn*.' Iyi kyere den? ɔkyere de se w'ano ka asem a onnyi de ɔka a, ɔtse de enam na epurow na ato bɔnsa bi mu. ɔkyerewfo no kaa dem dze kyeree hu a ɔyehu de edze ɔano benya asem. Eka kasa na annhweye a ebotum akeda fiadze, wotum bo wo kaw anaa de wotum mpo kum wo. Amandze kese a ɔtse dem ntsi ɔkyerewfo no robo kɔko de yenhwe hen 'tekyerema yie', nsensanee a owie no.

Nkyekyemu ebien no kasa fa ahohyedo ho. ɔkyerewfo no dze 'edzidzi' gyina ho ma dwuma horow a yedzi. Edziban ho hia papa de mbre biribiara a osi hen enyiwa do hohia pɛpɛper na mbom, 'nnye mbea nyina na wodzidzi'; iyi kyere de nnye nnye dza osi w'enyiwa do biara na efa kwan a eye. Ahohyedo ho hia. Annhwe yie a ebeye dza ɔmmfata wo ber ɔnnse mu. ɔkyerewfo no kor do ka de, 'ɔkɔm dze wo den mpo a, mmfa wo nsa ebien ndzidzi'. Dem asentɔw yi kyere ahohyedo no su kor. Se ehwe woho do a, w'enyiwa do da wo ho ma itum ye dza ɔfata wo ne ber mu ma yie to yie. Erokɔ reba yi, obi rohwe w'anamɔntu ara de ebenya amandze ma ɔaka de ahweye a annye ntsi ahwease. Iyi na ɔkyerewfo no dze ka 'obi rohwe wo ntrɔma'. Kɔkɔbo no nye de, hwe yie.

Nkyekyemu ebiasa no kasa fa ber na no mu adzeye ho. Ber biara wo adzeye potsee bi a ɔnye no nam na se ahweye ammba ebɔhwer adze kese. Iyi ntsi na ɔkyerewfo no dze 'edwumaye' gyina ho maa ndzepa a obi wo. Ber dzi adandan. ɔkyerewfo no rekyere de, ma w'enyi nso dza okitsa wo biara na bo ho ban na se annye dem na ndzepa no fi wonsa a, ɔbeye dzen de ibenya akwanya kese a ɔtse dem bio. Dza ewo no suar denara mpo a, itum dze twitwa woho mma enyinguase annto wo, iyi ntsi na ɔkyerewfo no ka de 'wo samina suar mpo a, ɔhoa wonsa ano'. 'Sika ye anoma' na 'otu' yi, ahweye ho behia de ebobo w'egyapadze kakra biara ewo no ho ban. Nkyekyemu anan n'asentsitsir gyina enyidahɔ do. ɔkyerewfo no de, 'atekye, abo na nduasɔn wo kwan m' '. Nsu to na itsia atekye mu a, ebɔ famu. Abo gugu akwan mu na eprampram do a, ebɔ famu na se nduasɔn sisi akwan mu a, ɔtse de kukuw, ɔbepira wo. Iyi nyina ye asetena mu amandzehu a oesuma a se annhwe yie a ebotum ato wo. Enyidahɔ boa ma ehweye wo asetena mu. W'enyi da ho a nnye kwan biara na eboko, nnye asem biara na ihu a ebeka, nnye nkɔmbo biara na enye obi bekye; nnkeye ndzemba pii wo ber a immbuu ho nkontaa.

Nkyekyemu enum no kasa fa anyenkoye anaa nyimpa nkitahodzi ho. Nyenkoye ye few mbom se annhwe yie a eboto esian mu. Mmfa kwan mmfa nyenko ara gyan mbom ɔse fata de ehwe woho hyia na ibisabisa woho de, "nyenko yi bɔboa m' anaa ɔnnkɔboa me"? Iyi na ɔkyerewfo no yii

ho pefee de, 'ifura tangow ntsi nndzi epirapiragor'. Inyim wotam mu a, ebeye dza onnkefa asem abre wo. Hon a wobɔ gye wo do kor noara na wobotwa honho edzi wo ewu ma aka wo kra. Iyi ntsi na okyerewfo no kaa de ' fie nyimpa aye no ho abosomanketsew, odzi adandan'. Ehwe yie a, nnkenya amandze.

Nkyekyemu esia no kasa fa papa na bon ho. Osi ofa kor ne nsem no do bio. Mbom oda tum a ɔwɔ kasa (tekyerema) mu edzi. Okyerɛ de se w'aso mu bɔdwe wo a, tekyerema a. Se ibenya amandze so a, tekyerema a. 'Tekyerema tse de ogya na sekan, ɔwowɔ, otwitwa, odzi ewu'. Ogya ye adzeyie sanso see adze na demara so na sekan tse. Se tekyerema tse de ndzembra ebien yi a, nna ahweyie ho behia papaapa.

Nkyekyemu a otwa to no kasa fa suahu ho. Oɔra yi mu yi, ibenya suahu ahorow. Bi ye binom hon suahu a oenya no abrabɔ mu, bi so ye woara wo suahu a enya. Mpanyin kasa bi tse de be ye suahu a wonam nyansa kwan fo aka ato ho a obi dze dzi dwuma a ɔboboa no wo abrabɔ mu. Be nyina ye suahu osiande mpanyimfo nyina aye mbofra pen ansaana worudu mpenpendo wogyina no. Wonyim de wɔafa ndzembra pii mu na nnye ne nyina na owiee hon yie na wɔmmpe de nkyirma so behyia bi na se wohyia bi mpo a wo bohu kwan a wɔbɛfa efi mu ntsi na wɔdze kasa wenn nsem too ho de nkyirma mfa do mbo bra na oesi hon yie. Okyerewfo no kaa de '*dua a, Kweku Ananse wuu do no, ne ba Ntsikuma nntɔ nkom wɔ ase*'. Asem yi ye bebu kɛse a oda ehintsasem edzi. Okyerɛ de, anamɔntu a obi tui a ennsi no yie no, mma ɔdasanyi bi nntu dem anamɔn kkr noara bi siantsir nye de onnkɛsi dem nyimpa no yie. Demara so na se innym bea obi fi a, nnka nsem ntsia no. Fa no de enye obi a ofi ahɛmfie enya asem na edze mpanyinsem na akokodur aka de ebe samɔn no, ehwe a eben asem besi? Nyia a ofi ahɛmfie no botum edzikan aka samɔn wo ansaana woara ekodu ahɛmfie ho. Iyi ntsi na okyerewfo no reka de '*wɔmmfa nkongyaa so mmpuw abowatsia ne ba*'. Se innym a bisa ansa na se nnkebisa dza, hwe yie.

Ewiei ngyegyee

Awensem biara wo ewiei ngyegyee a ɔma oda nsew fi kasadwin nkaa ho. Ngyegyee a 'hwe yie' dze dzi dwuma no nnye ngyegyee kor a ɔsaa nkyekyemu nyina mbom, ofa biara wo ewiei ngyegyee a odzi akotsen wo mu. Nkyekyemu kor n'ewiei ngyegyee ye 'a b a b c d', nkyekyemu ebien n'ewiei ngyegyee ye 'a b c b c a', nkyekyemu ɔto do ebiasa nedze ye 'a b c d e a', nkyekyemu odzi do nedze ye 'a b b c d b', nkyekyemu enum n'ewiei ngyegyee ye 'a b c d a e', nkyekyemu esia n'ewiei ngyegyee ye 'a b c d e b' na nkyekyemu a otwa to n'ewiei ngyegyee ye 'a b c a d e'. Se yehwe no

yie a, yehu no pefee de ewiei ngyegyee no nnye kor kesi ase. Sorbi wo ofa biara n'ewiei ngyegyee mu. Iyi ye okyerewfo ne kwan a ofaa so dze hyehyee n'awensem no. Ewiei ngyegyee ma akenkan ye dew na otwe akenkanfo hon adwen si nkasafua ahorow no dwumadzi do. Awensem a odzi mu biara hia de odze ewiei ngyegyee dzi dwuma osiande awensem no su kor a oma nye soronko fi kasadwin afofor ho nye ewiei ngyegyee a oda nsew wo mu.

Ndze na tsebea

Ndze gu mu ahorow pii; ndze a owo sor, dza oda famu, ndze a owo famu koraa na pii a okeka ho. Etsifiasem 'hwe yie' noara mpo da no edzi pefee de okyerewfo no dze ndze a owo sor dze rekasa. Ibesi den ehu iyi? 'Hwe yie', de mbre woka no ye nsem a woka no ber a biribi roko kyew ma owo de atsentsenn ba mu. Se enyiber ba na kokobo ba mu a, wodze ndze a mu yedzen, nye dur na tum taa ekyir na wodze kasa. Dem ntsi yebe ka de, ndze a okyerewfo no dze dzii dwuma ye ndze a owo sor na nye dzen yie.

Tsebea a okyerewfo no wo mu no ye enyiber tsebea. Ndze a odze dzii dwuma no kyere de owo ahomtsew na enyiber mu. Enyiber mmbae a, kokobo nnyi ho. Iyi ntsi na mpanyimfo ebube esiw asem ano de 'se biribi annka mpapa a, nkye mpapa annkeye krede'. Se siantsir bi nnyi ho a enyiber beba a, kokobo nnkeba. Kokobo ye afutusem. Epensampensam awensem no mu yie dembre yaye no dada yi a ibohu de, okyerewfo no gyina asetena mu adzeye na n'ekyir nsem do rutufo. Oda amandzenya asem edzi wie a, osanso bo koka de 'hwe yie'.

Kasasu

Kasadwin biara wo su kor bi a oma oda nsew wo mbuukuu nkaa nyinara mu na dem adze no nye kasasu. Kasasu wo kasadwin mu ye su a obata kasa ho a oma nye soronko fi kasa traah ho. Wodze kasasu dzi dwuma wo kasadwin mu ama naye dew na naye soronko so efi mbuukuu afofor ho. Awensem yi dze kasasu ahorow dzii dwuma. Bi nye: ngyinahoma, ntotoho, be na ntsim. Yempensampensam dem kasasu yi mu.

Odzikan, ngyinahoma. Ngyinahoma ye kasasu bi a wodze adze kor bi no su gyina mu ma adze fofor bi a onye no nnse anan mu. Wodze biribi no su gyina ho ma adze fofor a wonnsaa wo kwan biara do. Yeboku iyi wo nkyekyemu ebiasa no ne nsensanee anan no mu '*sika ye anoma, otu*'. Sika nnye anoma na onnkotum aye anoma da na mbom, su bi wo sika ho a onye anoma dzi nse. Anoma wo ntaban a ber biara a ope mu no otum tu ko bea ope. Sika ne ye a oma nye anoma

nye de se bambɔ ammba sika ho a, ebɔhwer no wɔ ber a w'enyi nnda. Na se sika fi wo nsa a, ibenya no bio no na ɔakyɛ papaapa. Iyi ntsi na ɔkyerɛwfo no dze anoma gyina hɔ maa sika.

Dza odzi do nye ntotoho. Ɔye kasasu bi a ɔkyerɛwfo bi hye da dze adze kor bi toto adze fofor bi ho ma ɔnye no se wɔber a dem ndzɛmba ebien noara hɔn ahosu yeper anaa wɔse. Ntotohosɛm dze nkasafua 'tse de' na 'aye de' nam. Yehu iyi wɔ nkyekyɛmu enum ne nsensanee anan mu, 'fie nyimpa aye no ho abosomanketsew'. Abosomanketsew ye abowa bi a otum sesa n'abɔsu ber biara mu. Dem na nyimpa binom so tse; nde ɔdwe a, ɔkyena ɔbeyɛ hyew, nde na ɔnye wo reserew a, ɔkyena obomuna n'enyim. Nnkotum akyere nyimpa binom hɔn su pɔtsee da na demara na abosomanketsew so tse pɛpɛper.

Nkyekyɛmu esia ne nsensanee anan no so dze ntotohosɛm dzi dwuma, *'tekyerema tse de ogya na sekan'*. Tekyerema nnye ogya anaa sekan bi. Mbom, ɔwɔ tum a ɔdze ye yie anaa ɔsɛɛ adze. Ogya ye wɔ akwanhorow do so ahweyie ammba mu a, otum hyehyew, ɔsɛɛ ndzɛmba na okum. Demara so na sekan tse, ɔboa ma nyimpa ho ye har wɔ n'adzeye mu naaso, ahweyie ammba mu a, obotum etwitwa wo na oepira wo. Tekyerema so no su ara nye no. Otum dandan kasa ma yie to yie na ɔnoara so tum dandan kasa ma ɔdze amandze ba. Ɔkyerɛwfo no yee iyi dze daa ntseasee soronko edzi faa nyimpa su bi na ndzɛmba nkaa so hɔn su ho. Ntotohosɛm ma akenkan ye dew na obue adwen mu.

Ma odzi do bio ye be. Be ye mpanyinkasa a wɔahye da awen a wɔdze twa kasa tsia. Awensɛm akyerɛwfo dze be dzi dwuma daa wɔ hɔn dwumadzi mu. Ɔma akenkan ye dew na ɔma hɔn nsem ye tsia. Ɔkyerɛwfo no dze be dzii dwuma wɔ nkyekyɛmu a ɔtwa to no nyina mu. Nsensanee 2 na 3 ka de, *'dua a Kweku Ananse wuu do no; ne ba Ntsikuma nntɔ nkom wɔ ase'*. Bio, nsensanee 5 na 6 so ka de, *'wɔmmfa nkongyaa mmpuw abowatsia ne ba'*. Be a odzikan no da nyimdziison edzi de, anamɔn a obi tui a ennsi no yie no, mmfa dem anamɔn kor noara so do. Se ibosha biribi efi dem anamɔn no mu, kye de ehwe yie.

Dza otwa tun nye ntsimu. Ntsimu/nsisido ye kasasu kor bi a akyerɛwfo taa dze da hɔn tsirmusɛm pɔtsee a wɔdze roto gua edzi. Ɔkyerɛwfo yi sii kɔkɔbɔ nkasafua 'hwe yie' do ara kepem de owie n'asenska. Nkyekyɛmu biara ne nsensanee a otwa tun ka de 'ntsi hwe yie' anaa 'ntsi hwe wo tekyerema yie'; nkyekyɛmu kor, 'ntsi onua, hwe yie'; nkyekyɛmu ebiasa, na 'ntsi hwe nyia enye no refimfen no yie'; nkyekyɛmu esuon.

Mbubudo

Tsir yi mu no, yeakyerɛkyerɛ awensem *Hwɛ Yie* mu fann. Yɛahwɛ ne nkyerɛkyerɛmu, awensem no botae, ne nhyehyɛɛ, kasasu ahorow. Megye dzi dɛ dem mpensampensamu yi yɛ dza ama atse awensɛ no ase yie.

Dwumadzi

1. Kenkan awensem *Hwɛ yie* bio na fa woara wo nkasafua pensapensa mu yie wo aber a erekasa fa dza odzidzi do yi ho.
 - a. Awensem n'asekyerɛ
 - b. No botae
 - c. Ne nhyehyɛɛ
 - d. Kasasu ahorow

Tsir 6: *Da Bi Asem Ntsi* Awensem no mu mpensampensamuye

Nyienyim

Awensem a odzi ewiei a yebeka ho asem nye ***Da Bi Asem Ntsi***. Yebeye dem awensem no mu mpensampensamu ahwe dza awensem no dze to gua pefee na mbre ne nkyerease tse. Hye no nsew de, wo so botum aye dem awensem yi ara no mu mpensampensamu wo kwan fofor do.

Botae

Tsir yi mu adzesua nko ewiei no, nna itum ye awensem ***Da Bi Asem Ntsi*** mu mpensampensamu wo aber a erehwe ndzamba bi tse de:

1. Awensem no ne nkyerkyeremu
2. nsentsitsir a owo awensem no
3. Awensem ne nhyehye
4. Kasasu ahorow

Yenko do.....

Awensem no

1. Da bi asem ntsi
Na yedzi kwadu a, yegya no hon,
Ntsi se wo nsa esi ayewa mu nde a, Mma
mmua wo nsa nnkyere wo nuanom, Na
promprom nntse ho daa.
2. Da bi asem ntsi
Na yedzi kwadu a, yegya no hon,
Ntsi se adan fiewura nde a, Mma
nnsisi ahoho a wotse wo fie, Na
mber egua, wonndzi nnka do.
3. Da bi asem ntsi
Na yedzi kwadu a, yegya no hon,
Ntsi se ereye edwuma bi nde a,
Nntoto no ase; mbom ye no yie
Na obi nnyim da bi asem

4. Da bi asem ntsi
 Na yedzi kwadu a, yegya no hon,
 Ntsi se eye ɔdzefo nde a,
 Mmbu wo mfefo enyimtsia
 Na obi nnyim adzekyee mu nsem
5. Mpanyin ka asem bi de
 “Edwuma bon nntse de kronobo”
 Dza enya reye no nde no,
 Suo mu yie;
 Na ekitsansamu’ ye kyen hweehwee.
6. Da bi asem ntsi; Na yedzi kwadu a, yegya no hon; Ntsi se eye edwuma mu panyin nde a,
 Mma mmbu nyimpa a wohwe w’ase tootooba, Na obi nnyim okyena asem.

Nkyerɛkyerɛmu

Se woka de *Da bi asem ntsi* a, Akan kasa mu no ɔye kɔkɔbo, nkaabo anaa kasakyere nsem anaa nkasafua a yedze dzi dwuma wo ber a afotusem anaa enyibersẽm bi abeda gua. Yedze dem asem yi twe adwen si do de daakye anaa ndamba bi wo ho ntsi otwar de obiara hwe noho yie na osiesie noho ma daakye. Okyerẽwfo no dze asentow 'Da bi asem ntsi' dzi dwuma wo n'akyerẽw mu dze bo koko de omuo de nyimpa betsenã wiase de mbre daakye biara nnyi ho anaa de mbre abrabɔ noara nye dza yerobo no nde nkotsee. Dza nyimpa beye biara no otwar de ohwe no yie osiande nde ndzeyee wo nsunsuando wo okyena do. Ohia de akwan nyinara mu no, yebɔtoto hen ndzẽmba yie, yenye nyimpa nyinara betsenã asomdwee mu, yedze enyidzi bema nyimpa, yebeye edwumadzen na yebesie hen nde ahonya no bi ama okyena de mbre henho nkekyer hen ndaamba. Iyi ntsi, otwar de yedze enyidaho bɔbo bra ama daakye biribiara ako yie ama hen.

Nsentsitsir

Nsentsitsir ye ngyinado nsem a okyerẽwfo bo no apɔwapɔw wo ne nsem mu dze da ne tsirmu nsem edzi. Awensem 'Da bi asem ntsi' dze nsentsitsir pii noara to gua. Iyinom bi nye: abrabɔ mu nsem, abrabɔ mu edwumaye, enyidzi a ohia de yedze ma afofor ɔmmfa ho dzibew anaa sika dodow a yewo, ahweyie wo hen ndzeyee ho na adze. Yebekyerekyerẽ nsentsitsir no mu ebien mu.

Dza odzikan nye abrabɔ mu nsem. Nsem pii na osisi wo abrabɔ mu. Awensem no ma yehu de obra no mu nsem dɔɔ so na dza nyimpa hu no nde no, ɔnnkeye dem ara okyena ntsi ɔwo

dɛ nyimpa biara sisi n'akwan yie. Dem kəkɔbɔ na afotusem yi kɔ do wɔ nsensanee ebiasa na anan wɔ ɔfa biara mu. Nsensanee ebiasa na anan ma yehu dɛ abrabɔ nntɔ ape iyi ntsi, ndzɛmba apapa anaa bɔn botum ato obiara aber biara; onnyi ndɛ no, na ɔwɔ ɔkyena'.

Abrabɔ mu edwumayɛ. Awensem no twe adwen si do dɛ, osiandɛ nyimpa ne tsebea botum asesa aber biara ntsi, ɔwɔ dɛ sɛ yenya edwuma bi reyɛ a, yeyɛ no yie. Ohia dɛ yɛhwɛ edwuma a yeyɛ yie ama oemmfɪ hɛn nsa. Woara hwe sɛ etse hɔ na nyɛ edwuma a ɔyɛ ɔtse dɛn? Anaa sɛ ebue edwuma bi na w'edwumayɛnyi bi nnye no yie a, ebeka dɛm? Iyi ntsi na awensem no tu hɛn fo dɛ sɛ yereyɛ edwuma bi a, dɛ edwuma no yɛ hɛn dze anaa ɔnnye hɛn dze no, ɔwɔ dɛ yɛpra hɛn yamu yɛ no yie ma edwuma no tsim dɛ mbɛ hɛn nsa bɔkɔ hɛn ano aber biara.

Awensem ne Nhyehyɛɛ

Nhyehyɛɛ yɛ kwan a ɔkyerɛwfo bi fa do dze ne nsem to gua. Nkasafua a ɔdze dzii dwuma, kwan a ɔfaa do dze kasa mpaapaamu dze dzii dwuma na mpo nkyekyemu ahorow a ɔdze awensem no hyɛɛ mu nyinara ka nhyehyɛɛ ho.

ɔkyerɛwfo ne nkasafua a ɔdze dzii dwuma

Awensem 'Da bi asem ntsi' yɛ awensem a n'akenkan nnye dzen. ɔkyerɛwfo no dze nkasafua a ne ntseasee nnye dzen koraa dzii dwuma. Nkasafua no da famu. Onnhia nkyerɛkyeremu bebiree biara. Obiara tum kenkan, tse ase na ɔfa no mu aba. ɔkyerɛwfo no dze ebirabɔ na kasasu ahorow pii hyehyɛ awensem no mu ma ɔyɛ dɛw. ɔma awensem no nnye tobogyann; ɔyɛ dɛw.

Kasa mpaapaamudze

ɔkyerɛwfo no dze kasa mpaapaamudze ahorow dzii dwuma wɔ n'awensem mu. ɔdze nsanhɔ, osisan, nkatomudze na osi-wiei dzii dwuma. Iyinom boa ma akenkan yɛ dɛw, no mu da hɔ na ntseasee da edzi. Kasa mpaapaamudze nnyi akyerɛw na akenkan mu a, ntseasee papa biara mmba akyerɛw na kasa dwumadzi mu. Kasa mpaapaamudze no kyere aber a ɔkyerɛwfo no gye n'ahom wɔ ne kasaa mu, ɔkyere aber a ɔkyerɛkyere ne nsem mu na ɔkyere aber a ɔkyerɛwfo no kyere dɛ nsem a ɔreka no nnye nedze.

Awensem ne Nhyehyɛ ho mpensampensamu

Awensem 'Da bi asem' wɔ nkyekyemu esia. Nkyekyemu kor biara wɔ nsensanee enum. Okyerɛwfo no yɛ hyehyɛ ɔfa no nyinara dze kyere de nsem a ɔreka no nyinara yɛ nsenhia na ne nyinara wɔ mfaso pɛr. Okyerɛwfo no nsentɔw ntsiatsia mu. Nkyekyemu biara wɔ asentsitsir pɔtsee bi a ɔdze to gua. Yɛmpensampensa nkyekyemu biara mu yie na yɛnhwɛ nsem pɔtsee a okyerɛwfo no dze to gua mu.

Nkyekyemu a odzi kan no, okyerɛwfo no kasa fa ayamuye na adzekyɛ ho. Ɔda no edzi kyere de sɛ inya adze ndɛ a, onnyi de ekam do. Ohia de ibue wo nsamu na eboa obi a no so ohia na prɔmprɔm nntse ho daa. Yehu iyi wɔ nsensanee a ɔto do ebiasa dze kesi enum. Okyerɛwfo no ka dem dze bɔ kɔkɔ de obiara nnye do ama hiada mu no, oenya mboa.

Nkyekyemu ebien no kasa fa pɛrpɛryɛ ho. Mpanyimfo de, 'isisi ananse a isisi woho'. Okyerɛwfo no gyina nsensanee a ɔto do ebiasa na dza ɔto do anan do da dem asem edzi. Okyerɛ de, mber dzi adan adan ntsi sɛ obi betsen a wo fie na isisi no a, aber bi beba a, dem onyimpa no a isisi no no so botum ayɛ fie wura, anaa wo ho bekyer wo a ebia a ibehia dem nyimpa no no mboa. Ehwe a ɔbekasa wo ho?

Nkyekyemu ebiasa, na anem kasa fa edwumadzen ho. Okyerɛ de sɛ Nyankopɔn dom wo na ɔma wo edwuma yɛ a, mma ennye no biara biara. Ye no yie. Kaa hu de, edwuma sin nnyi akatua. Nkorɔfo bi wɔ ho a, sɛ wɔreyɛ obi n'edwuma a, wɔnnye no yie. Wɔtaa ka kasa bi de, 'Aban n'edwuma wɔnnsoa, wotwum no adze'. Sɛ erekenkan dem buukuu yi na ewɔ dem adwen no a, sesa w'adwen! Edwuma biara a ereye no, ye no yie na edwuma bɔn nntse de adzewia. Sɛ wɔma wo edwuma na eyɛ no yie a, edwuma no botu mpon na ɔbo wɔ ho daa ma enya bi ayɛ ma wo nsa ako w'ano.

Nkyekyemu anan na esia n'asentsitsir nye de yɛmfa enyidzi mma obiara. Okyerɛwfo no de, 'sɛ eyɛ ɛɔdzefo a, mma mmbu wo mfɛfo enyimtsia'. Hu de obiara no ho hia. Sɛ ɔkɔhwɛaban nnyi ho, ɔdzefo nnyi ho. Sɛ abofra innyi ho a, panyin so innyi ho. Iyi ma yehu de obiara no ho hia ntsi ɔwɔ de yɛdze enyidzi ma obiara.

Dem nsentsitsir ahorow yi ma hɛn abrabɔ mu suahu na afotusem ahorow. Dem suahu yi nyinara sɛ yɛfa dze bɔ ɔbra no a, ɔbema abrabɔ no ako do ma asomdwee aba.

Ewiei ngyegyee

Awensem biara wɔ ewiei ngyegyee a ɔma ɔda nsew fi kasadwin nkaa ho. Dem ewiei ngyegyee yi ma awensem no ne nhyehyee ye enyika ye dɛw. Ngyegyee a '*Da bi asem ntsi*' dze dzi dwuma no wɔ nkyekyemu ahorow no mu no ye soronko. Awensem ne nkyekyemu kor biara wɔ ewiei ngyegyee a odzi akotsen wɔ mu. Nkyekyemu kor n'ewiei ngyegyee ye 'a b c d e', nkyekyemu ebien n'ewiei ngyegyee ye 'a b c d e', nkyekyemu a ɔto do ebiasa nedze ye 'a b c d e', nkyekyemu a odzi do nedze ye 'a b c d e', nkyekyemu enum n'ewiei ngyegyee ye 'a b c d e', nkyekyemu esia n'ewiei ngyegyee ye 'a b c d e'. Sɛ yɛhwɛ no yie a, yehu no pefee dɛ ewiei ngyegyee no nnye kor kesi ase. Sorbi wɔ ɔfa biara n'ewiei ngyegyee mu. Iyi ye ɔkyerɛwfo no ne kwan a ɔfa so dze hyehyɛ n'awensem no. Ewiei ngyegyee ma akenkan ye dɛw na ɔtwe akenkanfo hɔn adwen si nkasafua ahorow no dwumadzi do. Ewiei ngyegyee yi san twe adwen si awensem no mu nkyekyemu biara mu na asentsitsir a ɔdze to gua do. Awensem a odzi mu biara hia dɛ ɔdze ewiei ngyegyee dzi dwuma osiandɛ awensem no su kor a ɔma ɔye sorokckvɛnko fi kasadwin afofor ho nye ewiei ngyegyee a ɔda nsew wɔ mu.

Kasa a ɔkyerɛwfo no dze edzi dwuma no ma ne nteasee nnye dzen. Kasa mpaapaamudze dzi akotsen wɔ awensem yi ne nhyehyee mu. mfatoho Nsanho: mmbu wo mfɛfo enyimtsia,

Ntsi sɛ wo nsa esi wo ayewa mu ndɛ a,

Mma nsisi ahɔhɔ a wɔtse vwo fie,

Osiwie

Na mber egua, wonndzi nnka do.

Na obi nnyim da bi mu asem.

Osisan

Na yedzi kwadu a yegya no hon;

Ntsi sɛ ereye edwuma bi ndɛ a;

Suo mu na ye no yie;

Dem kasa mpaapaamudze ahorow yi boa ma awensem no ne ntsease dzi mu.

Ndze na tsebea

Ndze gu mu ahorow pii; ndze a ɔwɔ sor, dza ɔda famu, ndze a ɔwɔ famu koraa na pii a ɔkeka ho. Ndze a ɔwɔ '*Da bi asem ntsi*' mu no ye dza n'ano nnye dzen pii. ɔkyerɛwfo no nam kasakyere na afotusem do dze bɔ akenkanfo kɔko fa ndzɛmba bi a osusu dɛ ohia dɛ nyimpa twe no ho fi ho. Iyi

ntsi, yennhu ntseamu wɔ awensem no mu. Ɔkyerɛwfo no kɔ do dze nsembisa twe ɔkenkanfo n'adwen si dza ohia do. Iyi boa ma ɔkenkanfo no dwen dza ɔkyerɛwfo no reka no ho yie na ɔfa mu aba. Ɔkyerɛwfo no nnhye akenkanfo ketsee de wɔngye dza ɔreka no ntomu. Mbom, ɔdze kasakyere twe adwen si abrabɔ mu ndzɛmba do.

Tsebea a ɔkyerɛwfo no wɔ mu no nnda edzi pefee ɔwɔ mu de n'enyi aber dze. Dza yehu nye de, ɔkyerɛwfo no gyina asetsena mu ndzeyee na no nsunsuando do dze rutu fo. Osiande ɔkyerɛwfo no rotwe adwen esi ndzeyee ahorow na no nsunsuando do ntsi, ɔnnkekamu.

Kasasu

Kasadwin biara wɔ su kor bi a ɔma ɔda nsew wɔ mbuukuu nkaa nyinara mu na dem adze no mu kor nye kasasu. Kasasu wɔ kasadwin mu ye su a ɔbata kasa ho a ɔma ɔye soronko fi kasa traah ho. Wɔdze kasasu dzi dwuma wɔ kasadwin mu ama ɔaye dew na ɔaye soronko so efi mbuukuu afofor ho. Awensem yi dze kasasu ahorow dzii dwuma. Bi nye: ngyinahɔma, ntotoho, be, ntsimu na asembisa a ɔnngye mbuae. Yɛmpensampensa dem kasasu ahorow yi mu.

Odzi kan nye be. Be ye mpanyinkasa a wɔahye da awen a wɔdze twa kasa tsia. Awensem akyerɛwfo dze be dzi dwuma daa wɔ hɔn dwumadzi mu. Ɔma akenkan ye dew na ɔma hɔn nsem ye tsia. Ɔkyerɛwfo no dze be dzi dwuma wɔ nkyekyemu esia ne nyinara mu. Ne nyinara mu no, osisi nsensanee a odzikan na dza ɔto do ebien no do wɔ nkyekyemu kor kepem enum no mu. Ɔka de:

Da bi asem ntsi

Na yedzi kwadu a, yegya no hon.

Iyi ye asem a wɔdze rotwe akenkanfo hɔn adwen esi do de ohia de wonya adze a wosie bi ma daakye. Bio, akyerɛwfo no ma yetse ase de, “Edwuma bɔn nntse de krɔnobɔ”. Dem be yi ma yetse ase de, ɔmmfa ho mbre edwuma a ereye no tse, se ɔye edwuma papa nkotsee dza, ibenya no mu mfaso. “Mber egua, wonndzi nnka do” so ye abɛbusɛm a ɔkyerɛwfo no dze rekyere de gyinabew a ewɔ no nde no, hwe no yie osiande ɔnnye adze a ɔbɛka hɔ daa. Mber bi beba a woso befi dem gyinabew no ma obi so abehye hɔ. Iyi na ɔkyerɛwfo no twe nyimpa n'adwen si do. Otwar de obiara bɔ ne bra yie na ɔnye nyimpa nyinara tsena asomdwee mu ama mber dan a, oetum nye obiara atsena.

Kasasu kor so nye ntsimu. Ntsimu/nsisido ye kasasu kor bi a akyerɛwfo taa dze da hɔn tsirmusem potsee a wɔdze roto gua edzi. Ɔkyerɛwfo yi sii ‘*Da bi asem ntsi, Na yedzi kwadu a, yegya no hon*’ do ara kepem de owie n'asem ka. Nkyekyemu 1,2,3,4,6 no mu biara ne nsensanee a odzi kan na

dza ɔto do ebien no, yehu ‘*Da bi asem ntsi, Na yedzi kwadu a, yegya no hon*’ wɔ ho. Iyi kyere hia a dem afotusem yi hia akyerewfo no.

Kasasu kor so a yehu no wɔ awensem no mu nye kasambirenyi. Okyerewfo bir nsem bi enyi dze kasa kyere akenkanfo de mbre wobɛtse ase wɔ nyansa mu. Okyerewfo no se, *se wo nsa esi wo ayewa mu nde a, mma mmua wo nsa nkyere wo nuanom*. Ɔfa dem kasa yi do kyere akenkanfo de, se mber pa ba ma nyimpa nya adze a, otwar de ɔkaa afofor. Ɔdze ‘ayewa mu’ gyina ho ma ndzembra pa a nyimpa tum nya wɔ abrabɔ mu. Hwehwe ‘ayewa’ n’adzeban wɔ Mfantse amambra mu.

Mbubudo

Tsir yi mu no, yeakyerekyere awensem ‘*Da bi asem ntsi*’ mu fann. Yeakyere mu de ɔwɔ nkyekyemu ahorow esia. Ɔfa a odzi kan no, ɔkasafɔ no da no edzi de onnyi de hen nsamu ye dzen wɔ afofor do anaa onnyi de yepopo hen tsir de yebɔboa afofor wɔ aber a yewɔ tum a yedze beye. Ɔfa ebien no, ɔkyerewfo no ma yehu de ɔnnsede yesisi afofor wɔ aber a yedzi tum bi. Ɔfa ebiasa na anan no so, ɔkasafɔ no boa akenkanfo ma yehu de prɔmprɔm nntse ho daa ntsi dza yenya no mma yenntoto no ase na mbom yenhwe do yie. Ɔfa enum no, ɔkyerewfo no toa do dze abebu kyere hen de edwuma bɔn nntse de korɔnobɔ ntsi se edwuma a yereye no nkɔ yie mpo a, yenya abotar na mber pa beba. Ɔfa a otwa tun no, ɔkasafɔ no twe hen adwen si do de mma yemmbu nyimpa a wɔhye hen ase no tootooba bere a yenya dzibew a ɔkorɔn no. Yeahwe ne nkyerekyeremu, Asentsitsir a awensem yi dze to gua nye de biribiara a nyimpa beye no ɔse de ɔdwen ne daakye ho osiande prɔmprɔm nntse ho daa. Awensem no no botae, ne nhyehyee, na kasasu ahorow so yeahwe. Megye dzi de dem mpensampensamu yi ye dza ama atse awensem no ase yie.

Dwumadzi

Kenkan awensem ***Da bi asem ntsi*** bio na bua nsembisa a odzidzi do nyinara.

1. Kyere botae a awensem no dze to gua.
2. Awensem n’asekyere
3. Ne nhyehyee
4. Kasasu ahorow
5. Adzesua a enya efi mu

NWOMA A YENYAA MU MBOA

- Agyekum, K. (2013). Introduction to literature. Adwinsa Publications (Gh) Ltd.
- Agyekum, K. (2011). *Akan kasadwini*. Madina-Accra: Dwumfuor Publication.
- Agyekum, K. (2000). Aspects of Akan oral literature in the media. Research Review vol 16 (2):1-18. Institute of African Studies, Legon.
- Akwa, K. G. (1987). *Twer Nyame*. Accra: Bureau of Ghana Languages.
- Brown, P. (1993). *Kyere hɔn*. University College of Education, Winneba. Unpublished manuscript.
- Di Yanni, R. (2002). Literature Reading: fiction, poetry and drama. New York: McGraw-Hill.
- Finnegan, R. (1992). Oral literature in Africa. Oxford. Oxford University Press.
- Hope, P.A and Takyi, J. K. (2019). *Mber pa beba ampa*. Cape Coast: Nyakod Printing and Publishing Co. Ltd.
- Krampah, D. E. K. (1977). *Obra wɔtɔbo bɔ*. Accra: Bureau of Ghana Languages.
- Okpewho, I. (1992). African oral literatur: backgrounds, character, and community. Blooming: Indiana University Press.